



historia 3130.

500.

XI V 107.

VI.

34 a. b.

DE SACRA
ANTIQUITATE
ET STATV
ORDINIS CANONICI
CVSTODVM SACROSAN^{ti}
SEPVLCHRI DOMINI
Hierosolymitani.

IN GRATIAM MIECHOVIANÆ
Congregationis,
LIBRI TRES.

SAMVELIS NAKIELSKI S. Th. Licent.

Eiusdem sacri Ordinis in Conuentu Miechouienfi
Professi, Ecclesie S. Hedwigis in ponte Regio ad
Cracouiam PRÆPOSITI.

CRACOVIAE,

Ex Officina Francisci Casarij, Anno Domini, 1625.

Bibliotheca Collegij Iuridici




A P P R O B A T I O.

Ioannes Foxius I. V. Doctor, Archidiaconus Eccl:
Cathedr : Cracouien : vnus ex Censoribus librorum
Diocesis Cracouien: vidi & legi, de statu ordinis Ca-
nonicorum, Custodum SS. Sepulchri Dominici opus,
à R. P. Samuele Nakielski S. T. Licent. elaboratum,
quod in lucem edi posse, censeo allaturum legentibus
non paruam antiquitatis; cognitionem. Dat. Craco-
uiæ, exædibus meis die 23. Aprilis. A. D. 1625.



18988.1

RE



REVERENDIS ET RELIGIOSIS
IN CHRISTO PATRIBVS,

Almi Ord^{nis} Canonicoꝝ Regula-
rium Custodum Sacrosancti Sepulchri
Domini Hierosolymitani

PRÆPOSITIS, PROVINCIALI-
bus, Beneficiariis, & reliquis Miechouiana
Congregationis Fratribus plurimum
obseruandis.

SAMVEL NAKIELSKI, EIVSDEM
sacri instituti Professus, Ecclesiæ & Conuentus S. He-
duigis in ponte Regio Præpositus. Cum gratiæ Diui-
næ incremento, perseverantiam in bono.



Mortalium ingenia, quæ non agre-
ssia, nec prorsus abiecta videntur,
PP. IN CHRISTO VENERANDI:
ita natura formavit, ut singulari
quadam vetustatis admiratione,
& veneratione ducantur. Hinc ea,
quæ à priscei sæculi hominibus, claris præsertim & il-
lustribus, ingenij monumenta, ut potè tabule, ima-

gines, colossi, publicaꝫ alia instrumenta, profecta
 vel usurpata, ad nostram vsq; etatem perduraue-
 runt, multo pluris facere consueuimus, quam quæ,
 vel presentis æui, vel proximè exacti, industria pro-
 tulit & elaborauit. Neq; id merito; cum enim flu-
 xa sit & caduca omnium sublunarium condicio, &
 subindè pereuntibus alijs, alia succedant; hinc fit,
 ut res quæ temporum omnia consumentium, ini-
 quitate superata quasi deuictò longo seculorum de-
 cursu, infinitos fortune fluctus euaserint, animos
 etiã nostros iucundo quodam sensu afficiant. Nam
 varia præteritorum temporum euenta, quasi quod-
 dam vite humane theatrum exhibent, ex quo lucu-
 lenta documenta, ad præclaras quasuis actiones su-
 scipiendas utiliter petuntur, magisq; & efficacius
 præteritis, quam ijs quæ oculis nostris obuersantur,
 erudimur. Certè elegans est illa Plinij maioris sen-
 tentia, quam ille in Proemio Librorum de naturali
 Historia scriptam reliquit: Res (inquit) ardua, ve-
 tustis nouitatem dare, nouis authoritatem, obsole-
 tis nitorem, obscuris lucem, fastiditis gratiam, dubijs
 fidem, omnibus verò naturã, & nature sue omnia.
 Hæc ille. Vt autem natalis soli dulcedo omnibus est

Plinij 2di e-
 legans dictū

gratior

gratior, præsertim in eodem educatis & enutritis, sic earum quoque rerum notitia impensius delectamur, quæ nos de maiorum nostrorum, à quibus ortum traximus, aut in quorum loca, possessiones, & munia successimus, priscis institutis, laboribus, casibus denique tum propperis tum aduersis, instruit, quippe quod illorum laudis & gloriæ, felicitatis vel infortunij pars in nos quodammodo redundare videatur. Quarum rerum consideratio REVERENDI Confratres, ita animum meum accendit, ut de prisci instituti Canonorum Hierosolymitanorum, ad custodiam SS. Sepulchri deputatorum, prædecessorū nostrorum, nominis & originis splendore pristinae luci restituendo, cogitare ceperim. Profuit namq̃ semper, (ut non ineptè quidam dixit) unicuiq̃ sua non ignorasse principia, horum enim cognitio, non tantum ad imitationem suorum progenitorum, verum etiam ad maioris gloriæ decus parandum, excitare solet. Et si autem non ignorem, multos ante me clarissimos viros, hoc in negotio egregiam posuisse operam. Inprimis verò celeberrimum illum sanctitate & doctrina virum Iacobum de Vitriaco, in terra sancta Legatum, postea Aconensem Episcopum,

August: Mæ
tuan⁹ in suo
Apologeti-
co.

Iacobus in
sua Historia
Hierosoly-
mitana ab-
breniata. Au-
ctiorem vide-
re est editio-
nis Duacen-
sis,

Mare oceanum omnium Religionum Syluestri Maruli Abbatis Roceamatoris Ordinis Cisterciensis.

tandem Patriarcham Hierosolymitanum & S.R.E. Cardinalem; Posthunc verò Syluestrum Marulum Abbatem Roceamatoris Ord. Cisterciens. hominem in perscrutandis omnium penè Religiosorum sacris familiis, alioquin solertissimum; Qui sacre Congregationis huius originem, atq; progressus, ea qua potuerunt fide maxima, diligentiaq; prosecuti sunt. Et cum à plerisq; alijs, quos recensere longum esset, id ipsum factitatum videam, à nemine tamen ipsorum, ita præclarissimi ordinis res gestas, & vetera instituta descripta inuenio, ut satisfaciant ijs, qui hæc sibi uberius ex fide publica referri postulant. Quales ego vos Reuerendi Patres esse censeo, qui multiplicibus Sacri Ordinis, quæ penes vos sunt, diplomatibus instructi, arctioribus aliorum Commentarijs minimè satiari potestis. Proinde ut vestro hac in parte desiderio respondeam, & nostri in primis summi ex Ordine Præsidis, Illustriss: D. MATTHIÆ LUBIENSKI nusquam satis laudati Episcopi Chelmensis quem diuina bonitas tot præclarissimis ornamentis insigniuit, ut Ordinis nostri decus, & ornamentum meritò appellari possit, voluntati morem geram; Hec ipsa Ordinis nostri initia, probatissimo-

tissimorum authorum scriptis, ac certissimis Ordinis instrumentis plenius informatus, pro virili mea, ad pinguiorem minervam reducere, & ab obliuione hominum vindicare constitui. Quod vobis inprimis non in gratum fore iudico, qui hec aliquando in publicum proferri postulastis. Agnoscetis siquidem hinc Religiosi Confratres, instituti vestri prima in cunabula; Cernetis insignes Ecclesiæ Hierosolymitanæ, qui Ordinis gubernacula tenuerunt, summam hic collectos viros, quanti olim in Ecclesia Dei extiterint. Videbitis primos Ordinis in hoc Poloniae Regno Fundatores, quorum fuit excelsus mundi contemptus, uberrimus posteaquam mundo nuntium remiserunt penitentiae fructus, religiosa frugalitas, assiduum orandi studium, & indefessus querendæ ac parandæ salutis humanæ labor. Idcirco à multis expetiti, ad sublimes quoque suis Sacerdotij gradus & dignitates, inuiti licet, euehebantur, & in plerisque Diocesibus curæ animarum admoti, munus illud Apostolicis viris dignum, summa cum laude obibant. Cognoscetis denique hinc vestram vocationem, & eius excellentiam: Nam præter id, quod cum alijs præclarissimis Ordinibus commune habe-

tis,

tis, quod nempe contemplantis simul & agentis vi-
 ta institutum complexi estis, ita ut vita vestra, qua
 ducitis, ex utraque illa contexta sit; Ipsa in primis
 Ordinis antiquitas, quam ab Apostolis recta linea
 trahere vos rerum Ecclesiasticarum scriptores fir-
 missime astruunt, celebriores vos reliquis reddere
 videntur: Quantò enim sacer ille Apostolorum
 Senatus, aliorum Sanctorum Patrum Collegio,
 præstantior extitit, tantò & illorum institutum,
 quod vos profitemini excellentius procul dubio ce-
 teris reputari debet. Quid titulum commemorem?
 An non hic etiam insignes vos & honorificentissi-
 mos apud omnes facit, dum Canonici & Custodes
 SACROSANCTI SEPULCHRUM Domini censemi-
 ni. Quemadmodum enim ille Sanctissimum su-
 um Sepulchrum, toto orbe terrarum, statim à tem-
 poribus gloriosissimæ Resurrectionis sue, (iuxta Pro-
 phetæ Diuini Vaticinium, Et erit sepulchrum eius
 gloriosum) perpetuo clarissimum fecit; ita Canoni-
 cos & Custodes eius, licet ob tyrranidem barbarorū
 à custodia illius nunc remotos, ob reuerentiā Sepul-
 chri sui, claros, honoratosque, ad finem vsque mun-
 di, peculiari gratia sua reddet. Non refero dignita-

Isaia II.

tem,

tem habitus vestri Clericalis, qui à foris cruenta.
CHRISTI Cruce insignitus, summā venerationem
cunctis ingerit, qui hoc labarum celestis illius Im-
peratoris, quo aduersus Demonas, mortemque ge-
nerosissime depugnauit, in vobis contemplantur. Sic
à Duce strenuo arma relicta, ijs qui ea deferunt, ho-
norem parere consueuerunt. Et quemadmodum Iu-
lij olim Caesaris tunica, coniuratorum mucronibus
confossa, & dictatorio sanguine cruētata, pro rostris
ostensa, ad commiserationem occisi Principis popu-
lum commouit; Ita hæc Sacratissima insignia in vo-
bis conspecta, cunctos CHRISTI fideles, ad recolendā
passionem salutiferam, quam pro membris suis ca-
put nostrum pertulit, excitat & accendit. Macti pro-
inde estote animis præstantissimi Canonici, mentem
generosam excitate, primumq; illum Ordinis ve-
stri florem, quantum in vobis est restituite;

Officio nec vos certasse priores

Poeniteat.

Manet cælo promissa merces.

Et qui Apostolicam vitam suscepistis, Apostolorum
doctrinam, & mores, conuersationemq; imitemini.
Non sit vobis leuis vel exigua proprii status aestima-
tio, nam quod experientia didicistis, qui à proprio

B

instituto

instituto rectè suscepto, animo vel opinione deflexe-
 runt, non solum perfectionis iacturam fecerunt, ve-
 rum etiam parum felici exitu vitam finierunt. Vo-
 bis igitur iucundissimis Fratribus meis, ex uno Ca-
 nonico ordine & Congregatione Hierosolymitana,
 professis, de eodem ordine & congregatione hic Cõ-
 mentarius æquissimo iure debetur. Nam sicut de
 eiusdem Almi Ordinis dignitate ac prestantia, qui
 in leges & Canones ipsius iurauimus gloriari licet in
 Domino; Sic æque nitendum nobis est, ut hæc san-
 cta Congregatio, in dies maiora splendoris & au-
 thoritatis incrementa ex nobis sumat. Tribus vero
 Libris diuisum atque distinctũ hoc opus potissimum
 esse volui: quod veluti trinam plantationem hic no-
 bilissimus Ordo habuerit. Antiquam, ab ipsis
 Apostolis insitam, de qua in primo libro. Nouam
 quando recuperata Terra sancta de manibus bar-
 barorum, iterum Canonici cum Patriarcha sedi-
 bus antiquis fuerant restituti, de qua in secundo.
 Nouissimam, quando fausto omine in Poloniam,
 & exinde per vicina regna fuerunt deducti, de qua
 in tertio libro agemus. His addetur series & succes-
 sio Prepositorum Miechoniensium, almi Ordinis

Vice

*Vicepatriarcharum Hierosolymitanorum, Presi-
dum. Sit itaque perpetuum pignus amoris & ob-
servantiæ erga vos mea, hic quem, Vobis dilectissimi
Confratres, de Ordine dicare decreui, libellus. Et si
alicui hac in parte minus quam rei & materie gra-
uitas postulat, à me satisfactum videbitur, animi
saltem promptitudinem & debitam erga Sanctissi-
mam Religionem, Matrem communem, observan-
tiam, boni consulat. Feci enim quod potui. Illud
perinde doctissimi cuiusdam in animum reuocans.*

Spero etiam fore, cum quæ nos extrudimus ipsi.

Olim aliquis Divis & Musis charior ipsis.

In melius feret, atque impensius arte polibit


Et quæ iam nostro primo patefacta labore est,

Mollius ille viam solidabit marmore secto

Mi sat erit specimen clari monstrasse laboris.


*Valete in Dño, & me vestri studiosum, ac vestrorū
in aggregandis, cumulandisque religiosarum virtu-
tum thesauris incrementorum cupidum, mutuo a-
more complectimini.*

Hieronym⁹
Vida Cremonen:
Canonicus Regularis
Albæ Episcopus.



Quæ precium vitæ, quæ nostræ est ara salutis,
 Et quam Regum Aquilæ, Sceptraque magna colunt.
 Vestibus hæc vestris Solymæ persancta propago,
 Atque vetus Christi & prima Columna Domus.
 Mentibus atque simul vestris Crux sancta rubescit,
 Vltimus & primus totius orbis apex.
 Florete æternum, & postquam splendet in alto,
 Huc vester portus summoque perfugia.

Albertus Bieniasius Præuorsc: eiusdem S. Instituti
 Professus Vic: Chelmenlis.



DE SACRA
ANTIQUITATE
ET STATV
ORDINIS CANONICI
Sacrosancti Sepulchri Hieroso-
lymitani
LIBER PRIMVS.

CAPVT PRIMVM.

*Cleri per vniuersas Orbis partes ab Apostolis pri-
mæua institutio, & de primo Ecclesiæ Hierosoly-
mitanæ Episcopo eiusq; Clericis.*



Antiquitatem Canonorum Regula-
rium, Custodum SS. Sepulchri Domi-
ni Hierosolymitani, statumq; illorū
descripturus; pauca de origine Cleri-
corum primæuæ Ecclesiæ, qualiter cū
plenitudine acceptæ à CHRISTO
Domino authoritatis per Apostolos in vniuerso pro-
pè orbe instituti fuerint, antequam ad nostra descen-
dero, in genere præfari libuit. In Exordio nascentis
Ecclesiæ, posteaquam Redemptor, consummato re-
demptionis nostræ Mysterio, cælos ascendisset, &
credentium numerus magis magisque augeretur.

D. Hieron:
c. Duo sunt.
q. 1. & c. Cle-
ros. distin: 21

Acta Apost:
c. 2. & 4.

Euseb: in li.
de Euange-
lica demon-
stratione.

Petrus Coto-
nus institu-
tionis Catho-
licæ. lib: 2.
cap. 21.

Ne quid inordinatum in Ecclesia CHRISTI esset, duo Ordines Christianorum, autore Spiritu sancto, ab Apostolis constituti esse leguntur, Clericorum scilicet & Laicorum: quos Ordines D. Hieronymus, duo genera Christianorum compellat. Clerici illi dicebantur, qui de sorte Domini electi, munus & ministeriū diuinum in Ecclesia exercebant. Laici, qui de fidelium vniuersitate existens, nullo Sacro ministerio fungebātur; quibus tamē omnibus tam Clericis, quam Laicis, quemadmodum Acta Apostolorum testantur; *Erat cor unum & anima una in Domino.* Porro primi Clerici, vt testis est Eusebius Cæsariensis, imò tota Catholica antiquitas, perfectissimum viuendi modum, ab Apostolis acceptum, fidelissime in omnibus obseruabant. Non enim illi nuptias, non sobolē, non substantiam, non opum facultatem requirebant; sed soli Diuino cultui, ex immenso rerum cælestium amore addicti, vacabant. In laicis remissior erat atque humanior vitæ modus. Quos quidem Clericos, ab Apostolis in omnibus propè Orbis vniuersi Ecclesijs primitus institutos fuisse, scriptores Ecclesiastici recensent. Nam quidem S. Ioannes Ephesi, S. Andreas in Achaia, S. Matthæus in Ætyopia, S. Simon in Ægypto, S. Iudas in Mezopotamia, S. Philippus in Scythia, S. Bartholomæus in Armenia, S. Thomas in Perside, & inter Medos, Parthos, & Brachmanos, S. Barnabas in Cypro, vna cum tabernaculis pietatis à se constitutis, per impositionem manus, Clerum ordinasse me-

moran-

morantur. Sic D. Petrus Romæ & D. Marcus in Alexandrina Ecclesia, ad quem Canonici Lateranenses, ut vult Signius. Et D. Iacobus Minor Hierosolymis, ad quem Canonici Hierosolymitani primordia instituti sui re ferunt, sacri Cætus primi institutores & cōditores fuisse deprehenduntur. In quibus Ecclesijs, Regulæ & traditiones Apostolicæ, per Clerum à se ordinatum, primum obseruatæ leguntur; hi enim soli, sine scriptis, in cordibus tantum exaratam Regulam Apostolicam profitebantur, à quibus deinceps, reliquas Ecclesias ex Regula viuendi morem sumpsisse, illamque in Codices retulisse, Petrus Damianus Cardinalis pius testatur. Veræ antiquitatis peritissimus indagator D. Hieronymus ad Paulinum scribens, non minus doctè quàm pulchrè originem Cleri Apostolici his verbis ostendit. Habet (inquit) vnum quodq; propositum Principes suos. Romani duces imitentur Camillos, Fabritios, Regulos, Scipiones. Philosophi proponant sibi Pythagoram, Socratem, Platonem, Aristotelem. Pòetæ, æmulentur Homerum, Virgilium, Menandrum, Terentium. Oratores Lysiam, Demosthenem, Grachos, Tulium. Episcopi autem & Presbyteri habeant Apostolos & Apostolicos viros, quorum honorem possidentes, habere nitantur & meritum. Sed relictis interim reliquarum Ecclesiarum progressibus atque institutis, quantum attinet Ecclesiã Hierosolymitanam, de qua nobis in præsentires est, huius primum Episcopum fuisse D. Iacobum Alphæi filium,

Signius de
Ordine &
statu Canonico Lib. 4.
c. 3. fol. 25
Volaterranus Lib. 1.
Antropologiarum Ordinem Canonicum Hierosolymis in Monte Sion primitus institutum, à D. Augustino deinde instauratum fuisse proficitur

Marc: 15.
Matt: 27.
Ioan: 19.

Chrysof: in
Ioã: Hô. 87.

Theodoret⁹
lib: 1. c. 9. E-
pist: Sinoda-
li Constan:
Oeconom.
Boskhier⁹ in
oratore terre
S. Philip: 2.
fol. 34

lium, cognomento Iustum, quem Paulus ad Galatas scribens, Fratrem Domini appellat; Mater siquidem eius Maria, soror fuit sanctissimæ Virginis, non germana ex Anna, sed consobrina ex sorore Annæ genita, quam passioni Saluatoris interfuisse, sermo Euangelicus testatur. *Erant, inquit, & mulieres à longe aspicientes, inter quas erat Maria Magdalene, & Maria Iacobi Minoris, & Ioseph mater,* nemo est qui id ignoret. Ipsum omnes, tam pro illius nimia sanctitate, quam pro saluatoris consanguinitate, Apostoli honorabant, & de diuersis regionibus, dum ad prædicandū dispersi essent, ad ipsum velut ad Patrem opportunis temporibus recurrebant, necessariaeq; consultationes, ab ipso, vt à magistro, prout ratio deposcebat, humiliter flagitabant. Eum Chrysostomus à D. Petro Apostolorum Principe, antequam Hierosolymis Apostoli discederent, ad prædicandum gentibus Christi Euangelium, ordinatum fuisse Hierosolymorum Episcopum, his verbis recenset: *Si quis à me percunctaretur, quando Iacobus sedem Hierosolymitanam accepit, responderem ego, hunc totius orbis Magistrum preposuisse Petrum.* Vnde merito à Sanctis Patribus Ecclesia Hierosolymitana, mater omnium Ecclesiarum, origine scilicet & tempore, atq; perinde Schola fidei nostræ, præcipuum Christianismi Sacrarium, & princeps Academia appellatur. Quia ibi

primum

Gillb. Gen:
Chron. li. 3.
fol. 362.

primum nouellam plantationem fidei Christianæ, initium sumpsisse, compertum habetur. Cur autem Christus Dominus, primarium Ecclesiæ suæ thronum, Hierosolymis minimè constituere voluerit? Sacrarum literarum periti, huius rei rationes assignant. Primò; Quòd propter Iudaici populi perfidiam & scelera, eā paulò post à fundamentis euersurus esset, quòd citra dispendium nouellæ plantationis, vix contingere potuisset. Secundo; Quòd primatus Sacerdotij Leuitici fuerit ibi locatus, hoc verò iam à morte Christi Redemptoris omninò tollebatur, & in eius locum Ecclesiasticus Christiani populi Ordo, Ceremoniæ, Ritus, Liturgia succedebant; ac proinde domicilium quoque ipsum omninò mutari decreuit, vt cuncta essent noua, ne Synagogæ aliquod superesset vestigium. Terzio; Ne Ecclesiæ locus, videretur necessariò Iudææ confixus & alligatus. Quarto; Ne gratia conclusa & circumscripta putaretur, vt olim, Iudææ limitibus, sed potius sparsa per vniuersum orbem, gentibus eius participibus atque cohæredibus. Quintò; Vt implerentur Prophetiæ canentes: Deum suo Christo daturum gentes in hæreditatem, & in possessionem terminos terræ, effecta Ecclesia ex Iudaica Catholica, id est, ex vniuersali Iudæorum atque gentilium coetu collecta. Porro primi Clerici Hierosolymis à Iacobo Apostolo instituti, & ab eodem vitæ Apostolicæ normam edocti, quam vt superius attigimus, sine scriptis, in cordibus imis repositam profitebantur, ad posteros vsque

D. Clemens
Martyr Epi-
stola 5.
Nicephorus
Eccl: Hist:
lib: 14. c. 5.

D. Tho: Aq.
in 4. distin.
14. Signius
li: 1. c. 2. f. 8.

constantissime & incorruptè propagasse feruntur. Ad quos S. Clemens D. Petri successor, scripsit Epistolam, admonens eos communis Sodalicij, & ne ab Apostolicis regulis à quopiam auelli se patiantur. Nicephorus Calistus Ecclesiasticæ Historiæ Scriptor insignis: cum ad institutum Cleri Hierosolymitani descendisset, miram illius, pro illo tempore perfectionem, quâ ab Apostolis proximè hauserât, his verbis recenset: Simul, inquit, eisdem in ædibus viuunt, re nulla, quæ homines in terram deprimat, distracti: apud hos neq; aurum est, neque aliud quodpiam metallum, sed neque vestis alicuius propria, neque rerum aliquarum quidquam, quod ventrem demulceat: quod namq; hodie *τρίβανον*. id est pallium, hic fert, eo cras alium indutum conspicias, adeò vt vnus vestem vnâ omnium, & rursus omnium vnus esse putes. Omnibus autem communis proponitur mensa, communes itidem eis sunt ad Deum supplicationes & preces, quas interdium, & sæpè etiam nocte tota, cum timore, habitu, statuque corporis, submissee peragunt. Hæc Nicephorus. Et si autem nullibi inueniatur, vt clerici primitiue Ecclesiæ, ad tempora S. Augustini vsque expressè profiterentur; multa tamen, inquit Angelicus Doctor, per Apostolos facta fuerunt, quæ non reperiuntur scripta. Et Distinct: 38. Artic: 2. qu. 3. arguit: Quod antequam essent hæ Regulæ quæ nunc sunt, erat aliquis modus viuendi ab Ecclesia probatus, quo aliqui ad tria essentialia se obligabant, & tunc temporis obli-

gatio

gatio ad talem modum idem operabatur, quod nunc obligatio ad certam Regulam. Additque, hunc modū viuendī perfectioni congruum, fuisse apud primos credentes in Iudæa, maximè verò Hierosolymis sub Apostolis. Ex quo principio, veluti limpidissimo fonte, sacrum hunc riuium, Ordinem, nempè, Canonicoꝝ SS. Sepulchri Hierosolymis primum profluxisse constat.

Primorum
Christianorum
religionem & Religioſorum
hominum ritus.
Phil: Iudæ?
prolixè recē
set apud Io
seph de Bel
lo Iudaico
Lib: 2. c. 2.

CAPVT SECVNDVM.

Grauiſſimorum ſcriptorum luculentis authoritatibus comprobatur; Canonicos Hierosolymitanos, ab ipsis Apostolis originem trahere; Et à loco principali SS. Sepulchri meritò tali nomine appellari.

NOlo, quamuis mihi facultas ſuppetat, ſermonē protrahere, in antiquorum Historicorum varijs monumētis recensendis, qui vno ore teſtantur; vetuſtiſſimum ſemper fuiſſe Ordinem Canonicoꝝ Hierosolymitanorum, Sanctiſſimumque eorum Ducem & authorem fuiſſe D. Iacobum Apoſtolum, eumque penes illam Eccleſiam, quam Apoſtoli ex Cænaculo in domum Orationis conſecraſſe traduntur, ſimul cum illis cohabitari: ſufficiat mihi nonnullos poſterioris temporis autores comemorari. Occurrit autem in primis in comprobationem rei aſſertæ, irre-

Iacobus de
Viatriaco
Historia Hierosolymitana
abbreuiata
c. 61.

fragabilis authoritas grauissimi viri D. Iacobi de Viatriaco, primū in terra Sancta Legati, postea Aconensis Episcopi, tandem Patriarchæ Hierosolymitani & S. R. E. Cardinalis: qui præclaram narrationem de antiquitate & prærogatiua Canonicoꝝ SS. Sepulchri Dñi instituens; illorum originem à D. Iacobo Apostolo primo Episcopo Hierosolymitano, qui per tica percussus, martyrio transiit ad Dominum, profectam affirmat, eosq; primitus sub Patriarcha constitutos fuisse docet. Quos deinceps à temporibus Constantin Magni, ad præstantissimam à se miro opere fabricatam Dominicæ Resurrectionis Ecclesiam institutos, ibidem sedem suam habuisse, & in ea Diuina mysteria exercuisse ostendit. *In quo loco, ait, corpus Domini preciosum, cum aromatibus honorifice sepultum, vsque in diem tertium requieuit, die autem tertia resurrexit. In quo loco sancti Angeli mulieribus apparuerunt; Milites autem Sepulchrum custodientes, veluti mortui effecti sunt. In quo etiam loco, nocte Dominicæ Resurrectionis, ignis sacer descendit de supernis. Cum autem (inquit idem author) per vniuersum mundum à fidelibus dicatur: Surrexit Dominus de sepulchro qui pro nobis pependit in ligno, soli Canonici Resurrectionis Dominicæ, speciali gaudent prærogatiua dicentes, & ad oculum demonstrationem facientes. Surrexit Dominus de*

hoc

hoc sepulchro. Similiter in Euangelio Paschali cum dicitur. Surrexit non est hic. Diaconus qui legit Euangelium, digito demonstrat Dominicam sepulturam. Ita Cardinalis Vitriacus de Canonicis sancti Sepulchri.

Huius auctoritatem per omnia fulcit, atq; confirmat, Ioannes Nauclerus Præpositus Tubingensis: qui primordia huius sacri Ordinis etiam ad D. Iacobum Apostolum referens, iugem & continuam successionem Episcoporum Hierosolymitanorum, Almi Ordinis (vt eius verbis loquar) Præsidium, satis dilucidè enarrat. *Cum Sanctorum, inquit, Patrum instituta comemoro, minime negligenda videtur Cruciferorū pietas, & antiquitate & viuendi ratione venerabilis. Ex Hierosolymitana Ecclesia originem illi ducere dicuntur; Cuius quoniam sæpe status est immutatus, breuiter Præsides recensebo, in hæc fere tempora, postquam iterum à Godefrido Ecclesie Canonici institui sunt. Statimq; seriem Pontificum Hierosolymitanorum (quod etiam nos suo loco faciemus) debito ordine perstringit. Idem quoque author paulò inferius sic habet: Ex Hierosolimis quatuor Ordines Cruciferorum originem duxerunt: Ordo Canoniconum Sepulchri Domini, qui sub Patriarcha erat. Ordo militie S. Ioannis, qui nunc Rhodiorum.*

Naucletus
Chrono-vo-
lumine do
Generat. 37.
fol. 89.

300 1111

Syluester
Marulus in
Mari Ocea-
no omnium
ordinum de
Cōgreg. Ca-
nicor. Regu.
SS. Sepul:
Hierosol. ap-
pellatorum.

*Ordo Templariorum. Ordo Theutonicorum. Pri-
mi, inquit, à Beato Iacobo Alphai, Fratre Do-
mini, se gloriantur originem ducere. Hi deferunt
in veste Clericali rubeam de serico crucem duplicem,
& viuunt sub Regula sancti Augustini. Hæc Nau-
clerus. Ioannes Lucidus in tractatu de Religionibus,
ideo Canonicos Hierosolymitanos Crucigeros ap-
pellatos censet, quod insignia eiusdem formæ, cuius
S. Crux Hierosolymis cernebatur, quasi pignus cæle-
ste, & pretij inestimabilis signum, ad pectus pâ-
lam præseferebant. His adstipulatur Syluester Ma-
rulus, vir in perscrutandis omnium pene Religiosarû
familiarum primordijs facile princeps; qui florentissi-
mum olim dicti Ordinis statum, in libro quem Ma-
re Oceanum omnium Ordinum inscripsit, prolixè de-
scribens hæc subiungit: *Nec mirum hanc Religio-
nem, in illis partibus Palestine mirabiliter floruisse,
si quidem ibi suam habuit institutionem ab Aposto-
lis, præsertim à Beato Apostolo Iacobo Minore.*
Et ne quis hunc ordinem, cum Lateranensi confunde-
re velit, eximit hunc scrupulum omnibus idem author
cum ait: *Quod autem hæc Congregatio Canonico-
rum Regularium sancti Augustini Sepulchri Do-
mini sit distincta, & differens à Congregatione La-
teranensi, ex eo manifestum est. Quandoquidem**

isti co-

isti cognominantur Canonici Regulares SS. Sepulchri Hierosolymitani, illi autem Canonici Regulares Lateranenses. Secundo; Quia distinctum deferunt habitum, & multum inter se differentem, si quidem illi Sepulchri sancti, deferunt vestitum nigrum, & supra Rochetam Mantiletum eiusdem coloris, in cuius parte sinistra Cruces rubeas, in memoriam Sacratissimæ Passionis Dominicæ deferunt: illi vero longè ab his diuersum. Cuius viri quanta sit in conscribendis sacris ordinibus, apud omnes, præcipue viros doctos autoritas, ita notum est, vt eius testimonio tuto quisque acquiescere possit. Consentire his videtur Basilius Serenius Mediolanensis, qui de institutione Ordinum Militarium, S. Ioannis, & S. Iacobi Compostellani verba faciens; hos non à quopiā alio, præterquam ab ipsis Clericis Canonicis, Domini Sepulchri Custodibus, principaliter institutos recenset, dum ait: *Ipsi Clerici Canonici Domini Sepulchri custodes, iam ab initio deputati, non solum ex Apostolica institutione, vt ex Decreto S. Clementis Martyris patet; sed ex restitutione Godefredi ac Balduini Bullioneorum, vt ex Bullis Pontificijs constat, & ex eis assumptus Patriarcha, tales, id est, Ordines Militares, ad peregrinorum presidium instituerunt, quos candida lineaque cruce, veluti super*

Basilius Serenius Assertione pro Regula S. Aug. Hyponen: Clericis tradita fol: 57. & 58.

pellicei

pellicei eorum particula consignarunt, cappaq; capitulari lanea nigra, exterioribus eorum paludamentis haud absimili, additis Dominica passionis & redemptionis nostræ mysterijs, seu instrumentis, quæ sunt gloriosi Sepulchri trophæa eos inuestierunt, Apostolicâ illis sanctissimi Patris Regulam seruandam imponentes. Sic Basilius Serenius. Vbi breui compendio, quasi vno fasce plura colligauit; nam & antiquitatem Canonorum sancti Sepulchri lucidissimè exprelsit, dum illos è primæua institutione Apostolica Hierosolymis constituisse ait: & prærogatiuam: quod ex eis Patriarcha assumebatur: & quod soli ipsi Canonici SS. Sepulchri, Ordines Militares, ad securitatem Peregrinorû, primûm Hierosolymis instituisse censeantur, illosque habitu, quo ipsi peculiariter utebantur, & Regula quam profitebantur, impertiri voluerunt. Hic quoque Author, ambas istas congregationes, Canonicos nempe sancti Sepulchri, cum Canonicis Lateranensibus (qui nunc vſitatiore vocabulo S. Saluatoris appellantur) arctiori necessitudinis glutine compingere volens, & in vnum quasi corpus redigere; asserit hos peculiari quadam affinitate, & propinquitate, ipsis Augustinianis Clericis copulari. nō solum obedientia Regulæ, sed vel vnione, vel etiam institutione primæua; ita vt ex Lateranensibus & Sepulchri Domini Canonicis, vna resultet Religio.

Non deiunt aliorum grauissimorum authorum, clarissima de antiquitate & prærogatiua almi huius Ordinis testimonia, in quibus recensendis, ne prolixior, quam par est, videar, satis erit aliorum nomina saltem hic indicare. Hi verò sunt: Vilhelinus Tyrius, Tyri Archiepiscopus historia de Bello sacro. Raimundus de Agiles Canonicus Podiensis in Historia Francorū qui receperunt Hierusalem. Albertus Aquensis Ecclesiæ Canonicus & Custos, de Passagio, Godefredi de Bullione, & aliorum principum Libr: sexto. Fulcherus Carnotensis in gestis peregrinantium Francorum sub Anno 1099. f. 399. Marinus Sanutus Secretorū fidelium Crucis l. 3. Christianus Adrichomius in Theatro Terræ sanctæ Ioannes Bap: Signius de statu & ordine Canonic lib: 1. c. 10. Orator Terræ sanctæ Philippica secunda, & in supplemento concionum promiscuarum recenter Anno 1623. editarum, f. 249. dum causas amissæ Terræ sanctæ recenset. Et alij quam plures, qui eadem penè de instituto Canonicorū S. Sepulchri allegant: vnde ad vitandum repetitionis odiosæ tedium, non duximus necessarium eorum verba recitare. Adhæc antiquus mos inoleuit, sæpè Religiones appellationem desumi solere, à loco vnde originem duxerunt, & in quo eorum institutum primitus noscitur esse obseruatum, atque in reliquas mundi partes deriuatum. Sic Ordo Cisterciensis à Cistercio, Carthusiæ: à Carthusio, Carmelitarum à monte Carmeli, Canonicorū S. Saluatoris, à loco & sacello huius tituli, quod

Hic suā Historiam de sacro Bello Latinorum contra Turcas & Saracenos 84 An nos complectentem ab An: Christi 1100. vsque ad Annum 1084. profequitur. Scripsit Historiā Orientaliū An: 570. Acta Synodi Later. & alia quædam. Octogenariū obiisse Anno 1219. Heroldus & Genebrad. lib. 4. tradunt.

Signius l. 2.
f. 207. Privil.
Greg : XII.

eis primitus ad habitandum collatum fuit, quemadmodum notat Signius, nomenclaturam suam mutauerunt, Pari ratione, cum hæc sancta Religio Canoniorum atq; Custodum SS. Sepulchri Domini Hierosolymitani nuncupetur, manifestum perinde est, hanc appellationem non aliunde ei conuenire, nisi quod Hierosolymis ad Sancti Redemptoris nostri Sepulchrum, initium & progressum suum habuisse, templumque ipsum & Patriarchalem sedem, longissimo tempore sub sua cura retinuisse, noscatur. Sed heu aduerso reflante vento, ut nulla sub sole longi temporis felicitas, feritate barbarica Asiaticis undiq; occupatis Proinciis, ipse etiam nobilissimus Ordo, qui ceteris altius in Terra sancta eminebat, cum aliis præclarissimis religiosis Ordinibus, quorum ibi frequentia erat, immani Turcarum rabie in toto Oriente funditus absorptus est. Constabiliunt præterea eandem veritatem, sacra Max: Pontificum rescripta atq; diplomata, quarum authentica documeta suo loco a nobis producuntur. Semel dicam: Quicquid de Clericis Hierosolymitanis uspiam habetur, inter priscorum & recetium monumenta, totum ad huius temporis Canonicos, qui Custodum Sepulchri Dñi Hierosolymitani nomine censentur, pertinere dignoscitur; potissimum verò ad Conuentum Miechouië: qui caput Ordinis nunc est, & qui originis lineam continuata successione, à memoratis clericis Hierosolymitanis ducere, atq; deriuare euidenter probare potest, prout inferius patebit.

CAPVT TERTIVM.

Clericorum nomine Ecclesiæ primitiua ipsos Regulares Canonicos designari, eosque antiquitate, quosuis Clericos & Religiosos antecellere, & cur aliquando Monachorum nomine censeantur?

CAnonicorum Regularium nomen in primitiua Ecclesia minimè fuisse in vfu, vetera Ecclesiastica scripta testantur. Nā simpliciter Clerici, quasi in sortem Domini electi vulgò dicti reperiuntur. Cleros enim græcè, fors dicitur Latinè; quibus tale nomē impositum ab Apostolis fuisse, narrat Ioannes de Nigra valle S. R. Ecclesiæ Bibliothecarius, eo quòd ob terrenorum renunciationem in sortem Domini fuerunt assumpti. Vnde primum ordo Clericalis, & de hinc Canonicus in Ecclesia nomen sumpsit, vt hic ad illum referatur, tanquam sua species ad genus. Primum autem Canonicorum nomen, in Decretis à D. Gregorio promulgatis, prodijisse, refert Signius, interpretariq; debere Canonicum, quasi Fratrum Clericum; hoc est, in Canonij sub fraternitate aggregatum, censet. Ex quo ritè Canonicos Regulares, Fratres ab antiquis prænominatos legimus, quemadmodum id clarè patet ex decreto S. Clementis Martyris, B. Petri Principis Apostolorum discipuli & successoris, qui ad suos conclericos Hierosolymitanos scribens, Fratrum nomine illos compellat. *Hortamur, inquit, Fra-*

Ioannes de
Nigra Valle
Epilogo
Cronicæ: 13.
c. 18. vbi de
Ordinib. si-
ue varijs Re-
ligionibus
tractionem
instruit.
De Origine
& statu Ca-
nonic. lib. 1.
cap. 2.

Decretum
Clemen: 12.
q. 1. cap. Di-
lectissimis.

gijs, ne deformaretur status Ecclesie uniuersalis. Quæ enim maior deformitas accidere potuisset, quam si tot populi passim & ubique pro sua necessitate vel etiam commoditate Sacramentorum & Euangelij ministros non habuissent, hinc sane tota Christianorum turbatio & perichlitatio foret.

Canonicos item sæculares esse voluit, & Clericorum aliquos eius mixti generis, hoc nomine decorauit, precipuè illorū virtutis reuerendæ gratia, & ipsismet noui Clericorum status, dignitatis ampliandæ causâ, vt dentur in illis etiam aliqui gradus & tituli maioris honoris, quorum intuitu animos ad res præclarè gerendas acrius excitaret. Importatque in illis hoc nomen Canonici, non quidem expressum eius significatum, quod propriè conuenit Canonicis Regularibus, at præminentiam quandam, & meritorū debitam recognitionem. Verumtamen in suos primogenitos magis affecta semper atque intenta mater Ecclesia, nusquam eorum confirmationem, atque reformationem intermissit, omnesque quotidie inuitat ad perfectionem. Vnde summi Pontifices (inquit Ioannes de Nigra Valle) in sacris Conciliis ordinauerunt, vt ad differentiâ istorum illi Clerici, qui sub Apostolica professione regulare vitam seruauerunt & seruaret, non Canonici simpliciter siue Clerici, sed Regulares Canonici appellaretur, ab Apostolicæ regulæ professione & obseruantia. Docet præterea idem Ioannes,

S. R. E. Bibliothecarius, quòd Canonici regulares, cedunt Canonicis sæcularibus & Clericis quandoque in locis publicis, non ratione dignitatis seu antiquitatis, sed ratione capitis eorum dignioris, quod est Episcopus; & ratione dignitatis Ecclesiæ ipsorum, si est Ecclesia Cathedralis. Reliqui verò Clerici, siue Canonici Ecclesiarum Collegiatarum vel Parochialium, cedat ipsis Canonicis Regularibus, in omnibus locis publicis, ratione antiquitatis: quia ipsi sæculares Clerici à regularibus originem habuerunt, qui relicta vitæ perfectione, ceperunt cū dispensatione Ecclesiæ, absq; Apostolica paupertate in sæculo viuere. Et hoc patet Romæ per antiquam consuetudinem, & Apostolicas ordinationes, vbi Canonici Regulares in Processionibus & Litanis, maximè Ecclesiarum Parochialium, præponuntur omnibus Clericis & Canonicis sæcularibus. Adhæc nota, quòd nonnunquam ipsi Canonici Regulares dicuntur Monachi, sed improprie. Primò propterea, quòd Monasteria habitant in communi & vnitate viuentes: vnde sicut Monasterium ab vnitatem dicitur, sic & Canonici sæpè Monachi appellatur, quasi per communem vitam simul vniti. Propterea etiam Religiosi, monasteria inhabitantes, Monachi appellantur, licet proprie non sint Monachi. Monachi etiam dicuntur sæpenumerò ipsi Canonici à vita solitaria, quam extra vrbes multoties eligunt, sicut de multis Canonicorum coenobiis patet, quæ extra ciuitates & hominum frequentias sita sunt. Et multis præterea in

locis & historiis, ipsi Regulares Canonici, quãdoq; Clerici, quandoq; Presbyteri, quia originaliter in eis & principaliter viguit Ordo presbyteralis, à Christo & Apostolis institutus, prout iam superius deduximus, quandoque etiam Monachi appellantur.

CAPVT QVARTVM.

Canonici sancti Sepulchri cur plerumque Fratrum nomine indignantur; quod Prænomen, ne cui contemptibile videatur, dignitas eius declaratur.

FRanciscus Gratianus in suo Compendio iuris Canonici, prout notat Marulus, discrimen & differentiam inter Canonicos sancti Sepulchri, & Canonicos Lateranenses statuens, illos vulgo nuncupari Fratres Dominici Sepulchri; istos verò Canonicos Lateranenses affirmat. Quæ denominatio, quoniam parum quibusdam apta eminentiæ Canonicoꝝ videtur, ac nimiũ contemptibilis; conuenientiam, dignitatem, atque excellentiam, qua Fratris prænomine, ac Fratru denominatione omnes Canonici Regulares diutina publica ac rationabili cõsuetudine, & magnorum virorũ Deiq; autoritate censentur, sacre scripturæ rationib; per omnia suffulti, ex mente Ioannis Signij Bononiensis, ostendere opere precium duximus. Ac verò in primis, qui sacras Testamenti veteris ac noui scripturas legit, passim Fratris & Fratru ibi nomen inueniri facile concedet: non ad naturã ex eisdem tantum paren-

Marci Oce-
num omniũ
Ordinum
Syluestri
Maruli.

Signius de
Ordine Ca-
nonic: lib: 2.
cap: 5.

Matth: 23.

Matth: 28.

Ioan: 20.
Ioan: ult.

tibus, aut cognationem denotandam, vel gentem, sed etiam ad eiusdem religionis, & operum affectuumque similitudinem significandam. Quod olim etiam à D. Hieronymo contra Heluidium, de perpetua virginitate S. Deiparæ Mariæ notatum est. Sic natura fratres Abel & Cain, Iacob & Esau, Petrus & Andreas, Iacobus & Ioannes: sic Abraham & Loth, Iacob & Laban, fratres cognatione: sic omnes de vno Hæbreorū populo, inter se fratres dicti sunt. Sic religionis & ceremoniarum communione, affectuq; pari Deum colentes, ex omni quæ sub cælo est natione, semper Fratres perquam rationabiliter dicti fuere. Sic autoritate suprema, cælestis magistri Domini nostri IESV Christi, docemur; qui discipulis suis dixit: *Omnes vos Fratres estis, unus est enim Pater vester, qui in celis est.* Proinde fideles omnes in primitiua Ecclesia, ubiq; Fratres cognominabantur per lauacrum regenerationis in Baptismo. Et sæpius discipuli seipsos inuicem, & ipse Dominus IESVS eosdem appellabat Fratres. *Ite, inquit, nunciate Fratribus meis, ut eant in Galileam.* Et alibi. *Vade ad Fratres meos, & dic eis, ascendo ad Patrem meum.* Alio quoq; in loco; *Exiit sermo iste inter Fratres:* hoc est, ad Christianos ceteros, & quod illic erat dictū paucis audientibus, id serpsit ad plures vulgante fama. Et in Euāgelio Matth: 2. *Quicumq; fecerit voluntatem Patris mei, qui in celis*

est, ipse

est, ipse frater, soror, & mater mea est. Item capite 5. Si recordatus fueris, quod frater tuus habet aliquid aduersum te, vade reconcilia fratri tuo. Et capite 18. Si peccauerit in te Frater tuus. & infra; Lucratus fueris fratrem tuum. Item eodē cap. Quoties in me peccauerit Frater meus, & dimittam ei, dixit Petrus. Sic & Pater meus celestis faciet vobis, dixit Iesus, si nō remiseritis vnusquisq; fratri suo de cordib. vestris. Sufficere possunt abundē suprascripta Domini IESU Christi de suis sanctis Euāgeliis producta testimonia, quibus euidenter Fratris & Fratrum nomine denotātur ij, qui affectu cultuq; simili Deo inhærebant. Verū ad maiorem huius prænominis declarationem, veterum quoque Ecclesiæ scriptorum authoritates in medium proferendæ occurrunt, potissimū per antiqui Septimi Flori Tertulliani, qui circa annum Dñi 160 vixit: is enim eorundem temporum secutus morem, Christianos vocat Fratres, vt ex primo eius aduersus Marcionem libro patet, vbi ait: *Compositionē hanc quoq; nondum exemplarijs suffectam, fraude tunc Fratris de hinc Apostata amisi*: Hic, vt notat D. Rhenanus, Fratrem vocat Christianum. Et de Corona Militis in principio ita scribit: *Adhibetur illic magis Dei miles ceteris constantior Fratribus*: hoc est Christianis. Idem quoque in Apologetico aduersus gentes, hoc ipsum euidentius asserit, & defendit,

Proprietas
dirimit Fra-
ternitatem.

inquiens: Sed quod Fratres nos vocamus, non alias opinor insaniant, quam quod apud ipsos omne sanguinis nomen, de affectione simulatum est; Fratres etiam vestri sumus, iure nature, matris unius, & si parum homines vos, quia mali fratres. At quanto dignius fratres dicuntur & habentur, qui unum Patrem Deum agnoscunt, qui unum spiritum biberunt sanctitatis, qui de uno utero ignorantie eiusdem, ad unā lucem expirauerunt veritatis? Sed fortasse minus legitimi existimamur, quia nulla de nostra fraternitate tragedia exclamat, vel quia ex substantia familiari Fratres sumus, quæ penes vos fere dirimit Fraternitatem. Itaque qui animo animaq; miscemur, nihil de rei communicatione dubitamus: Omnia indiscreta sunt apud nos, præter uxores, illo loco consortium soluimus. Hæc Tertullianus. Lactantius quoque Firmianus lib: 5. Diuinarum institutionum cap. 16. Nec alia, inquit, causa est, cur nobis inuicem fratrum nomen impertiamur, nisi quia pares nos esse credimus. Extant & aliorum veterum scriptorum clarissimæ hac de re authoritates, qui vno omnes fatentur ore, vniuersos Christianos, ad sua vique tempora appellatos esse Fratres. Verum posteaquam familiaris substantia, particulariter cepit vsur-

pari, discretæque proprietate possideri, à Christianis quæ sua sunt quærentibus, ad latiorẽque licentiam defluentibus, Fratrum quoq; nomen apud eos paulatim caput obsolescere, & Christiano tantum nomine, quod titulum gratiæ & salutis habet, satisque etiãnum decoris esse contenti, Fratrum verò nomen illis reliquerunt, faciliuẽ quodam confirmationis modo concesserunt, qui Diuino sese cultui, & sua omnia, cõmunibus Fratrum vsibus, dedicarunt, qui indiuiduum substantiæ consortium tenuerunt, & ad Diuinæ Monadis vnitatem aspirauẽre: vt fieret ex multorum animis vna mentis & voluntatis consensio. Quorum propositum, sanctissimumque institutum, & consummata vitæ virtutumq; exempla antiqui Canonici vt-cunq; secuti, cum vera fraternitatis communione, Fratrum nomen celebre, sanctum, gratiosumq; nunquã abominati sunt. Illud enim ad gloriã magnam, nominibus suis propriis, quo velut splendore gauderent, humilitatis suæ tenebras illustrari, vertentes in præ-nomen, rationabili semper dignitate præposuerunt; constantique proposito voluerunt Fratrum prænomi-ne pio, sancto, celebri, atq; antiquo, humiliter in Christo gloriari. Retinuerunt perinde Canonici SS. Sepul-chri antiquam fraternitatis originem veram, quæ prius fuerat Hierosolymis instituta; quavẽ nomenclatura vsus est Christus & Apostoli eius. Nihil itaq; nobilius eo titulo seu prænomine, quod à Christo Dom no Apostolis suis inditum, & inter fideles primitiæ Ec-

clesiæ usurpatum, ad hæc usque tempora incorrupte sub omni obseruantia, ab Ordine nostro custoditum fuit. Nam & Pont: Maximi Cardinalium cœtum Fratrum nomine compellant. Et D. August: in suo Speculo seu Regula, quam nos profitemur, cōmilitones suos passim Fratrum nomine compellat. Idem referens illa verba Psal: 132. Ecce quàm bonum, & quàm iucundum habitare fratres in vnum. *Ista, inquit, verba psalterij, iste dulcis sonus, ista suavis melodia, tam in cantico quàm intellectu, etiam monasteria peperit; ad hunc sonum excitati sunt Fratres, qui habitare in vnum concupierunt. Iste versus fuit turba ipsorum, sonuit per orbem terrarum, & qui diuisi erant, congregati sunt in vnum, &c.* Et alio in loco eadem verba exponens ita inquit: *in vnum viuunt, ut vnum hominem faciant, & sit in illis ut scriptum est anima vna, & cor vnum, & multa quidem corpora, sed non multa corda.* Concludendo itaque cum Signio dicimus: Fratris prænomen esse quid generale, ad omnes Regulares; Canonicus verò est nomen speciale, declarans prærogatiuam atq; dignitatem inter ipsos Regulares. Quemadmodū enim in familijs & si multi sunt Fratres, magis tamen honorantur primogeniti, Doctores, Senatores & huiusmodi; Sic & in Religione, atque in domo Patris familias Domini nostri Iesu Christi, gradus honorum, & gratiarum assi-

gnantur

gnantur, his quidem superius, illis verò inferius. Non deessent nobis id genus mille testimonia, quibus non solum Ordinis nostri professos, sed singulos ferè Regulares Canonicos, in diuersis monasterijs constitutos, huiusmodi prænominē notari debere demonstraremus, nisi iam scirem, in re notissima me fuisse longiorem quam oportuerit.

CAPVT QVINTVM.

De habitu Canoniorum Hierosolymitanorum.

DE priscorum Clericorum Hierosolymitanorum, illorum præsertim qui tempore cræ persecutionis Hierosolymis manebant, cultu & habitu difficilè est quicquam certi statuere, neque enim erat tunc ea quam nunc tenemus, Religionis forma: Sed erat cætus Deo consecratorum hominum, qui postpositis terrenis (quemadmodum superius attigimus) vitam omnem, in Deo præando ac propitiando, ex institutione Apostolica consumebant, ideo minùs illis curæ erat exquisitus & peculiaris vestitus. Cum Apostolo potius sentienda est, circuissè illos in melotis, in pellibus caprinis egentes, angustiatos, afflictos, quibus dignus non erat mundus. Posteriori demum sæculo, discretionem habituum fuisse ab Ecclesia institutam, & unicuique Religioni assignatam legimus, ut eo facilius à populo, cuius propositi sit ge-

Ad Hebr:
cap: 11.

Petrus Co-
tonus de ve-
stitu Religi-
osorum li. 3.
cap. 27.

1. Concil :
Nicani Ca-
non, 16.
Arabico.

Ioan: de Ni-
gra Valle in
Epilogo
Cronic. c. 18
Signius de
ordine Ca-
nonico li. 3.
cap. 4.

Barb. Anal:
Eccl. 16: 4.

stans, & in qua professione Deo militet, dignoscatur, & officij dignitatisq; sue admoneatur. Petrus Cotonus in sua institutione Catholica, Nicœni primi Concilij Decreto, primum promulgatum fuisse narrat, vt Clericorum & Religiosorum vestimenta deinceps à culta laicorum distinguerentur. Diuus verò Athanasius Tractatu de Virginitate: Qua materia, forma, & colore constare debeant, diligenter explicat. Volunt nonnulli, veteres illos Apostolicos Clericos ad instar Sacerdotum & Leuitarum veteris Testamenti, Ephod lineo vti consueuisse; illud Exodi c. 28. & 29 allegantes. Quod Deus Opt. Max. præcepit Moyse & sapientibus populi, vt faciant vestes Aaroni, in quibus sanctificatis ministret sibi, inter quas præcipua est linea, sic namq; mandauit: *Porro filijs Aaron tunicas lineas parabi, vestiesq; eis omnibus Aaron Fratrem suum, & filios eius cum eo.* Sed hoc intelligi debere non promiscuè alibus vsos fuisse, sed tum temporis tantum, quoties ad Diuina celebranda accedendum erat. Ideo additum est, *in quibus sanctificatis ministret mihi.* Neque ne illud latet de D. Iacobo Fratre Domini, primo & principali Hierarcha Ecclesię Hierosolymitanę, eum syndone superamictum, seu lineis solere incedere, cum longe dispari cultu sui Clerici, teste Baronio incederent. Talem enim ad demonstrandum illorum vestitum de Anastasio custode thesauri, (qui postea in Episcopum eiusdem Ecclesię ordinatus

fuit

fuit) ex scriptis Cyrilli Monachi inducit Historiam. Euthimium, inquit, videre valde desiderabat Anastasius, cuius fidei credita erat custodia sacrorum vasorum sanctæ Resurrectionis Ecclesiæ; cum ergo teneretur tanto eius videndi desiderio. Phido Ioppes Episcopo & Cosmæ cuius munus erat custodire Crucē, illam pulchram communicat cupiditatem, cumq; eos assumpsisset, simul cum eis proficiscitur ad magnum Euthimium. Postquam verò fuerunt propè Laurā, ab aliis quidem, cum nondum peruenisset ignorabatur; Eutymio verò arcano quodam modo aperuit spiritus. Cum verò statim vocasset Laurā Oeconomum Chrisippum; Sint, inquit, tibi parata, quæ sunt ad recipiendum hospites necessaria, ecce enim simul, cum fratre suo ad nos venit etiam Patriarcha. Cum autem ipsi iam aduenissent, Diuiniore quadam contemplatione magnus correptus Euthymius, colloquebatur & differebat cum Anastasio, tanquam cum Patriarcha Hierosolymitano. Atq; qui aderant quidem omnes admirabantur, Chrisippus quoq; ipse obstupefactus, ad aurem se inclinans Euthimij; Sed nō est, inquit, apud nos Patriarcha, o venerande Pater, hic enim est sacrorum vasorum custos Anastasius,

Extant apud
Surium die
10 Ianuar.

vides

Baro: Eccl:
Anal. Tō: 6.
Anno, 458.
fol: 313.
Episcoporu
Hierosoli-
mitanorum.
vilis vestit?

Baro: Anal.
Tō: 2. Anno
Chr: 261. c.
42. f. 711.

vides quisnā sit eius vestitus? Ostendens eius vestes, ea autem erāt splendida & serica, quas quidē, inquit, non est fas Hierosolymitanū Patriarcham induere.

Ad imitationē enim, inquit Baronius, primi eius Ecclesiæ Episcopi, qui syndonē tantum induebatur, sancti Iacobi fratris Dñi, & ipsius Domini in eo loco crucifixi memoriam, factum est, vt Hierosolymitani Episcopi, haud circūspectē vestiti incederent, sed viliori habitu, quam illius Ecclesiæ Clerici, qui sericis etiam, vt vides, utebantur indumētis. Hæc Baronius. Ex quibus facile est coniectura assequi, non vilem fuisse priscorum Canonorum sancti Sepulchri ornatum, honestum tamen pietatiq; & sanctimonix congruentem. Recenset & in alio loco idem Baronius, in Orientali Ecclesia eam consuetudinem viguisse, vt Episcopi & Clerici super tunicam Birro induerentur, idq; citato ex Palladio exemplo, de S. Athanasio Alexandrino Episcopo, eum tunica birroq; vestitum secessisse; idēq; meminisse & D. Greg: Turonensem de S. Britio refert: *Qui ardentis prunas in birro suo posuit, ad declarandam sui animi innocentiam*, Cuius vestimenti facit celebrem mentionem Diuus Augustinus cum dicit: *Offeratur mihi Birrū pretiosum, (nam vile & pretiosum pro qualitate personarum fuisse constat, & pretioso Episcopos vti solitos) forte decet Episcopum, quamuis non deceat Augustinum, id est hominem*

paupe-

pauperem, de pauperibus natum. Hæc ille. Birrum
 verò genus fuisse vestimenti, quo cætera omnia coo-
 periuntur, notat Signius. Afferitque D. Augustinum
 non aliud nomine Birri nuncupare, præterquam cap-
 pam cum lato caputio, clausaque ab imo supra mediū
 parte anteriori, ad eam, inquit, formam, qua nunc
 gestant Cappas suas amplissimi Patres Orthodoxi; re-
 censeretque antiquos Canonicos Rhenanos, antequam
 nouo habitu lineo à Gregorio Duodecimo donaren-
 tur, & titulo Congregationis sancti Saluatoris insigni-
 rentur; tali Cappa nigra vsos fuisse, vti nunc etiam,
 inquit, apparet in tabulis quibusdam Monasterij Bo-
 noniensis, in quibus aliqui ex ipsis antiquis Canonicis
 repræsentantur. Multum siquidem valere, viri etiam
 doctissimi censent, ad sincerè iudicandum statuendū-
 que de rebus antiquis auctoritatem imaginum picta-
 rum sculptarū. Hoc ipsum comprobat Carolus Si-
 gonius lib: 4. de Episcopis Bononiensib. cum dicit:
*Singulis Canonicis per noua toga facienda, videnos
 florenos tribui solitos, &c.* Huiusmodi habitu olim
 vestitos Canonicos Sepulchri Domini, Poloniam ex-
 cepisse, Ioannes Długossus, in libro quem de Mona-
 sterijs per Dioecesim Cracouiensem constitutis elabo-
 rauit, memoriæ prodidit. Sic enim habitum præde-
 cessorum nostrorum describit: *Notandum est, in-
 quit, & pro memoria futurorum scribendum, quia
 Religio sancti Sepulchri Domini Hierosolymitani,*

Signius de
 Ordine &
 Statu Cano-
 nico lib: 3.
 fol. 259.

sub Regula B. Augustini militans, habebat priscis temporibus, habitum valde elongatum, & à moderno longè diuersum ac religiosum. Singuli enim Fratres professi Ordinis prædicti, incedebant ad instar Fratrum Ordinis sancti Benedicti, tunica nigra, Cappa superimposita, duabus Crucibus rubeis signata. Hæc Dlugossius. Eorum formam & figuram multæ imagines in altaribus & fenestris depictæ, etiamnum in Conuentibus nostris lucidè nobis exhibent. Simile quoque scriptum reperi in quodam libro de omni scibili intitulato, in refertissima Bibliotheca Academiæ Cracouiensis; vbi id habetur: Sepulchri Domini Custodes sunt Monachi sub Regula S. Augustini militantes, cum mantiletis nigris ab antepertis, & Crucibus rubeis per lineam transversalem conduplicatis in pectore. Ideo dicti Custodes Sepulchri Dominici, quia eis olim erat concessa custodia Sepulchri Christi, sed post traditionem Hierusalem Mahomet iniquo, eiecti sunt de loco, & Ordo mansit: hæc ibi. Quod si quis ex eo Ordini nostro Canonico titulum monachatus obtrudat; respondet pro nobis Basilus Serenius Mediolanensis Canonicus Lateranensis: Nihil sapientum iudicium hac in parte morari, quibus compertum habetur Regulares Canonicos, sæpè Monachorum vocabulo notari, qui nem-

pe cum Clericali sollicitudine, monasticas obseruationes susceperunt, & qui se quoque monachorum exemplo in canobia retulerunt, vt ait Carolus Sigonius; Diuo Augustino de illis prædicante, quod profiteantur sanctitatem & Clericatum. Pro cuius confirmatione Nicolaus huius nominis Primus Summus Pontifex pronunciauit: *Non putamus, inquit, Religiosos Clericos à sanctorum Monachorū consortio seiungi debere.* Atq; proinde nec prædecessorum nostrorum Canonice professioni, Religiosam mansuetudinem obstare, imo potius maiorem exinde eminentiam ordini Canonico accedere, putandum est: satisfacit pro nobis & illa ratio Ioannis de Nigra Valle, superiori capite per nos adducta. Recentiori tandem ætate sicut in alijs obseruantijs, ita & in habitu quodammodo ordinem nostrum mutationem accepisse, & ad vniiformem aliorum Canoniorum Regularium habitum reuocatum fuisse constat. Nam qui per Italiam sparsi erant Canonici Ordinis nostri, Rochetum mantileto nigri coloris desuper addito, rubea Cruce à parte sinistra insignito, detulisse leguntur. Colligitur id inprimis ex literis Iacobi de Mansuetis, Episcopi Narniensis Canonicoꝝ SS. Sepulchri Dominici Prioris Generalis, qui pro eo tempore Perusij residentiam habuit, quarum authenticum exemplar extat in Archiuo Conuentus Miechouien: per omnia integrum atque illæsum. Vbi inter alia post declarationem Præ-

Cap: 3. in
fine.

positi Miechouiensis in perpetuum Ordinis Vicarium, dat ei omnimodam facultatem novos Canonicos faciendi, creandi, & instituendi, eisque Rochetū in signum Canoniciatus conferendi & largiendi, iuxta normam & exigentiam ordinis, de data Florentiæ decima octaua Maij, Pontificatus Eugenij Papæ quarti, Anno quarto. A Natiuitate verò Dñi 1434. Quam facultatem, à Generali Priore, Præposito Miechouiensi concessam, Leo Decimus Pontifex Maximus postea peculiari Bulla approbavit, in hunc qui sequitur modū.

Leo Episcopus seruus seruorum Dei, dilecto Filio, Præposito Præposituræ seu Domus Sepulchri Domini Hierosolymitani Miechouien: Ordinis S. Augustini Cracouien: Diæcesis, Salutem & Apostolicam benedictionem. Cum à nobis petitur quod iustum est & honestum, tam vigor æquitatis quam Ordo exigit rationis, ut id per sollicitudinem Officij nostri, ad debitum perducatur effectum. Exhibita sanè nobis nuper pro parte tua petitio continebat, quod alias tunc Prior Generalis domorum & Fratrum Domini Sepulchri Hierosolymitani, Ordinis S. Augustini, ex certa eius scientia, Vicariatus officium domorum & Canonicorum, Fratrum Domini Sepulchri huiusmodi in Polonia Maioris & Minoris, & Rusiæ Regnis consistentium, pro tempore existenti

Prepo-

Præposito, per se vel alium seu alios, quando & quoties sibi videretur expedire, dicti ordinis Domos, Prioratus & Ecclesias tunc in ipsis Regnis constructas & construendas, ac illorum personas, tam in capite quam membris visitandi & corrigendi ac puniendi, ac absque locorum Ordinariorum licentia electiones in locis sibi subiectis pro tempore factas approbandi, confirmandi, cassandi, & irritandi, ac domibus & locis Regnorum huiusmodi de personis idoneis providendi, ac eius autoritate loca & Canonicales portiones inibi erigendi, & de illis etiam providendi. Ac Rochetum Fratribus dicti ordinis in ipsis Regnis commorantibus pro tempore Canonicis, iuxta Regularia statuta eiusdem. Ordinis cõcedendi & tradendi, responsiones quascunq; Vicario pro tempore existenti, Domorum & Fratrum eorundem debitas & in futurum debendas petendi, exigendi, ac denegantes indebitè illas solvere, aliosq; quoscunq; eidem Præposito pro tempore existenti, ac eius monitis & mandatis non parentes excommunicandi, ac alijs sententijs censuris & penis innodandi, & si opus fuerit auxilium brachij secularis inuocandi, nec non de receptis quietandi & absoluedi, ac omnia singu-

*la & alia que pro tempore ipse Prior Generalis, tam
 sua ordinaria quam Apostolica auctoritatibus fa-
 cere & exercere possit, faciendi & exercendi concef-
 sit facultatem, eius desuper conscientiam oneran-
 do, prout in patentibus literis dicti Prioris Genera-
 lis desuper confectis plenius dicitur contineri: qua
 omnia à nobis Apostolico petijsti munimine roborari.
 Nos itaque, tuis in hac parte supplicationibus
 inclinati, concessionem, assignationem & faculta-
 tem predictas, sicuti ritè & providè processerunt &
 factæ sunt, auctoritate Apostolica confirmamus &
 presentis scripti patrociniocomuniuimus. Nulli ergo
 hominum liceat hanc paginam nostræ confirmatio-
 nis & communionis infringere, vel ei ausu teme-
 rario contraire. Si quis autem hoc attentare præ-
 sumpserit, indignationem omnipotentis Dei ac Bea-
 torum Petri & Pauli Apostolorum eius se noverit
 incursum. Datum Rome apud sanctum Petrũ,
 Anno Incarnationis Dominicæ 1520. tertio nonas
 Octobris, Pontificatus nostri Anno octauo. Colli-
 gitur etiam hoc ipsum ex superius iam allegato testi-
 monio Doctissimi viri Syluestri Maruli; Qui Cano-
 nicos Lateranenses à Canonicis Sepulchri Domini
 peculiari inter se habitu distingui recenset. Si quidem*

Canonicos sancti Sepulchri vestitu nigro, & supra
Rochetum Mantileto eiusdem coloris indui, in cuius
sinistra parte Cruces rubei coloris, & hoc quidem in
honorem & reuerentiam sanguinis ex vulneribus
preciosissimis Saluatoris nostri profusi deferri; Late-
ranenses verò longe dispari habitu vti consueuisse ait.
Quemadmodum enim, ait Iacobus Middendorpius,
diuersæ sodalitates varijque ordines pro naturæ ac
ingeniorum humanorum diuersitate extabant: Sic
etiam singulorum ferè ordinum authores atq; adeò
Maiores Ecclesiæ Christianæ ac Catholicæ religionis
primi fundatores, peculiarem habitum sacris homini-
bus constituerunt & præscripserunt. Si tamen placet
notari Canonicum Regularem ex vestitu lineo, etiã
hoc ex instituto & Priuilegijs Summorum Pontifi-
cum competere, Canonicis sancti Sepulchri facile v-
nusquisque agnoscat: verum cum huiusmodi habitus
peculiaris sit Episcoporum, proinde relicto Rocheto
solis supremis ordinis Præsidibus, cæteris ordinis fra-
tribus professis Mantiletum seu pallium, ad brachia
emittenda scissum, & cruce rubra insignitum, qui ma-
ximorum etiam Prælatorum habitus esse dignoscitur,
ex recenti ordinatione Gregorij XIII. Pont: Maximi,
ad petitionem Andreæ S. R. E. tituli S. Angeli, Cardi-
nalis Bathoræi, dicti Ordinis Præpositi Generalis, pro
habitu concessum & assignatum est. In signum tamen
Canonicæ professionis, circa solemnem trium voto-
rum emissionem, loco Rocheti, superpellicio seu ca-

misia Romana, caputio ex panno nigri coloris humeris imposito inuestiuntur, quibus indumentis in Processionibus, & aliis publicis functionibus, ex vi professionis uti solent, & ita in essentiali hac veste, cum reliquis Canonicis Regularibus concordant. Quamuis habitus discretionem, modò ille sit clericalis, parum vel nihil obistere canonicæ professioni, Basiliius Serenius, disserta sua argumentatione censeat, ait enim: *Quid est, inquit, quod Canonorum Regularium non unus notatur habitus? Nam quidam almutias in collo gerunt, alij Befas seu Becas in humeris, nonnulli pelles in brachio, ij albis supparis utuntur, illi nigris, violaceis, aut tinctis. Dico quod cum nihil super hoc per ipsum Doctorem cautum inueniatur, quilibet habitus Clericū decet, is etiam competit Canonico Regulari per se.* Hæc Serenius. Cæterū Clerici Hierosolymitani ex illo tempore quo Helena Augusta foemina lectissima, Crucem sanguine Saluatoris rubefactam inuenit, (ubi à Clero Ecclesiæ S. Sepulchri per nongentos circiter annos fuit studiosè conseruata) aperte hoc salutare signum rubei coloris in vestibus detulisse noscuntur; ut quod erat dedecoris & contumeliæ signum, id omnibus metallis ac gemmis longè præferendum, dilectis feruis eius honori esset & ornamento. D. Ioannes Chrysostomus demonstratione aduersus gentiles, refert, quāto honore suis tem-

Ioan. Lucius in Tra-
ctatu de Re-
ligionibus
Historia de
S. Cruce Ca-
rauacensi c.
5. fol. 17.

poribus

porib⁹ excipi & coli crux cōsueuisset, quodq; fuerit ad-
 umbrata in parietibus, inusta in ianuis, calata in va-
 sis, expressa in vestibus & in armis, inscripta in vo-
 luminibus, in marmoribus insculpta, erecta in foris
 & theatris, sparsa propè ubique & disseminata:
 hæc ille. Ut indè facillè sit coniectura assequi, olim
 venerandum istum habitum, signo crucis ornatum,
 incredibiliter ab hominib⁹ honorari, propter religio-
 nis & authorem & scopum, Christum nempe crucifi-
 xum. Quod si quis adhuc earum rerum, similiumq;ue
 originem curiosius inquirat, huic talia obijcienti cum
 Tertulliano respondendum erit: Traditio mihi præ-
 tenditur auctrix, consuetudo confirmatrix, fides verò
 obseruatric. Nullum enim firmitus potest esse proba-
 tionis argumentum, quam antiquorum traditio, & à
 maioribus recepta consuetudo, atque consensus. Sed
 de habitu Canonorum sancti Sepulchri ad præsens
 sit satis.

CAPVT SEXTVM.

*Series Episcoporum Hierosolymitanorum incipien-
 do à D. Iacobo Apostolo, primo eiusdem Urbis
 Episcopo, vsque ad tempora Constantini Magni,
 ex Scriptoribus Ecclesiasticis succinctè collecta.*

VT eò faciliùs nobilitas pariter & antiquitas Or-
 dinis Canonorum sancti Sepulchri Domini,
 quem ab ipsis Apostolis profluxisse, iam antea

Annus à Na-
tuitate Chri-
sti, 34.

S. Iacobus
minor, pri-
mus Episco-
pus Hieroso-
lymitanus.

Annus Chri-
sti 64.

2 Episcopus
Hieroso-
lymitanus Si-
meon.

primo & secundo Capite, grauissimorum virorum
lucidissimis testimonijs ostendimus, perspecta cunctis
habeatur, seriem seu Cathalogum Episcoporum illius
Ecclesiæ, à primo Ciuitatis sanctæ Episcopo, sancto
Iacobo Apostolo, exordium sumendo, illudque ad
tempora Constantini Magni continuando, præmit-
tendum duximus. Neque enim fas est, vt sanctorum
progenitorum dignitas apud filios ignoretur, apud
quos omni genere laudis comulata splendescere debet,
quorum non solum nomina, in tabulas publicas refer-
ri, verum etiam ipsorum imagines in omnibus ordi-
nis Ecclesijs effingi (vt saltim tali conspectu, crebraq;
recordatione ad ipsorum imitationem accendamus)
pium & laudabile esset. Eo igitur anno, quo Redem-
ptor noster, absoluto humanæ redemptionis myste-
rio, cælos ascendit. Inter cætera, quæ ad coaugmen-
tandam nascentem Ecclesiam, Hierosolymis ab A-
postolis salubriter fuerunt instituta, Iacobus Alphæi,
cognomento Iustus, idemq; Frater Domini (ex ratio-
ne quam supra attulimus) dictus, ordinatus fuit Hie-
rosolymorum Episcopus. Nec in diuersas orbis par-
tes cum alijs Apostolis abire permissus, maximè pro-
pter Iudæos, quorum causa munus illud susceperat, ne
omnino derelicti haberentur. Hic postquam 29 an-
nis in Cathedra Hierosolymitana sedisset, gloriosum
tandem pro Christi confessione martyrium subiit; In
eius postea locum, successit Simeon filius Cleophæ,
Iacobi & Iudæ Apostolorum Frater (alius à Zelote)

qui ad

qui ad Traiani vsque persecutionem peruenit, quo tempore cruci affixus memoratur, ab Attico Confulari, cum iam annum centesimum vigesimum ageret. Huius anniuersariam diem Ecclesia votiua solennitate celebrat die 18 Februarij. Post Simeonem tertio loco in Cathedra Hierosolymitana successit Iustus, deinde Zacheus. 5 Tobias. 6 Benjamin. 7 Ioannes. 8 Matthias. 9 Philippus. 10 Seneca. 11 Iustus alter. 12 Leui. 13 Ephrem. 14 Ioseph. 15 Iudas. Hi omnes origine Hebræi erant, quos brevis æui admodum fuisse constat, & tam frequens illorum successio, Hierosolymitanæ Ecclesiæ, grauem arguit persecutionem. Licet autem nonnulli ex recentioribus ediderint, quantum quisque horum federit; sed cum id non scribat Eusebius, qui solet alioquin aliorum numerare sedis annos, ideo etiam nos cum Baronio ignorare potius maluimus, quam diuinare. Primum autem hoc sæculum verè Apostolicum, & proinde maculis & neuis purum, notat Genebrardus: nam ab Apostolis, non modò est emensum, verum etiam superatum. Deficientibus deinde, qui ex Circumcisione Hierosolymitanæ Ecclesiæ præfuerunt, Episcopis, primus ex gentibus Marcus nomine in ordine sedecimus ordinatus est Hierosolymæ reparatæ Antistes, Anno Christi, 138. Quo tempore pulsus & oppressis Iudæis, vt notant Historici, penitusque illis occluso aditu Hierosolymam veniendi, concessa est Hierosolyma Christianis ad habitandum, in qua consequenter annis quingentis Chri-

Genebrad
Chrono. l. 3.
fol. 377.

3 Iustus.
4 Zacheus.
5 Tobias.
6 Benjamin
7 Ioannes.
8 Matthias.
9 Philippus
10 Seneca.
11 Iustus.
12 Leui.
13 Ephrem.
14 Ioseph.
15 Iudas.
Annus Christi, 109.

Genebrard:
Chronol. li.
3. f. 377.

16 Marcus
Primus ex
gentibus.
Annus Christi,
138.

17 Cassian⁹.
 18 Publius.
 19 Maxim⁹.
 20 Iulianus.
 21 Gaianus.
 22 Symmachus.
 23 Gaius.
 24 Iulianus.
 25 Capito.
 26 Maximus.
 27 Antoninus.
 28 Valens.
 29 Dolichianus.
 30 Narcissus.
 A N N V S
 C H R I S T I
 157.

stiana Religio floruit. Post Marcum deinde Cassianus, in ordine 17 Hierosolymę Episcopatum suscepit. Cui successit 18 Publius. 19 Maximus. 20 Iulianus. 21 Gaianus. 22 Symmachus. 23 Gaius. 24 Iulianus. 25 Capito. Hos ponit Eusebius vsque ad annum, Commodi Imperatoris quintum, qui fuit à Natiuitate Christi, Annus 157. Pergit itaque vltterius Eusebius: Anno, inquit, quinto Commodi Imperatoris Hierosolymis ordinatur Episcopus Maximus, ordine 26. Post quem 27 Antonius, 28 Valens. 29 Dolichianus. 30 Narcissus. *Tantis, inquit Eusebius, apud Hierosolymas Episcopis constitutis, non potuimus discernere tempora singulorum, eò quod in presentem diem eorum sedis anni minimè reperiantur.* Quo loco dolet vehementer Baronius, excidisse nobilissimæ Hierosolymitanæ Ecclesiæ, & præclarissimorum virorum egregia monumenta, dicitque plurimum illos debere redargui erroris, imò si hoc dicere fas est temeritatis, qui texentes Cathalogum Hierosolymitanorum Episcoporum, singulis prout libuit certum annorum, sedis ipsorum numerum præscripserunt. Proindè nos quoque, vt supra attigimus, maluimus cum Baronio, sequi Eusebium, id ingenue ignorare profitentem, quam alios, dubia perinde ac si certa explorataq; forent, asseuerantes. Tandem sub Narcisso Episcopo, pace tranquilla Ecclesiam Orientalem perfunctam esse constat; nam simul conuenire Episcopos, & Con-

cilia

cilia publicè celebraſſe affirmant rerum Eccleſiaſtica-
rum ſcriptores, quod non niſi in maximo ocio agi poſ-
ſe videtur. Quanta autem ſanctitate fulſerit Narcif-
ſus, ex multis Eccleſiaſticorum ſcriptorum testi-
monijs, perſpectum vnicuique eſſe poteſt. Hic namque
ſuorum calumnijs falſisq; accuſationibus circumuen-
tus, volens libensque ſolum vertit, & multis annis vi-
tam Anachoreticam duxit. Vbi Narcifſus ſe in locum
deſertum ſubduxifſet, & à nemine eſſet pro certò co-
gnitum, quo ſe recepifſet: his qui finitimis Eccleſijs
præerant Episcopis viſum fuit, vt alterum Episcopũ
ſuffragijs crearent. Dius igitur, hoc enim illi nomen
erat, in ordine 31 delectus eſt: cui non longo tempo-
re ſucceſſit 32 Germanion; quo mortuo Gordius in
ordine 33. Episcopatum obtinuit. Cuius temporibus
Narcifſus tanquam ex mortuis ad vitam denuò reuo-
catus, à Fratibus, vt Eccleſiæ gubernacula ſuſcipe-
ret, vehementer rogatus eſt. At cum Narcifſus non
amplius, propter ingraueſcentem ætatem, miniſte-
rio præeſſe poterat, Alexander Cappadocum Episco-
pus, in ordine 34. Diuina prouidentia, per reuelatio-
nem quæ noctu ipſi ſecundum quietem apparuit, Hie-
roſolymam tum voti, tum locorum ſacrorum viſen-
dorum cauſa. veniens, (ſolebant enim olim, ait Euſe-
bius, Chriſtiani ſemel in vita iter Hieroſolymitanum
ſuſcipere) à Fratibus Eccleſiæ illius benignè exceptus,
& in coadiutorem Narcifſo aſſumptus, non amplius
domum reuerti permiſſus eſt, idque propter aliam re-

31 Dius.

32 Germa-
nion.

33 Gordius.

34 Alexan-
der.

uelationem, ipsis etiam noctu visam. Hic Bibliothecam nobilem Hierosolymis construxisse fertur, quam postea partim temporis iniuria, partim barbarorum incursiones, & frequentissima sanctæ Urbis excidia, absumpserunt. Ex quo loco illud aduerte, Clerum Hierosolymitanum semper sub nomine Fratrum censi. Illud quoque consideratione dignum, ait Baro-
 nius, quod quantumlibet loca sancta Hierosolymo-
 rum (vt habet Ecclesiastica Historia) fuissent per
 Adrianum Imperatorem profanata, desuper imposi-
 tis impurissimis Dijs gentium; nihilominus ardor
 Christianæ pietatis, neque his potuit contineri, vt in
 Alexandro videmus, quin Hierosolymitanam pere-
 grinationem susciperet. Qui quidem vsus, ab ipso e-
 xordio nascentis Ecclesiæ cæptus, nunquam amplius
 est in Ecclesia Catholica intermissus. Dum autem De-
 cius Imperator persecutionem contra Ecclesiam con-
 citasset, mandassetque per vniuersas prouincias, inter-
 ficiendos Christianos, Alexander Hierosolymitanæ
 Ecclesiæ Episcopus, iam extrema senectute, & vene-
 randa planè canicie eximius, Cæsareæ propter Chri-
 stum præsidis Tribunali sistitur, carcerisque cruciatu
 diu afflictatus, post præclarum & illustre testimoniū,
 Præsidis Tribunali datum, morte in carcere confopi-
 tur. In cuius locum Mezabanes³⁵ successor declara-
 tur. Hoc postmodum mortuo, suffectus est in locum
 eius numero 36. Hymæneus, qui interfuit Concilio
 Antiocheno aduersus Paulum Samosatenu. Post Hy-

35 Mezaba-
 nes.
 36 Hymæ-
 neus.

mañeum ponitur ab Eusebio in Chronico Zambdas. Hic Thebæos milites, quorum Tribunus Mauritius erat, fidem Christianam edocuit, dum hæc eadem legio ad Parthorum & Persarum tumultus comprimendos missa, in Syria hybernaret. Quorum immotum animum Imperator videns, & desperans omnino quæquam illorum à Christiana fide posse deduci, omnem in eosdem immittit exercitum, à quo singuli trucidarentur. Horum coronas, palmas, trophæa, atque triumphos, Dei Ecclesia ab eo tempore in hodiernum anniuersaria celebritate commemorare non desinit. Defuncto Zambda, subrogatus est in locum eius Hermon, qui & Thermon dictus reperitur: sub hoc grauis aduersus Christianos per totam Palæstinam excitata fuit persecutio, mandantibus id seuerè Imperatoribus Diocletiano & Maximiniano, quorum multitudo infinitis tormentis diuexata, à nemine dinumerari potest. Posthæc Ecclesiæ Dei omni ex parte fæliciora arrisere tempora, quibus inprimis in oriente furentes iterum Maximini impetus in Christianos, immisis à Deo cladibus multiplicibus, retunduntur, ac penitus reprimuntur. Et in occidente Maxentius Tyrannus à Constantino virtute crucis victus atq; extinctus fuit: hoc autem accidit Anno Christi, 312. Constantini verò Imperatoris, Anno 7. De quo, eiusque præclarissima matre Helena, & eximijs ab vtrisque erga loca sancta præstitis beneficijs, capite sequenti.

38 Hermon.

Annus Christi, 36.

CAPVT SEPTIMVM.

Successio Episcoporum Hierosolymitanorum à tempore Constantini Magni, vsque ad tempora Iustiniani Imperatoris, quando hæc Ecclesia in Patriarchatum fuit erecta.

39 Macarius
ANNVS
CHRIST.
316.

ANNVS
CHRIST.
324.

Martyrol:
Roman: die
10 Mart.

Post Hermonem Macarius in ordine Episcoporum 39. Hierosolymitanam Ecclesiam administrasse inuenitur. Cuius temporibus templum magnificentissimum in Monte Caluarie, ad locum Dominicę sepulturę, iussu Constantini Magni, & Helenę matris eius constructum, ac magnis facultatibus locupletatum deprehenditur: quo tempore lignum salutiferę crucis inuentum, & pro maiori parte thecis argenteis inclusum, custodię Canoniorum eiusdem Ecclesię concreditum fuit, & ex eo tempore, sacrum illud sodalicium, Custodum Sacri Sepulchri nomine appellari cępit, qui multis sæculis (prout sacra Historia docet) etiam occupata postea à Saracenis Hierosolyma, in eo officio gnauiter perstitisse, ac quoscunq; peregrinos, sacri Sepulchri visendi desiderio, Hierosolymam confluentes, annuo etiam barbaris persoluto tributo, suis ædibus, iuxta SS. Sepulchrum constitutis, perbenigne fouisse traduntur. Postmodum Macarius cum sedisset annis 19 longæuus ac plenus Dñi benedictionibus, reddidit in pace Deo Spiritum, eiusq; me-

moria

moria iugi commemoratione, die annua repetita, in Ecclesia hætenus perseverat. In ipsius locum surrogatus est Maximus, sub cuius sælici gubernatione, eximium illud templum sancti Sepulchri, quod Constantinus erexerat, dedicatum est 14 mensis Septembris, Anno Christi 335. quo die anniuersaria solennitas exaltationis S. Crucis ab Ecclesia celebratur, ubi simul donaria & ornamenta, ab Imperatore, eiusque pia matre Helena missa, maximi prorsus precij, consecrata fuerunt. Atque ex illo tempore sedes & Cathedra Episcopalis, ab Ecclesia Montis Syon, in qua primus Hierarcha & Episcopus, B. Iacobus Apostolus renunciatus fuit, in hanc translata est. Quo auro Constantini Magni sæculo, clerus S. Sepulchri maxime propagari, & maiora indies incrementa sumere cepit. Post obitum deinde Maximi, Cyrillus sedem Hierosolymitanam accepit, sub quo prodigium ingens Hierosolymis, signum videlicet crucis, in cælo super sanctum Golgota montem, apparuisse fertur: de quo prodigio extat ipsius Cyrilli ad Constantinum Imperatorem scripta Epistola, quam recenset Baronius in Annalibus Ecclesiasticis. Hic postea ob imposturas Acatij, Episcopatu Hierosolytano se abdicasse legitur. Post cuius recessum Ciriaceum seu Quiriacum Ecclesiæ Hierosolymitanæ præfuisse, & sub Iuliano Apostata Imperatore martyrio coronatum esse nonnulli astruunt, cuius opera saluificum lignum crucis repperitum tradunt. Huic deinde successisse Herennium,

40 Maximus.

Annus Christi, 335.
Niceph: Ecclesiæ. Historia: lib: 8.
cap: 50.

41 Cyrillus.

Cyrl. in fine Cathed. mystag.
Baro: in Annal Eccl: Tō 3. Anno 333.
cap: 26.
42 Quiriacus.

Adrichomius, in descri. Hierosalem fol: 176.

H

postea

43 Herenni.
44 Heracliu
45 Hilarius.

Zozom. l. 4.
cap: ultimo
in fine.
Annus Chri-
sti, 359.

46 Ioannes.

Annus Chri-
sti 386.

postea Heraclium, ei autem Hilarium: nam hos eo tempore illam rexisse Ecclesiam, ad imperium usque Theodosij refert Zozomenus: qua tempestate Cyrilus iterum suæ sedi restitutus, ac in ea vitam finiuisse traditur, cuius monumenta ingenij extant Catecheses, quas in adolescentia elaborauit. Huic consequenter in sedem Hierosolymitanam successisse inuenitur Ioannes, cuius temporibus Deus multorum corpora Sanctorum, ad solatium Christianorum manifestauit: Magni siquidem illius Protomartyris Stephani, & S. Gamalielis facta diuinitus reuelatione, Hierosolymis inuenta, & de loco translata feruntur. Cuius rei gestæ seriem exactè descriptam, inuenies apud Surium, Tō: 4. & apud Baronium in Annalibus Ecclesiast: Tomo 5. Anno Christi 417. fol: 485. hos tu si velis consule. Præsidente autem in Ecclesia Hierosolymitana Ioanne, S. Augustinus in Africa, normam vitæ Apostolicæ per omnia sequi, primumq; suis Clericis Regulas in communi viuendi perscribere deprehenditur. Quo tempore (vt habet Nicephorus) Eudoxia Imperatrix, Hierosolymis domum Episcopalem ex ipsis fundamentis erectam, pulcherrimè exornauit, eiq; mille numismatum redditum attribuit: Et aliquando die festo Paschæ, templum sanctæ Resurrectionis, ad celebrandam festiuitatem ingressa, in lucernarum rationem, decies mille sextarios olei retulit, & Choris memoriam sacræ Resurrectionis colentibus, annum prouentum quadringentorum numismatum, constituit.

Posthæc

Post hæc Ioannem Hierosolymitanum Episcopum cō-
tigit ex hac vita migrasse, qui sedem illam annis 30.
tenuisse legitur. Post quem Prailius successit, cuius
tempore, vt notat Marcellinus in Chronico, Dominus
noster Iesus Christus, super montem Oliueti Hieroso-
lymis vicinum, se se de nube manifestauit; ex quo
prodigio, multæ tunc vtriusque sexus vicinarum gen-
tium nationes, tam visu quam auditu perterritæ, atq;
credulæ, sacro Christi fonte ablutæ sunt, omniumque
baptifatorum in tunicis, crux Christi Saluatoris, Di-
uinitatis nutu, ex templo pressa refulsit, ex qua cæli-
tus facta apparitione, de venturi Domini ad iudican-
dum tempore, inter disertos disceptari cæptum. Con-
stat autem haud ad longioris temporis spacium, Prai-
lium propagasse Hierosolytanam sedem, eumq; ha-
bita ratione eius prædecessoris Ioannis decessus, non-
nisi annos 13 in eadem sede transegisse. Post hunc in
Episcopum Hierosolymitanū Iuuenalis creatus fuit:
qui Eudoxiæ Augustæ Theodosij vxori, beatissimas
illas fascias Saluatoris nostri Iesu Christi, & catenam
qua D. Petrus ab Herode vinctus fuit, donasse dicitur.
Fertur idem Iuuenalis, ex maiorum traditione, de
transitu virginis libellum scripsisse. Defuncto postea
Iuuenali, suffectus est in locum eius Anastasius Eccle-
siæ sancti Sepulchri Canonicus, & vasorū custos, præ-
cedentibus etiam eius futuram in Episcopatum ele-
ctionem prophetiis, qui anno vnde vigesimo suæ sedis,
vt ex obitu Iuuenalis prædecessoris eius, Ecclesiastici

Annus Chri-
sti, 416.

47 Prailius.

Annus Chri-
sti 429.48 Iuuenalis
Niceph: l. 14
cap: 2.Idem Nice:
l. 2. cap: 23.
& lib: 15.
cap: 4.
49 Anastasi⁹
vide apud
Surium die
1. Ianuar: S.
Euthymii
Abbatis præ-
dictiones de
eo.

AnnusChri-
sti 458.

50 Martyri⁹.

AnnusChri-
sti 477.

AnnusChri-
sti 487.

51 Salustius.

AnnusChri-
sti 498.

52 Elias.

Extat huius
Heliae Epi-
sto'a ad A-
nastasiū Au-
gustum, per
Sabam mo-
nachū missā
ac reddita a-
pud Niceph.
lib. 6. c. 32.
AnnusChri-
sti 512.

53 Ioannes
ex heretico
Catholicus
& Confessor

scriptores colligunt, mortuus esse dignoscitur: in eius vero locum ordinatur Martyrius monachus, genere Cappadox: huius temporibus, corpus S. Barnabæ repertum est in insula Cypro, vna cum S. Matthæi Euangelio; Historia quidem omni exceptione dignissima, omnium assertione & conceptione recepta, ab egregio viro illius temporis, Alexandro Monacho orthodoxo scripta, extat apud Surium die 11 Iunij, quam tu si lubet apud eum vide. Martyrius deindè cum sedisset annos 8. (tot enim eius sedi à Nicephoro adscribuntur nec non à Cyrillo in Saba) vita functus est. Cui successit Salustius, qui magnum illum Anachoretam Sabam Presbyteratus ordine insigniuit, & illud celebre in Laura Monasterium, nouiter pro eo tempore à B. Saba constructum, consecrauit, depnens sub ara multas gloriosorū Martyrum reliquias. Porro Salustius cum peruenisset ad annum 8 suæ sedis, ex hac vita decessit; In eius locum euectus est, Elias Arabs genere laudatissimus; quem nunquam uti consueuisse vino, Polychronius apud Sophronium testatur; quo impietate Anastasij Imperatoris in exilium pulso, Ioannes sedem Hierosolymitanam apprehendit, qui cum antea dogma Seueri profiteretur, mutatus postea fuit in strenuum propugnatorem fidei, procul dubio virtute Cathedræ D. Iacobi, prout asserere videtur Baronius. Cum verò Ioannes sedisset annos 11 in fata demum concessit, relicto successore Petro, virtute insigni, cuius temporibus Iustinianus Im-

perator

perator, in multis Palestinæ locis templa sumptuosa construxit: inprimis verò Hierosolymis, mirificum templum Dei Genitricis, cui nullum planè aliud tum potuisse æquiparari, tradit Procopius, quod magnarū etiam pecuniarum reditu honorasse, idem author recenset. Idem etiam in via qua ad templum S. Sepulchri itur, constituisse fertur hospitia vtrunque duo, vnum quo hospites peregrini suscipiantur: alterum quo requiescant & refocillentur pauperes ægroti, & alia plura. Hic quoque Imperator, providendo peregrinorum inopiæ, qui incredibili frequentia vndiq; Hierosolymas confluebant, & vota sua ad templum S. Sepulchri persoluebant, legem tulit de alienatione quarundam domorū, ad dictam Ecclesiam spectantiū, exceptis prædijs quæ nullo modo alienari ab ea voluit. Inter alia notatu dignissima in hoc edicto habentur:

Hæc nos, inquit Imperator, venire ad præsentem legem fecerunt, quam dedicamus Deo, & omnium Ecclesiarum sanctissimæ Resurrectioni, per quam fancimus, omnia quidem alia, & in sanctissima Resurrectione obtinere, occasione prædiorum Ecclesiasticorum, (neque enim ipsi omnino permisimus venditionem ullam facere prædiorum) super ædificijs laxamus, aliquid de rigore legis &c. Post obitum deinde Petri, successit Macarius huius nominis secundus, qui exacto in Cathedra Hierosolymitana biennio, propter odium atque calumniam cleri, sede sua pulsus legitur: quo pulso successus est Eustochius, sub quo Ecclesia Hiero-

Annus Christi
523.
54 Petrus.

Justin. Nou.
40. II. Pepin
in lege Lōgo
bar. Baron:
Anna: Eccl.
Tomo.
Petrus Coto-
nus instit:
Cathol: C.
de Peregrina-
tionibus
fol: 133.

Annus Christi
546.
55 Macarius
55 Eustochi

Vilhel. Ty-
rius de Bel-
lo sacro l. 24
c. 12. ad Cal-
cem libri.
Annal: Ec-
cles. Tō. 6.
Anno 553. c.
fol. 636.

solymitana Patriarchatu verè aucta cognoscitur, licet eo nomine sæpe eius Episcopus, ante hæc tempora, vsus esse inueniatur. Qualiter autem id euenerit, refert in hunc modum Tyrius: Anno, inquit, 27. sanctę recordationis Iustiniani Imperatoris, congregata est Synodus Generalis, apud Constantinopolim, tempore Vigilij Papę, Eutichij Cōstantinopolitani, Apollinaris Alexandrini, Pauli Antiocheni, & Eustochij Hierosolymitani Patriarcharum; in qua Synodo, post alias populo Dei necessarias institutiones, quas pro tempore promulgandas, decreuerat sanctorum Patrum, qui ad eam conuenerant, autoritas, prædictam Deo amabilem Hierosolimitanam honorare Ecclesiam, & eius Episcopo locum inter Patriarchas dare, communi sanxit voluntate, reuerentiam exhibens sanctę Resurrectioni &c. Recensetque specificè sedes dicto Patriarchatui Hierosolymitano, pro eo tempore subiectas: nempe Metropolitanas quatuor, Cæsaream videlicet maritimam, sub qua nouemdecem Episcopatus. Alteram Scytopolitanam, sub qua nouem Episcopatus. Tertiam, Rabbam Moabitim sub qua 12 Episcopatus. Quartam Bitiram Arabiæ sub qua 35 Episcopatus ex antiquo constitutos fuisse refert. Præterea 25 Suffraganeos, quos Græci Syncellos vocant: hos omnes Ecclesię Hierosolymitanę subiectos, soliusq; Patriarchę iurisdictionem super se agnoscere dictus author commemorat, specificè vnamquemque sedem exprimendo, tali qui sequitur ordine.

*Sedes prima Metropolitana Casarea Maritima,
olim teste Benianimo Tudelensi Gad Palestinorum
dicta, ad mare Mediterraneum sita, hos Episco-
patus sub se habuit.*

- | | |
|--------------------|-------------------------|
| 1 Dorenses. | 11 Regium Gadaron. |
| 2 Antipatridam | 12 Asorum Paralías. |
| 3 Iamptiensis. | 13 Asorum Ippum. |
| 4 Nicopolitanam. | 14 Estomasontinam. |
| 5 Onulinam. | 15 Astilionensem. |
| 6 Sofeuridam. | 16 Tricomiadensem. |
| 7 Raphiadensem. | 17 Toxruanam. |
| 8 Regium Apatos | 18 Saltuanam. |
| 9 Regium Hiericho. | 19 Constantiniaquitnam. |
| 10 Regium Lyuas. | |

*Secunda sedes Metropolitana ad Patriarchatum
Hierosolymitanum spectans, Scythopolis, sub qua
infra positi Episcopatus numerabantur.*

- | | |
|--------------------------------|----------------|
| 1 Capetolias seu Capitoliados. | |
| 2 Miru. | 6 Tetracomias. |
| 3 Gadaru. | 7 Oluna. |
| 4 Pelos. | 8 Galanis. |
| 5 Vlisippus. | 9 Komanas. |

*Tertia sedes Metropolitana Patriarche Hieroso-
lymitano subiecta, Rabba Moabitidis, alio nomme
Rabensis siue Petracensis, apud Beniaminum in iti-
nerario Petra deserti dicta, cui duodecim Episcopa-
tus adscripti erant.*

- | | |
|-----------------|-----------------------|
| 1 Augustopolis. | 7 Zora. |
| 2 Arcadilla. | 8 Virosum. |
| 3 Kara | 9 Pentacomia. |
| 4 Serapolis. | 10 Memapson. |
| 5 Mempsidon. | 11 Mitroconeras. |
| 6 Eulitis. | 12 Saltum Hieraticum. |

Quarta sedes Metropolitana sub Patriarchatu Hierosolymitano consistens, Becerra seu Bitira Arabie, hos Episcopatus sub se habuit.

- | | |
|---------------------|---------------------------|
| 1 Adrason. | 19 Enacomias. |
| 2 Dias. | 20 Comogonias. |
| 3 Medauon. | 21 Comogieros. |
| 4 Hierason. | 22 Comosthonis. |
| 5 Nein. | 23 Comis. |
| 6 Philadelphia. | 24 Machadaron. |
| 7 Ierapolis. | 25 Comocoreatis. |
| 8 Essimos. | 26 Comis Capiron. |
| 9 Neapolis. | 27 Comis insuaquos. |
| 10 Themistus. | 28 Comis Pirroareton. |
| 11 Philipopulus. | 29 Comis Pecius. |
| 12 Diomisia. | 30 Comis Ariaton. |
| 13 Constantinu. | 31 Comis Neotis. (non.) |
| 14 Pentocomias. | 32 Clima Anatolis quecusi |
| 15 Tricomias. | 33 Comis Ariotas. |
| 16 Canastados. | 34 Comis Trachonos. |
| 17 Saltum votanios. | 35 Comis Nephdamos. |
| 18 Exacomias. | |

Nomen hoc Comis seu Come, quo multi, ut vides, Episcopatus sub Patriarcha Hierosolymitano prae notantur, à Graecis oppidum seu vicum intelligi debere, censet Aubertus Miraus in sua Geographia Ecclesiastica.

Prater

Præter enumeratas sedes Metropolitanas & Episcopales, Suffraganeæ etiam multe à Tyrio recensentur, ut pote.

- | | |
|---------------------|-----------------------|
| 1 Lidda. | 14 Capitolina. |
| 2 Ioppe. | 15 Mauronensis. |
| 3 Aſcalon. | 16 Gedera. |
| 4 Gaza. | 17 Nazareth. |
| 5 Meimas. | 18 Thabor. |
| 6 Diocletianopolis. | 19 Caracha vel Petra. |
| 7 Beit Gerbein. | 20 Adroga. |
| 8 Neapolis. | 21 Affra. |
| 9 Sebastia. | 22 Aelis. |
| 10 Iericyntus. | 23 Faram. |
| 11 Tyberiadis. | 24 Elinopolis. |
| 12 Diocæsarea. | 25 Mons Syna. |
| 13 Legionum. | |

Easdem reperiri Baronius narrat in Vaticana Bibliotheca in codice nouissimo, cuius est titulus Liber Censuum.

CAPVT OCTAVVM.

Continuatio Patriarcharum Hierosolymitanorum à temporibus Iustiniani Imperatoris, ad illud usque tempus, quo in potestatem Saracenorum Ciuitas sancta deuenit.

INterim Eustochio Patriarcha Hierosolymitano è vita sublato, in eius locum Ioannes substitutus esse legitur: posthunc deinde Amos, quo defuncto Esichius successit. Vbi verò Esichius sedisset in Patriarchatu Hierosolymitano annos octo, (ut habet Nice-

Baro: Eccl:
Tom: 6.
Anno 553.

Annus Christi,
561.
56 Ioannes.
57 Amos.
58 Esichius.
59 Zacharias.

Annus Christi,
601.

Modestus vi-
ces Patriar-
chæ captiui
Hierosoly-
mis obit.

phori Chronicon) ex hac vita migravit. Post quem Zacharias Patriarchatū accepit, sub quo à Cosrohoe Persarum Rege, sacrosancta Ciuitas Hierosolymitana, vna cum precioso Ligno sanctæ Crucis & Patriarcha, capta esse noscitur, & qui in ea erant Christiani, misere in Persidem deducti, Iudæisque vili precio venundati, non more gentium in seruitute retenti, sed diuersis ab eis innumerisque affecti supplicijs, admodum trucidati leguntur. Luctuosam hanc historiam Theophanes & Antiochus Monachus Palestinæ descripsisse inueniuntur. Cum verò Ecclesia sancta Hierosolymitana abducto in Persidem Zacharia Patriarcha captiuo, absque pastore relicta esset, iniuncta est eius administratio (nec enim licebat in eodem loco duos esse Episcopos) Modesto, patri monachorum cuiusdam monasterij Palestinæ, qui sanctorum illorum aspiciens corpora insepulta, animi ardore contractus, multis se proluisse lachrymis fertur, ac sanctas reliquias illorum circumplexus, in Patrum deposuisse conditorijs. Non ea verò tantum, quæ ad exequias defunctorum, & ad animarum curam, spectare videbantur, summo studio pertractasse dicitur, sed etiam in restituendis igne consumptis Ecclesijs (licet impossibile videretur, rem tantam monachum vnum posse præstare) alterum se Zorobabelem exhibuisse: testis locuples de his omnibus est Antiochus monachus, in epistola ad Eustachium. Restituitur postea, victis per Heraclium Persis, suæ sedi Zacharias, Lignum san-

ctissimæ

Atissima Crucis secum reportans, quod illæsum & intactum, nec à Persis quidem visum fuisse, Historici huius temporis memoriæ commendarunt. Quo postea vita functo, Sophronius in Patriarchatum elegitur, qui plurimos labores, pro fide Catholica subiisse fertur; si quidem ea tempestate Ecclesia orientalis, à Cyro Monothelita Alexandrino Patriarcha, mirum in modum exagitata traditur; ipsum etiam Heraclium Imperatorem in Monethelitarum sectam prolapsum fuisse narrat Michaël Glicas, & ingens flagitium fratris filia sibi in matrimonium iuncta, ab eodem fuisse perpetratum. Atque hinc tetra funera orientalis Imperij capta, & ex his penè alijsq; gravissimis causis (quas enumerat Boscherus) amissio sanctæ Ciuitatis profecta esse dignoscitur. Quantisper enim, ait ille, Christiani Christianè vixerunt, tantisper in Terra sancta constitere, quamprimùm degenerarunt, eiectioni & sufflato sunt instar fardium, hostibus Saracenis tanquàm flagello Dei eos vrgentibus, qua tempestate Zophronius Patriarcha, cum videret loca sancta à canibus proculcari, nimio merore confectus, vti alter Helias, petijt animæ suæ vt moreretur, & non secus atque Helii non substitit amplius, vbi captam audiuit Arcam Domini, neque illi superstes esse cupiebat. Mortuus itaque eo ipso anno 638. quo per Saracenos Hierosolyma, Damascus, & magna pars Syriæ Romanis Imperatoribus erepta fuit, postquam eam Christiani tenuissent, annis 409. Et exinde Hierosolymita-

60 Sophronius ultimus Patriarcha Hierosolymitanus Orthodoxus.

Orator terre sanctæ Philip. 3. c. 2.

Annus Christi, 638.

Naucerus
volum 2 Ge-
nerat: 37.
fol: 808.

Baron: An-
nal. Eccl:
Tom: 8. An-
ne Christi c.
fol: 434.

norum Patriarcharum (vt Historici Latini censent) successio obscura, Græci illorum successionem non interruptam illic ostendere conati sunt, quos nonnulli ex Latinis secuti, idem facere non dubitârunt: quem admodum Naucerus in sua Chronologia fecisse reperitur; nam post Sophronium ponit Theodorum, deinde Iliam, Gregorium, Thomam, Basilium, Sergium, Salomonem, Theodosium, Iliam secundum, Sergium secundum, Leontium, Orestem, Nicephorum, Sophronium, Ennium, Simeonem, sub quo Latini cū Godefrido de Bullion venisse, & Ciuitatem sanctam obtinuisse noscuntur. Sic Naucerus. Noster Baronius, nullum alium post Sophronium, ad tempora Godefridi Regis fuisse suffectum Hierosolymis orthodoxū Episcopum tradit, hoc ipsum Gilbertus Genebrardus in sua Chronologia affirmat; qui sedem illam, ab his qui deinceps Sophronio successerunt, non per Ecclesiasticam authoritatem, sed sæcularem potestatem occupatam fuisse recenset; quorum nos sententiæ subscribentes, in Sophronio terminatos fuisse Orthodoxos Patriarchas Hierosolymitanos firmiter tenemus.

CAPVT NONVM.

Vrbis Hierosolymitanæ brevis descriptio, illiusq; variae captiuitates & excidia.

PRO Coronide libri primi, ad maiorem veteris Ecclesiæ Hierosolymitanæ elucidationem, breuem sanctæ Ciuitatis descriptionem, eiusque va-

rias ca-

rias captiuitates & excidia, ex antiquorum monumen-
tis studiose à nobis collecta, præmissis adiicienda o-
peræ precium duximus. Hierusalem itaque Dei ele-
cta sancta & gloriosa, fundata in montibus sanctis,
quæ ob miram situs sui elegantiam, firmitatem, ma-
gnificentiam, cæli clementiam, solique fertilitatem,
nec non rerum omnium vbertatem, Vrbs perfecti de-
coris, gaudium & exultatio vniuersæ terræ, à Prophe-
ta meritò appellatur. Vetustate verò, ac fama rerum
gestarum, regumq; splendore, qui eam inhabitârunt,
& inprimis Christi hospitio, miraculis, passione, &
resurrectione, omnium orbis totius Urbium cele-
berrima euasit. Eam conditam ferunt Anno à mun-
do creato 2033. à Melchisedech Rege & Sacerdote
altissimi, à quo & Salem nominata, qui eam circiter
annos 50 tenuisse dicitur. Postea verò à Iebusæis oc-
cupata, Iebus & Iebusæum, aliquando dicta inueni-
tur; quibus, posteaquam eam habuissent annos 824 à
Dauid eiectis, addita arce, à suo nomine Ciuitatem
Dauid, appellari voluit, & exindè in totius Iudææ Me-
tropolim ac regni sedem euecta, nomen Hierusalem,
quasi Iebusalem obtinuisse fertur; quam postea Salo-
mon Dauidis filius, & in Regno successor, Templo
toto terrarum orbe celeberrimo, palatio item Regio,
alijsque clarissimis ædificijs, vel maximè illustrauit.
Hanc etiam alij post Salomone reges, turribus, mu-
ris, fossis, alijsque splendidis & Regijs operibus, &
publicis ædificijs exornarunt, atque ita munierunt, vt

Adrichomi⁹
in descript.
terræ sanctæ
fol: 148.

Ierò: Ire. 2.

Orator terre
sanctæ Phil.
2. c. 1. f. 28.

Hierusalem
post Melchi-
sedech habu-
it Dños infi-
nitos,

3 Reg: 7.

Strabo l. 16.

Mich: 3.
Ierem: 25.
26. 29.

3 Regū 14.
Comestor.

Ado in Chro
nico.

1 Mach: c. 1.

totius orbis inter Vrbes faciliè principem locū obtine-
ret. Hoc fælici rerū statu annis 477. floruisse dicitur,
donec ob regum & populi scelera, maximè verò abo-
minandū idolorum cultum, regnante Sedechia à Na-
buchodonozore Babyloniæ rege, aliquoties capta, ac
vltimò funditus euersa, spacio septuaginta annorum
pene deserta iacuit; Syonq; tunc quasi ager arabatur,
& Hierusalem quasi aceruus lapidum stabat, & mons
templi quasi excelsa sylvarum, vtq̃ue interea, D. Hie-
ronymo teste, nec auis volauerit, nec bestia pertran-
sierit per eam. Deindè ab Asope nescio quo Ægyptio-
rum Rege, iuxta aliquos, vel potius ad sensum Boskie-
ri, & scriptura authore, à Sefac, de quo sic in libris
Regum; in quinto Anno Regni Roboam, ascendit
Sefac Rex Ægypti in Hierusalem, & tulit thesauros
domus Domini, & thesauros Regios, & vniuersa di-
ripuit, scuta quoque aurea, quæ fecerat Salomon &c.
Cum enim ei resistere non poterant, admissus intro
est sub pactis de murorum conseruatione, quæ tamen
fædifragus violauit. Postea ab Alexandro Magno,
totius orientis turbine atrocissimo, qui à Iudæis fauo-
rabiliter exceptus, nihil nocuit vrbi, Deo victimas im-
molauit, & Pontificem Iaddum plurimis honoribus
prosequutus est. Posthæc ab Antiocho Rege, qui &
Epiphanes, & radix peccati cognominatus est, semel
& iterum, primum ab ipso Antiocho Rege, Menelao
prodente, secundū à Questore seu principe tribuno-
rum eiusdem; demum à Pompeio Magno, quem ideo

Cicero

Cicero Hierosolymarium vocat, capta esse noscitur. A Gabinio Scauro varo, & à Cæstio insultus aliquanto passam, non commemoro. Ita anniuersaria propè modum excidia & captiuitates illi fuisse produntur, vt nulla orbis Ciuitas capta sæpius aut euerfa legatur. Fuisse quoque ab Herode primo ex alienigenis Rege captam docet Iosephus; Ad extremum à Tito Vespasiani filio, vero Christi necis vindice, anno secundo eius Imperij, die 8 Septembris, post Christi passionē trigesimo octauo, decimo verò post Iacobi mortem, obsessa & radicitus euerfa legitur. Vnde Vrbs illa mundo admirabilis, facta est spelunca latronum & sepulchrum mortuorum: nam intestinis cædibus, fame, peste, & gladio vndecies centena Iudæorum millia in ea perijisse, alia centum millia publice venundata, sexcenta interfecta, exceptis ijs qui ad publicas operas Romam missi fuerant; sedecim denique millia in triumphum ducta, vulgò feruntur. At Christi fideles Deo sic disponente, ne innocentissimi sceleratissimorum supplicio inuoluerentur, & ne pari pæna cum impijs Iudæis afficerentur, longè ante præmoniti, in exteriorem prouinciam recessisse, atque sicut refert Epiphanius, maiori ex parte Urbem Pellam incoluisse dicuntur, quòd sic eos Christus Dominus, vt antequàm obsidione cingerentur, alio se reciperent olim admonuisset. Quo tempore ijdem fideles, Cathedram S. Iacobi, in qua ille dum Episcopus esset confederat, secum detulisse leguntur, quàm Episcopos

Ioseph: lib.
14. c. vltimo.
Hegesip l. 1.
anno ab Vr-
be 717.

Hieroso-

Euseb: lib:
3. cap. 4.

Hierosolymitanos, qui illic ordinē succēsserant, permagni æstimasse ait Eusebius. Post acerbam deinde cladem Hierosolymorum, redeuntes Christiani ab Vrbe Pella, domos in Hierusalem sibi construere cæpisse, circa Ecclesiam suam, vbi erat Cænaculum, vbi manebant Discipuli post Ascensionem Domini in cælum, docentes & magna signa operantes, narrat Eusebius: In qua consequenter annis prope quingentis Christianam Religionem floruisse sacræ Historiæ testantur; donec iterum ob peccata, quæ superius attigimus, Christianorum, in potestatem Saracenorum Ciuitas sancta deuenisset, qui cuncta funditus deuastantes, nulli animæ Christianæ, nulli Ecclesiæ vel monasterio, imò nec ipsis sanctorum imaginibus parcentes, ferro atque igne terram sanctam depopulati sunt. Quo tempore Clerus Ecclesiæ sancti Sepulchri defecit, & si qui ibidem ex Christianis manere volebant, diræ seruitutis iugum quotidiano tributo vitam redimētes, ab Anno Dñi, 638. vsq; ad annum 1099 (tam dira siquidem ac diuturna, ait Tyrius, imperscrutabili Dei iudicio, nobilissima illa Ecclesia, imò vniuersus Christianorum populus in oriente habitans, permisus est perfidorum seruitute premi) pati cogebantur. Sed nos primis quasi labris, in tanto præsertim ætatum & euentuum discrimine, prægustata Cleri Hierosolytani antiqua stirpe, lucidiora magisq; perspicua, de statu & progressu nobilissimi Ordinis, diuina adiuti manu, sequenti libro in medium producemus.

DE SA-

DE SACRA
A N T I Q V I T A T E
 ET STATV
ORDINIS CANONICI
 CVSTODVM SACROSAN^{ci}
 Sepulchri Domini Hieroso-
 lymitani.
LIBER SECVNDVS.
CAPVT PRIMVM.

*Expeditio Godifredi in terram sanctam, illius pri-
 mus cum Niceæ Sultano conflictus: tum quo
 tempore Christiani trucidatis barbaris, pluri-
 mas Asiæ prouincias, ac ipsas deniq; Hierosolymas
 receperint, Et ad perpetuam posteritatis memo-
 riam, Festum tryumphi siue gratiarum actio-
 nis instituerint.*



Cum toti iam Asiæ anteriori impera-
 rent Turcæ, Godefridus Bolioneus
 Princeps Lotaringiæ, clarissimis o-
 lim maioribus, patre Eustachio Ida
 matre natus, ex Galliæ regno & Rhe-
 mensi prouincia oriundus, terram
 sanctam è manibus infidelium eripere, christianæque

Añal: Eccl.
Tō: 11. sub.
Anno Chri-
sti. 1095.
Mariani offi-
cii institutio

Reipublicę limites protendere, magno animo aggressus est. Vendito itaq; Ducatu paterno Leodiēsi Episcopo, omnē pecuniam in belli apparatus impendit. Adiunxerunt se ei in primis fratres Balduin⁹ & Eustachius; his accessere ex Italia, Germania, Gallia, Hispania religionis amore complures Principes, adhortatione in primis Romani Pontificis Urbani I. inducti, quorum alij terra, alij classe, Ducem secuti, cum Petro Eremita belli sacri promotore (quem Polydorus asserit esse inuentorem globulorum seu orbiculorum precatoriorum, qui filo inserti, à deuotis fidelibus plerunq; gestantur) se se ad Bizantium cæteris coniunxerunt. Vt autem res difficillima inchoanda, hæctenus in Ecclesia Catholica intentata, optatum consequi posset effectum, narrat Baronius, placuisse Urbano Pontifici, Dei genitricis precibus annitendum, vt ipsa apud filium precibus ageret, quo fidelis populus, in tot & tantis discriminibus subeundis, eius fulciretur auxilio, atque præsidio muniretur; experientia edoctus, quæque ardua progressura feliciter, quibus B. Mariæ Virginis faueret gratia, & aspiraret auxilium. Proinde rogata sententia Patrum, in Concilio Claromontensi sancit, vt horariæ preces & laudes sanctissimę Virgini, per vniuersos Clericos ab eo tempore persoluerentur; quod quidem tunc à sancta Synodo, Urbano agente, ea occasione indictum, & à Clericis piè susceptum, ad laicos quoque fuit, tam viros, quàm mulieres propagatum, & quidem cum magno fenore gra-

tiarum

tiarum, vt experti sunt omnes, iugiterque experiuntur fideles, qui has ex animo frequentant: hæc Baronius. Cui narrationi subscribens Arnoldus Vuion hæc addit; cum in hac expeditione non minus opus foret spiritualibus, quam corporalibus armis, sciens pontifex ipsi Deo offerri, quicquid in eius sanctissimæ Matris honorem impenditur; vt patrocinium tantæ Virginis, Mediatricis Dei & hominum in re tam pia & sancta experiretur, in eodem Concilio, in quo vt Clerici septem horas Canonicas quotidie recitarent, confirmatum fuerat, totidem ab iisdem, alijsque legere valentibus, & ad hoc bellum sacrum accedentibus, in laudem Diuæ Virginis recitari præcepit, addita & diei Sabbathi, quem in eius honorem tunc primum consecrauit, obseruatione; in cuius etiã venerationem nouem Missarum præfationibus tunc primum decimam addidisse fertur. *Et te in veneratione Beate Mariæ semper Virginis collaudare, benedicere & predicare, quæ & vnigenitum tuum sancti Spiritus obumbratione concepit, & Virginitatis gloria permanente lumen æternum mundo effudit, Iesum Christum Dominum nostrum.* Hæc authores præcipui de institutione Mariani officij: illius recitandi occasionem dedisse, Belli sacri piam expeditionem allegant. Imperabat tùm Græcis Alexius Comnenus, qui suppeditandis ad bellum necessarijs sui etiam animi promptitudinem declarasse, à nonnullis

Ligni vitæ
lib: 5. c. 20.

Annus Christi,
1095.

Philip. Lonicerus in
Chronico Turcico Tō
1. fol. 15.

memoratur. Alij narrant eum gypso farinae mixto, quam commeatus loco subministrabat, multorum hominum millium interitus causa fuisse. Diuini itaque numinis auspicio, exercitus instructissimi maximique Dux Godefridus Lotaringus, aduersus Turcas & Saracenos Christiani nominis hostes, Asiaticam expeditionem suscepit Anno Christi 1096. In cuius exercitu numerata sunt trecenta peditum millia, equitum Loricatorum centum millia. Nec minor Turcarum aduersus has Christianorum copias, apparatus & industria fuit, qui Ducem sibi elegere Solymanum Niceæ Sultanum, armis acerrimum, laborum patientissimum, in rebus dextrè cauteque gerendis in primis prouidum, cum quo neminem alium inter omnes Saracenorum Turcarumque Duces & principes, tum conferri posse narrat Lonicerus. Hic Solymanus de Christianorum Principum expeditione certior factus, nihil prius habuit, quam ut nostros a finibus Regni sui arceret, & prior, antequam intimos Imperij sui recessus occuparent, armis eos lacesseret, fortunamque belli experiretur. In numeris itaque congregatis copijs, omnibusque ad hostem propulsandum eiusque impetum sustinendum necessarijs accurate comparatis, Christianorum exercitui non procul à Nicæa obuiam procedit, ubi vario & ancipite utrinque Marte diu admodum pugnatum fuisse narratur: donec tandem, dissipato hostili exercitu, Turcæ cateruatim cæsi, multi etiam à nostris capti, ipse quoque Solimanus

in eodem prælio conciderit. Hinc potentia Turcarum diminutio facta esse dignoscitur. Occupata deinde Antiochia tandem & ipsa Hierosolymitana Vrbs in nostrorum peruenit potestatem Anno Christi 1099. Feria sexta Idibus Iulij, in festo diuisionis Apostolorum, eo prorsus die & hora, qua ante tot centena annorum CHRISTVS Saluator noster in crucem actus, expirasse legitur. O Bellum sanctissimum & annalibus aureis notandum, si id retinere Christiani Principes ad nixi fuissent, quod multo sudore ac sanguine maiores illorum susceperant. Porro ad maiorem tanti facti memoriam, ex communi omnium voto susceptum & approbatum recenset Tyrius, vt hic dies apud omnes solennis, & inter celebres celebrior perpetuo habeatur; In qua ad laudem & gloriam nominis Christiani, quicquid in Prophetis de hoc facto vaticinij reperitur, publice ad populum referatur, & pro eorum animabus fiat ad Dominum intercessio, quorum labore commendabili, prædicta amabilis Ciuitas Christianorum fuit restituta libertati. Ex quo tempore ordo noster, per vniuersas instituti Ordinis sui Ecclesias, consuevit festum gratiarum actionis, & triumphi illa die ex hostibus reportati, sub celebritate annuaria Dedicationis Ecclesiæ S. Sepulchri, annua eaque perpetua deuotione recolere, festo Diuisionis Apostolorum in proximam diem translato; vt hoc esset perpetuum monumentum victoriæ à Christianis illo die ex barbaris obtentæ. Sub cuius festi memoria

Vuilhel: Ty.
rius de bello
sacro. lib: 8.
c. 24. f. 701.
Annus Chri.
sti 1099.

plurimas in ordine nostro Ecclesias dedicatas etiamnum retinemus. Extulerunt hanc diem summis preconijs, veteres Sacri belli Commentatores, inter quos Raimundus de Agiles Canonicus Podiensis, tali utitur, in huius celebritatis descriptione, encomio: Noua, inquit, dies, nouum gaudium & exultatio, noua & perpetua lætitia, laboris & deuotionis consummatio, noua verba, noua cantica, ab vniuersis exigit. Hæc, inquam, dies celebris in omni sæculo venturo, omnes dolores & labores nostros gaudium & exultationem fecit. Dies hæc, inquam, totius christianitatis confirmatio, & paganitatis exinanitio, & fidei nostræ renouatio, quia in hac illuxit & benedixit Dominus populo suo. In hac die eiecti Apostoli ab Hierosolymis, per vniuersum mundum dispersi sunt, in hac eadem die Apostolorum filij, Deo & Patribus, urbem & Patriam vendicauerunt. Hæc dies celebratur idibus Iulij, ad laudem & gloriam nominis IESU Christi, qui dedit precibus Ecclesiæ suæ, Urbem & Patriam, quam iurauit patribus, & reddidit in fide & benedictione filijs; In hac die Officium de Resurrectione cantauimus, quia in hac ille qui sua virtute à mortuis surrexit, per gratiam suam nos resuscitauit. Hæc Raimundus. Fulcherius quoq; Carnotensis de eadem victoria iisdē prope modum verbis exclamat: O tempus desideratum, ô tempus inter cætera memorandum: ô factum factis omnibus anteferendum, verè desideratū, quoniam ab omnibus fidei Catholicę cultoribus inter-

no men-

no mentis desiderio se imper desideratum fuerat, vt locus, in quo cunctarum creaturarum Creator, recreationis salutiferæ munus, Deus homo factus, humano generi, pietate sua multiplici, nascendo, moriendo, resurgendoque contulit, à Paganorum contagione inhabitantium quandoque mundatus, tam diu superstitione contaminatus, à credentibus & confidentibus in se, in modum dignitatis suæ pristinum reformaretur. Et vere memoriale, & iure memorandum, quia quæque Dominus noster IESVS Christus, in terra homo cum hominibus conuersatus egit, & docuit, ad memoriam famosissimam reuocata & reducta sunt. Et quod idem Dominus per hunc populum suum, tam vt opinor dilectum alumnum, familiaremque, & ad hoc negotium promptum expleri voluit, vsque in finem sæculi memoriale linguis tribuum vniuersarum personabit; hætenus Fulcherius de hac die, qui etiã tempus captæ Hierosolymæ his versibus notauit:

Julius efferuens ter quina luce calebat

Idibus inque suis iter ad medium faciebat.

Undecies centum numero si dempseris unum

Dicebant Annos Domini tunc esse peractos

Cum nos Hierusalem gens Gallica cepimus Urbem
Tunc quoque (subdit Fulcherius) locati sunt Canonici in Ecclesia Sepulchri Domini, de quibus inferius.

CAPVT SECVNDVM.

Litteræ Legati Apostolici, & Principum Christianorum, ad Paschalem Papam, quas Encyclicas esse voluerunt ad omnes Principes occidentis, de toto Belli sacri progressu, & sanctæ urbis recuperatione.

Paschalis
PP. secundus
electus in Pontificatum An:
1099. idibus
Augusti, obiit
vero annorum 18.
cum sedisset
annos 18.
menses 7. dies
4. sepultus
est in Basilica
Lateranensi.
Baronius Annal. Eccl:
Tom: 12. anno
Christi,
1100. f. 6.

Paschali Papæ Romanæ Ecclesiæ, & omnibus Episcopis, & vniuersis Christianæ fidei cultoribus, Pisanus Archiepiscopus Apostolicæ sedis Legatus, & Godefredus Dux, Gratia Dei Ecclesiæ sancti Sepulchri nunc Aduocatus; & Regimundus Comes S. Ægidij, & vniuersus Dei exercitus, qui est in terra Israel, salutem. Multiplicate preces & orationes cum iucunditate, quoniam Deus magnificauit suam misericordiam, complendo in nobis ea, quæ antiquis temporibus promiserat. Etenim cum capta Nicæa cunctus exercitus inde discessisset, plusquam trecenta millia armatorum ibi fuerunt. Et licet tanta multitudo esset, quæ vniuersam Romaniam occupare, atque epotare flumina omnia, compascere omnes segetes vna die posset, tamen cum plenitudine tanta cōduxit nos Dominus, ut de ariete nummi vix duodecim acciperentur. Præterea, & si Principes & Reges Saracenorum contra nos surrexerint, tamen Deo volente facile victi & conculcati sunt. Ob quæ quidem sæliciter acta, quia

quidam

quidam intumuerāt, opposuit nobis Dominus Antiochiam, humanis viribus inexpugnabilem, ibique per nouem menses nos detinuit, atque in obsidione extra ita nos humiliavit, vt in toto exercitu nostro vix boni centum equi reperirentur. Tādem aperuit nobis Dominus copiam suæ benedictionis, & nunc etiam induxit in Ciuitatem, & turres & omnia eorum potestati nostræ tribuit. Cum hæc quasi viribus nostris acquisita teneremus, tanta multitudine Saracenorum obsessi sumus, vt de ciuitate nullus egredi auderet. Præterea fames ita inualuerat, vt vix ab humanis dapibus aliquis abstineret; longum est enarrare miseras, quæ in Ciuitate fuerunt. Respiciens autem Dominus populum suum, quem ita diu flagellauerat, benignè consolatus est nos. Itaque primo quasi pro satisfactione tribulationis, Lanceam suam à nemine inuentam à tempore Apostolorum, pignus victoriæ nobis contulit, deinde corda hominum adeo animauit, vt illis, quibus ægritudo & fames ambulandi vires negauerat, arma sumendi, & viriliter contra hostes dimicandi virtutem infunderet. Denique cum triumphantibus hostibus, fame ac tædio deficeret exercitus Antiochiæ, & maximè propter discordias Principum, in Syriam profecti, Varram & Marram vrbes Saracenorum expugnauimus, & castella regionis obtinuimus. Cumque ibi moram facere disposuissemus, tanta fames in exercitu fuit, vt corpora Saracenorum iam fætentiū, à populo Christiano ibi comesta sint. Deinde cum in-

Idem l. 4. c.
9. 10. 1. 5.
cap. 22.

Idem lib: 6.
cap. 5. 6. 7.

Sacra Lan-
cea reuelata.

Vuil Tyr. l. 7.
c. 8. 9. 10.
11. 12.

teria Lufaniæ ingrederemur, largiffimam & mifericordem, & victoriosiffimā manum omnipotentis Dei Patris nobifcum habuimus. Etenim ciues & Castellani regionis perquam procedebamus, ad nos cum multis donarijs legationes præmittebant, parati feruire nobis, & oppida fua dedere; fed quia exercitus nofter non multus erat, & in Hierufalem vnanimiter venire feftinabat; acceptis fecuritatis tributarias eas fecimus, quippe quod de multis ciuitatibus, in vna de illis, quæ ex minimis eft, plures homines haberentur, quam in noftro exercitu effent. Cumque auditum effet Antiochiæ & Rhoes, quia manus Domini nobifcum effet, plures de exercitu, qui ibi manferant confeçuti funt nos apud Tyrum: hinc itaque Deo coope- rante vfque ad Hierufalem peruenimus. Cumque in obfidiōe multum exercitus laboraret, maximè propter inopiam aquæ, habito confilio Epifcopi & Principes, circumeundam effe ciuitatem nudis pedibus prædicauerunt; vt ille qui pro nobis humiliter ingreffus eft, per fe iudiciū de his hoftibus faciendo, nobis eam aperiret.

Idem lib: 7.
cap: 11.

Idem lib: 8.
cap: 18.

Idem lib: 8.
cap: 27.

Placatus itaque Dominus hac humilitate, oçtauo die poft humiliationem, cum fuis hoftibus ciuitatem nobis tribuit, eo videlicet die, quo primitiua Ecclefia inde abiecta fuit, cum feftum difperſionis Apoftolorum celebraretur. In porticu Salomonis & in templo eius, noſtri æquitabant in ſanguine Saracenorum, vfque ad equorum genua. Deinde cum ordinatum

effet

esset qui ciuitatem retinere deberent, cum alij amore patriæ, & pietate parentum suorum redire voluissent; nunciatum est nobis Regem Babylonie Ascalonam venisse cum innumerabili multitudine militum, ducturum Francos qui Hierosolymis erant in captiuitatem, & expugnaturum Antiochiam; sed aliud Deus de nobis statuerat. Itaque descendimus obuiam illis, relictis sarcinis & infirmis Hierusalem cum præsidio. Cumque exercitus noster & hostium se conspexissent, genibus flexis adiutorem Deum inuocauimus, vt qui in alijs necessitatibus legem Christianam confirmauerat, in præsentī bello, contractis viribus Saracenorum & diaboli, Regnum CHRISTI & Ecclesiæ à mari vsque ad mare vsque quaque dilataret. Hic Dominus affuit, & tanta tribuit vires, vt in hostem currere, vt videntem fontem aquæ viuæ, sitientem ceruum se-gnem iudicarent: miro videlicet modo, cum in nostro exercitu non vltra quinque millia equitum, & centum quinquaginta millia peditum esse potuissent. Tunc mirabilis in seruis suis Dominus apparuit, cum antequam configeremus pro solo aspectu nostro hanc multitudinem in fugam vertit, & omnia eorum arma diripuit, vt si deinceps vellent repugnare, non citò haberent arma. Spolia inaudita, thesaurum regis Babylonis obtinuimus. Ceciderunt ibi Maurorum vltra centum millia gladio: timor autem eorum tantus erat, vt in porta ciuitatis ad duo millia suffocati sint. De his verò qui in mari interierunt non est numerus; Spineta

Idem lib: 9
cap. 10. 11.
12. 13.

etiam ex ipsis occiderunt. Pugnat certe pro nobis Deus. Pridiè quam bellum fieret, multa millia camellorum, & boum, & ouium cepit exercitus: Principum iussu populus hæc diuisit. Ad pugnam progredientes multæ turmæ horum animalium comitabantur miraculosè, & stabant cum stantibus, & currebant cum currentibus, nubes ab æstu solis defenderunt nos & refrigerabant. Celebrata itaque victoria, reuersus est exercitus Hierusalem, relicto ibi Godefredo Duce. Comes S. Ægidij, & Robertus Comes Northmanix, & Robertus Comes Flandriæ, Laodiciam reuersi sunt, ibi classem Pisanorum & Bòémendi inuenerunt. Cumque Archiepiscopus Pisanus Boemundum & dominos nostros concordare fecisset, regredi Hierusalem pro Deo & fratribus suis Regimundus disposuit. Ad hanc igitur tam admirabilem fratrum nostrorum fortitudinis deuotionem, ad tam gloriosam Omnipotentis Dei retributionem, ad tam exoptabilem omnium peccatorum nostrorum per Dei gratiã remissionem, & Catholicæ Christi Ecclesiæ & ipsius Latinæ, inuitamus vos ad exultationem & omnes Episcopos, & bonæ vitæ Clericos & Monachos, & omnes laicos, vt ille nos ad dexteram Dei confidere faciat, qui viuit & regnat per sæcula. Rogamus & obsecramus vos per Dominum Iesum qui nobiscum semper fuit, & collaborauit, & ex omnibus tribulationibus nos eripuit, vt fratrum sitis memores vestrorum, qui ad vos reuertuntur, benefaciendo eis,

& soluen-

& soluendo debita eorum, vt vobis Deus benefaciat, & vos absoluat ab omnibus peccatis, & in omnibus, quæ vel nos, vel illi apud Dominum meruimus, partem vobis concedat. Hactenus epistola Hierosolymis militantium, quæ in occidentali orbe vbiq; vulgata, omnium ferè incendit animos Hierosolimam adeundi, & subsidio Christianis ibi manentibus.

Paschalis Papæ responsum ad superiores literas

Paschalis Episcopus seruus seruorum Dei venerabilibus fratribus siue filiis, Episcopis, clericis, proceribus, militibus, & omni populo militie Christiane in Asia triumphantis salutem & Apostolicam benedictionem.

Quod per Prophetam populo suo Dominus pollicetur, impletum in vobis cognoscimus; Inhabitabo, inquit, in eis, & inambulabo cum eis, quia per fidem in vestris pectoribus habitat, & per operationem ita inambulat, vt patenter in vobis inimicos suos expugnasse videatur. Renouauit enim Dominus antiqua miracula, vt in vno mille, & in duobus decem millia persequeretur, & his Ecclesie annis, sacerdotalium precum tubis inimicarum urbium mœnia aperiret. Illud verò quanti gaudij, quàm potentis miraculi æstimatis, quod sacrosancti lateris

Legatio à Paschali Papa missa in orient.

Leui. 16. & 2. Cor. 6.

Deu: 32.

Ioseph: 6.

Luc: 2.

sanguine cruentam lanceam, & viuisce crucis partem vestris oculis reuelavit, vestris tractandam manibus obtulit? Quantas super his Redemptori nostro gratias debeamus, nec humanus animus opinatur, nec lingua praeualet enarrare. Videmus enim Christianae Fidei hostes, Christiani populi oppressores per diuinam misericordiam manu vestra partim contritos, partim è diu possessis regionibus effugatos: videmus Orientalem Ecclesiam post longa captiuitatis tempora, magna ex parte ad antiquam libertatis gloriam rediisse. Dicendum igitur ore, dicendum corde: Gloria in altissimis Deo, & in terra pax hominibus bonae voluntatis. Orationi etiam & vigiliis insistendum, ut quod cepit, adimpleat, & manus vestras, quas hostium suorum sanguine consecrauit, immaculatas usque ad finem, affluentes firma pietate custodiat.

Quapropter agite, filij in Christo desideratissimi, rememoramini, quanta pro amore Domini reliqueritis, quanta pro fratrum salute & ereptione pericula subieritis: patriam, domos, parentes posthabuistis, vosmetipsos exilio addixistis, morti opposuistis: curate nunc ad meliora semper tendere, pacem cum

omnibus

omnibus conseruate, ut possitis ad aternam pacem Domini misericordia peruenire. Plurima vobis significare per chartam & atramentum supersedemus, quoniam ex Apostolica Sedis gremio charissimum fratrem Mauritium Portuensem Episcopum destinamus, ut qui per beati Petri Vicarium, sancte in Christo memorie predecessorem nostrum Urbanum tanti peregrinationem itineris assumpsistis, beati Petri solatijs semper abundetis, & quem fundamentum tanti operis habuistis, ipsum quoque ad finem caput in fide & obedientia teneatis. Vices etiam nostras eidem fratri Mauritio & Episcopo commisimus, ut eum in omnibus reuerenter excipere, audire, & per ipsum nobis, imò beato Petro obsequi debeatis. Cui nimirum in preceptis dedimus, ut ecclesie, quam per vos Dominus liberauit, seu liberaturus est, ordinationi vigilanter immineat, si quominus Canonicis regulis apta repererit, corrigat, & in eisdem cum vestro auxilio plantanda plantet, edificanda edificent. Hortamur itaque hortantesq; precipimus, ut ei tanquam personam nostram preferenti, in omnibus obedire curetis. Omnipotens Dominus & velle & posse in vobis tribuat, ut que

eo auctore facienda cognoscitis, ipso adiuuante impleatis. Ipse vos ab omnibus peccatis absoluat, & exilio vestro patriam eternam tribuat. Dat. Romæ quarto Nonas Maij, Indictionis octauæ,, per manum Ioannis diaconi, hæc ad militantes in Oriente Occidentales Fideles Paschalis Papa.

CAPVT TERTIVM.

Godefredi in Regem Hierosolymitanum inauguratio, Canonorum ad Ecclesiam sancti Sepulchri noua institutio: Noui item Patriarchæ primi ex Latinis electio, simul & obitus pijsissimi regis notantur.

IN relatione rerum à Christianis post receptas Hierosolymas gestarum, quæ satis amplæ magnificæque fuerunt, & quæ graui stylo Tyrius imprimis Archiepiscopus Tyri, Regni Hierosolymitani Cancellarius percensuit, & alij ante, & post eum multi clarissimi & deliteris optimè meriti viri, satis abunde præstiterunt, nobis illa minime repetere conuenit, ea saltem quæ ad almi Ordinis Canonorum sancti Sepulchri iteratam institutionem spectare dignoscuntur à nobis recensenda erunt. Sancta itaque Ciuitate à Christianis subiugata, mox concordibus omnium suffragijs eligitur in Regem Godefridus Bo-

lioneus

lioneus Lotaringiæ Princeps, Dux sacri belli, qui etiã primus in muros Hierosolymitanos se intulisse fertur, quo tempore summa ipsius enituit religio: nam cum inaugurari debuisset, aureum diadema imponi sibi non permisit, quod nefas esse eo loci insigniri auro, quo Christus Rex regum, pro redemptione humani generis, spinis fuerat coronatus, testaretur. Hic ante omnia sicut vir religiosissimus erat, (ait Tyrius) in his quæ ad cultum Dei, decoremque domus eius spectabant, caput suæ sollicitudinis Domino offerre primitias. Nam protinus Ecclesiam S. Sepulchri à Saracenis contaminatã, cum ingenti omnium Christianorũ lætitia cõsecrari fecit, ad quam etiã Canonicos instituit, eisq; ampla beneficia quas præbendas vocant, simulque & honesta domicilia, circa prædictam amabilem Ecclesiam assignauit. Qui assiduus Domino Deo uiuenti in laudibus & hymnis psallerent, hostiam corporis & sanguinis IESU Christi, deuote immolarent, obligans illos ad ordinẽ & institutionem seruandam, quam ex præscripto Romanæ Ecclesiæ, magnæ & amplissimæ vltra montes seruant Ecclesiæ. De quorum etiam institutione Christianus Adrichomius, in suo nobilissimo Theatro terræ sanctæ, hanc celebrem mentionem facit. Porro inter cetera, quæ in Ecclesia sancti Sepulchri notatu reperiuntur digna, illud minime omittendum est, quod hic omnes ex Christianis Hierosolymorum reges sibi sepulturam elegerint.

Obligatio-
nes Canoni-
corũ S. Se-
pulchri.
Adrichomi
in descripti-
one vrbis
Hierosoly-
mæ parte vr-
bis 242. fol.
177.

rint. Inprimis vero primus Hierosolymitanae Urbis christianus Rex Godefridus de Bullion, cum vivus hanc Ecclesiam opimis Sacerdotiis, atq; Canonicis doctrina & sanctitate eximiis exornasset, quiboris diuinis ac nocturnis Divina ibi peragerent mysteria, illisq; splendidissimas circa templum ades extruxisset, tum etiam mortuus magnifica & digna tanti principis corpore sepultura magnopere nobilitavit: Hæc Adrichonius. Ex his Arnolphum de Rhodes, clericum miræ prudentiæ & facundiæ, Cancellarium & Archidiaconum eiusdem Ecclesiæ, primum fuisse constitutum, qui procurator sanctarum Reliquiarum, & custos Eleemosynarum fidelium esset, narrant illius ævi scriptores. Sic diuino decenter obsequio instaurato à Duce Catholico primo ex Latinis Hierosolymorum Rege; reliqui Christiani Principes, campanas ex ære fieri iusserunt, quarum signum Fratres, (inquit Fulcherius) dum caperent, mox ad Ecclesiam Laudes Psalmorum, Missarumque vota celebraturi festinarent, & populus hæc auditurus, vnâ ad reddenda Deo vota properaret: non enim huiusmodi soni aut signa visa vel audita sunt ante hos dies in Hierusalem. Patriarchæ autem electionem tunc dilatam fuisse, ait idem author, donec à Romano Pontifice consilium quæsisset, quem præfici placeret, viduata siquidem tunc erat Hierosolymitana Ecclesia, Patriarcha Simone viro sanctissimò, in Insula Cypro tempore obli-

Fulcherius
Carniotesis
in gestis peregrinanti-
um Franco:
cap. 48. fol.
399.

Tyrius li. 9.
cap. 4. fol.
765.

dionis Hierusalem ex hac luce subtrahito. Qua tempestate, narrat Tyrius, inuentam fuisse in parte sanctę Resurrectionis Ecclesię seorsum, portionem vnā Crucis Dominicę, quam ob metum gentium, quarum iugum patiebantur fideles, ad ampliorem cautellam, multo ante, paucis admissis, occultatam, eamque studio & opera cuiusdam hominis Syri, qui eius tam preciosi depositi fuerat conscius, repertam, theca reconditam argentea, primum ad Domini Sepulchrum, deinde ad templum Domini, cum hymnis & canticis spiritualibus deportatam, prosequente eam vniuerso clero & populo, consolationem quasi de cęlo missam omnes in commune accepisse, dictus author recenset. Posthęc annuente sedis Apostolicę supremo gubernatore vniuersali ac pastore, Daibertus seu Theobertus, Pisanus Archiepiscopus, cum potestate Summi Pontificis, in terra sancta Legatus, Vir prudens & religiosus valde (vt notat Tyrius) habito prius generali Conuentu Principum, & eorum qui aderant Episcoporum, post celebratam diem Natalis Domini in fine anni 1099. in Patriarcham Hierosolymitanum electus, & Primus ex Latinis in sede Hierosolymitana collocatus: à quo deinceps religiosę admodum Christianissimus Princeps Godefridus, inuestituram Regni Hierosolymitani accepisse memoratur. Quo factō, ab eodem pijsimo Rege, Ecclesię sancti Sepulchri doctes & possessiones assignatę esse leguntur, quales antecessores Patriarchę habuisse noscerentur; & his alię

Theobertus
primus ex
Latinis Patri
archa Hiero
solymitanus
Tyrius lib. 9
cap. 15. foli
771.
Annus Chri
sti 1099.

Tyrius li: 9.
cap: 16. &
17. fol. 771.

Obitus Go-
defridi
Annus Chri-
sti 1100.

plures additæ, vt haberet vnde honestè sustentari pos-
sit Domus Patriarchalis. Resignasse si quidem pius ac
deuotus Princeps, præsentè clero & populo vniuerso,
quartam partem loppe, & quartam partem Ciuitatis
Hierusalem, quæ à multis retroactis temporibus ad
Hierosolymitanos Patriarchas pertinuisse dicebatur.
Contineri autem in quarta ista parte vrbs (narrat Ty-
rius) locum venerabilem Dominicæ Passionis & Re-
surrectionis; vtrumque Monasteriũ hospitalarium
sancti Ioannis, virorum scilicet, & sanctimonialium,
quorum vtrumque cognominabatur, S. Mariæ de La-
tina. Domum item Patriarchalem & Canonicorum
Dominici Sepulchri Claustrum, cum suis pertinentijs
idem author recenset. Verum tam pio & religioso
Rege non diu lætata sunt Hierosolymæ, nam anno
exacto, eo ipso die & mense, quo Hierosolyma per
eum recuperata fuit, aduersa correptus valetudine,
sumpto prius salutis nostræ viatico, (vt de his fuse
narrat Tyrius) tanquam verus Christi Confessor, &
primus Canonicorum sancti Sepulchri instaurator,
in fata concessit, cum beatis spiritibus vitam posses-
surus æternam. Anno ab Incarnatione Domini 1100.
Narrant hi qui loca sancta adierunt, extare hucusque
eius Sarcophagum in Golgotano delubro, cum hoc
Epitaphio antiquo Longobardorũ caractere insignito.

*Hic iacet inclytus Dux Godefridus de Bullion,
qui totam istam terram acquisiuit cultui Christiano:
Cuius anima requiescat in pace.*

Huic in Regno successisse traditur Balduinus frater, Comes Edessanus, qui edita ingenti strage Saracenorum: Antipatridem, Cæsaream, Ptolomaidam, Tripolim, & Berytum. vi expugnatas, Regno Hierosolymitano adiecisse fertur. Sed nos rerum olim à Christianis in Asia gestarum obmissa narratione, nostrum quod ad Ordinis Canonici demonstrationem pertinet. prosequimur institutum.

CAPVT QVARTVM.

Gibellini secundi ex Latinis Patriarchæ electio eiusq; obitus, & duarum sedium Episcopaliū erectiones, cum tertij Patriarchæ institutione, breuiter recensentur.

MOrtuo postmodum Theoberto, primo ex Latinis Patriarcha Hierosolymitano, quem annis septem Cathedræ Iacobi præfuisse, eumq; summe religiosum & omnibus numeris absolutum antistitem fuisse narrat Tyrius, Canonicos Ecclesiæ sancti Sepulchri vnanimi voto & consensu, Gibelinū Arelatensem Archiepiscopum, cum munere Legati à Summo Pontifice Hierosolymam missum, virum senem & grandævum, in demortui locum substituisse anno Christi 1107 idem author recenset. Qui Diocesis suæ fines ampliare cupiens, mox ea de re Legatos ad Summum Pontificem misit, voti q; compos factus pro

Tyrius lib
11. cap. 4.
fol. 797.
2. Patriarcha Hierosolymitanus
Gibelinus.

Annus Christi
1107.

Ecclesia Hierosolymitana hoc primum Diploma obtinuit.

Tyrius lib.
ii. cap. 28.
fol. 813.

Paschalis Episcopus Seruus seruorum Dei, Reuerendissimo fratri, Hierosolymitano Patriarchæ Gibelino, & successoribus eius in perpetuum Canonice promouendis, salutem & Apostolicam benedictionem. Secundum mutationes temporum, transferuntur etiam Regna terrarum, vnde etiam Ecclesiasticarum Parochiarum fines, in plerisque Prouincijs mutari expedit, & transferri: Asianarum si quidem Ecclesiarum fines, antiquis fuerunt definitionibus distributi, quas distributiones, diuersarum diuersæ fidei gentium, confudit irruptio; Gratias autem Deo, quod nostris temporibus, & Antiochia & Hierosolyma ciuitates, cum suburbanis suis, & adiacentibus Prouincijs, in Christianorum Principum redactæ sunt potestatem. Vnde oportet nos Diuinæ mutationi & translationi manum apponere, & secundum tempus, quæ sunt disponenda, disponere, vt Hierosolymitanæ Ecclesiæ, vrbes illas & Prouincias concedamus, quæ gloriosi Regis Balduini, & exercituum eum sequentium sanguine, per Dei gratiam acquisitæ sunt. Præsentis itaq; decreti pagina tibi frater charissime, & Coepiscopo Gibelino tuisque successoribus, & per vos sanctæ Hierosolymitanæ Ecclesiæ, Patriarchali siue Metropolitano iure regendas, disponendasque sancimus. Ciuitates omnes atque Prouincias, quas supradicti regis conditioni aut iam restituit, aut in futurum restituere gra-

tia Di-

tia Diuina dignabitur. Dignum est enim, vt Sepulchri Dominici Ecclesia, secundum fidelium militum desideria, competentem honorem obtineat, & Turcorum seu Saracenorum iugo libera in Christianorum manu abundatius exaltetur. haftenus Bulla Pasch: PP.

Porro eodem ferè tempore Ecclesiam Betleemiticam, ex Prioratu Canonorum sancti Sepulchri, in Sedem Episcopale, de voluntate & assensu dicti Pape, erectam fuisse docet Iacobus de Vitriaco, primumque eius Episcopum Aschetinum nomine, Ecclesiae sancti Sepulchri Cantorem, de gremio Canonorum electum ad eam fuisse institutum: narrat Tyrius, apud quem integras erectionis dicti Episcopatus literas inuenies. Similiter Ebronensem Ecclesiam, quæ etiam fuerat Prioratus Canonorum sancti Sepulchri, ob reuerentiam seruorum Dei (nam in ea sepultos Adamum cum Eua, & tres Patriarchas, Abraham, Isaac, & Iacob sacra pagina testatur) ad Episcopale dignitatem sublimatam fuisse, tradit Cardinalis Vitriacus. Posthæc in fata concessisse Gibelinum Patriarcham anno sedis suæ quarto, anno vero à Natiuitate Domini IIII. Scriptores illius æui referunt. In cuius locum substitutus legitur Arnulphus de Rôés, Archidiaconus Ecclesiae sancti Sepulchri. Qui ad primæuam institutionem Apostolicam suos Canonicos reduxisse, eisque vitæ communis normam præscripsisse memoratur. In quo Instituto postmodum continuè illos permanfisse, Confirmationemque sui Ordinis à fede

Iacobus de Vitriaco in historia Hierosol: abbreviata ca: 57. fol: 1077. Tyrius lib: 17. cap: 12. fol: 802.

Iacob: Vitriacus loco supra citato. Obitus Gibelini Patriarchæ. Annus Christi mii. 3. Patriarcha Hierosolymitanus Arnulphus.

Apostolica obtinuisse, Bulla Cælestini huius nominis Papæ secundi, quæ in Archiuo Ecclesiæ Rauenatis authentica extare dicitur, aperte declarat, quam hoc loco subiungendam operæ precium duximus.

CAPVT QVINTVM.

Cælestinus Papa secundus Ordinem Canonicorum sancti Sepulchri sub Regula S. Augustini approbat, eorumq; Ecclesias & possessiones in protectionem Sedis Apostolicæ recepit.

Cælestinus Episcopus Seruus Seruorum Dei.

Electus in Pontificatū Anno 1143. illo die quo Innocentius tertius ē uis decesserat: tenuit Pōtificatū mēsis sex. Obiit autem Anno Domini 1144. Mare Oceanum omnium Ordinū Syluestri Maruli, in descriptione Ordinis Canonicorum S. Sepulchri.

Dilectis filiis Petro Priori, & Fratribus sancti Sepulchri Hierosolymitani, tam presentibus quam futuris Canonicè substituendis in perpetuum. Si mansuetudo & liberalitas sanctæ Romanæ Ecclesiæ, uniuerfis Christianis debet oportuna solatia ministrare, multò magis his, qui religiosam vitam ducunt, & Omnipotenti Domino familiarius adherere videntur, id ipsum conuenit propensius impartiri. Quia igitur dilecti in Domino filij, iuxta Regulam B. Augustini viuere decreuistis, & in loco ubi steterunt pedes Domini adorantes, apud gloriosum Sepulchrum eius, in quo triduo corporaliter requieuit, & alia sacratissima loca, in quibus

Redem-

Redemptor mundi pro salute nostra, vincula, flagella, crucis ignominiam, vulnera, mortemq̃ sustinuit, regulariter militatis, maiori vos beneuolentia & gratia dignos esse censemus, & paternis vos affectibus volumus consouere. Vestris ergo postulationibus, debita benignitate, accomodantes assensum, Sacrosanctam Ecclesiam sancti Sepulchri, in qua Diuinis Officiis insistentes, Passionem Dominicam, & victoriosissimæ Crucis trophæum, assidue oculata fide recolitis, nec non etiam personas vestras, sub Beati Petri, & nostram protectionem suscipimus, & presentis scripti pagina communimus: Statuentes ut quasunque possessiones, quæcunq̃ bona, eadem Ecclesia, in presentiarum Canonice possidet, quæcunq̃ etiam ab egregie memorie viris, Duce videlicet Godefrido, & utroq̃ Rege Balduino, Venusto, & aliis Patriarchis, eidem loco iuste collata sunt, aut in posterum à Patriarchis & alijs Dei fidelibus rationabiliter conferentur, firma vobis & illibata permaneant. In quibus hæc propriis duximus exprimenda vocabulis: Medietatem videlicet oblationũ sancti Sepulchri, & omnes oblationes Dominice Crucis, nec non & omnes oblationes Altarium, in

Ecclesia S. Sepulchri existentium, sicut Patriarcharum dono vobis rationabiliter donata sunt; Domos, stationes, & furnos omnes Ciuitatis Hierusalem, exceptis duobus Hospitalis videlicet, & Ecclesie S. Marie Latine, sicut dono Ducis Godfredi, & fratris eius Regis Balduini, & aliorum bonorum hominum, vobis legitime concessa sunt. Casalia que possidetis in territorio Hierusalem, Machumeriam videlicet cum pertinentiis suis, Sabareth, Casarcab, Calandriam, Armotiam, Ramittam, Berteligel, Betsare, Deßans cum pertinentiis suis. In territorio Ramensi, Beth Casale cum pertinentiis suis. In territorio Casariensi Castellum Feniculi cum pertinentiis suis. In territorio Tyri Casale de Riua cum pertinentiis suis. Hortum quem habetis intra murum, & antemurale Ciuitatis Tyri. Hortum & molendina & alias possessiones, quas habetis intra & circa Antiochiam. Ecclesiam Quarantane cum pertinentiis suis. Ecclesiam sancti Petri in Ioppe cum pertinentiis suis. Ecclesiam sancti Sepulchri in Acon cum terra & domo, quam dedit vobis Lambertus Hals & aliis pertinentiis suis. In territorio eiusdem Ciuitatis, Ecclesiam S. Marie de Numas cum per-

tinentiis

tinentiis suis. Ecclesiam S. Marie in Ciuitate Tyro
 cum pertinentiis suis. Ecclesiam sancti Sepulchri in
 Monte Peregrino cum pertinentiis suis. Ecclesiam
 sancti Sepulchri in Montanis cum pertinentiis suis.
 Ecclesiam sancti Sepulchri in Brundusio Ciuitate
 cum pertinentiis suis. Ecclesiam S. Sepulchri in Bar-
 leto cum pertinentiis suis. Ecclesiam quam haberis
 in Venosa Ciuitate, dono Nicolai eiusdem ciuitatis
 Episcopi cum pertinentiis suis. Ecclesiam sancti Se-
 pulchri iuxta Troiam Ciuitatem cum pertinentiis
 suis. Ecclesiam sancti Theodorij martyris ante Por-
 tam Beneuentane Ciuitatis cum pertinentiis suis.
 Castellum Cerret cum pertinentiis suis, quod nobilis
 vir Albertus Blandracensis Comes: Ecclesie sancti
 Sepulchri donauit. Ecclesiam quam habetis in Epi-
 scopatu Constantiensi, in villa quæ vocatur Detren-
 dorf. Decernimus ergo, ut nulli omnino hominum
 liceat, prefatam Ecclesiam temere perturbare, aut
 etiam possessiones auferre, vel ablatas retinere, mi-
 nuere, seu quibuslibet molestiis fatigare; sed omnia
 integra conseruentur eorum, pro quorum gubernatione
 & sustentatione concessa sunt, vsibus omni-
 modis profutura. Salua Apostolice Sedis, & Pa-

triarchæ Hierosolymitani reuerentia, & Episcoporum in quorum Parochiis Ecclesiæ vestre sitæ sunt Canonica iustitia. Si qua igitur in futurum Ecclesiastica secularisue persona, hanc nostræ Constitutionis paginam sciens contra eam temere venire tentaauerit, secundo tertioque commonita, si non satisfactione congrua emendauerit, potestatis honorisq; sui dignitate careat de perpetrata iniquitate, & à sacratissimo corpore & sanguine Dei & Domini Redemptoris nostri Iesu Christi aliena fiat, atque in extremo examine districtæ ultioni subiaceat: Cunctis autem eidem loco iusta seruantibus, sit pax Domini nostri Iesu Christi, quatenus & hic fructum bonæ actionis percipiant, & apud districtum Iudicem premia æternæ pacis inueniant.

Fiat pax in virtute tua, & abundantia in turribus tuis. S. Petrus. S. Paulus.

Cælestinus PP. II.

- + Ego Gregorius Presbyter Cardinalis Tituli sancti Calisti subscripsi.
- + Ego Gorzo Presbyter Cardinalis Tituli sanctæ Cæcilie subscripsi.
- + Ego Vbaldus Presbyter Cardinalis Tituli sanctorum Ioannis & Pauli subscripsi.

Ego

- + Ego Vbaldus Presbyter Cardinalis Tituli sanctæ Praxedis subscripsi.
- + Ego Cælestinus Catholicę Ecclesię Episcopus subscripsi.
- + Ego Conradus Sabinensis Episcopus subscripsi.
- + Ego Theodevinus sanctę Rufinę Episcopus subscripsi.
- + Ego Albericus Hostiensis Episcopus subscripsi.
- + Ego Stephanus Prænестinus Episcopus subscripsi.
- + Ego Imarus Tusculanus Episcopus subscripsi.
- + Ego Gregorius Diaconus Cardinalis Sanctorum Sergii & Bacchi subscripsi.
- + Ego Orco Diaconus Cardinalis sancti Georgii ad velum aureum subscripsi.
- + Ego Octavianus Diaconus Cardinalis sancti Nicolai in Carcere Tulliano subscripsi.

Dat. Lat. per manum Gerardi S. Rom. Ecclesię Presbyteri Cardinalis ac Bibliotecarii 4. Idus Ianuarii. Indictione VII. Incarnationis Dominicę Anno M. CXLIIII. Pont. verò Domini Cælestini Papę II. Anno primo.

Annus Christi, 1144.

CAPVT SEXTVM.

Elucidatio Ecclesiarum Ordinis quę in Bulla recensentur, cum specificatione aliarum ad eundem Ordinem antiquitus spectantium.

Quanta fuerit eminentia almi Ordinis Canoniorum Sacrosancti Sepulchri, dum adhuc in Palestina res Christianorum integrę erant, vel ex hac præinserta Bulla quisque facile agnoscet, cum & possessionum & præcipuarum Ecclesiarum, quę in ea recensentur, numerum apud se expendet.

Vitriacus
Historia Hierosolymitana
abbreviata cap. 52.
fol: 1075.
Ioā: Cotou:
lib. 2. c. 9.
fol: 248.

Acto: 9. 10.
Theatrum ter-
ra S. f. 23.

Porro omitta possessionum ad ordinem spectantium declaratione, ipsarum saltem Ecclesiarum veneranda maiestatem, silentio præterire non licet. Inprimis quod attinet Ecclesiam Quarantanæ; Fuisse hanc celebrem ad montem altum, & ascensu difficilem densis sylvis constitum inter Hierusalem & Iericho, ab Helena in memoriam sancti Ioannis Baptistæ constructam; ad quam postea opera Christianorum Principum; satis amplum Monasterium accessit, narrat Vitriacus; cuius etiamnum peringentes superesse reliquias, cubacula nempe & fornices aliquot, collapsa tamen & ruinosa omnia, Ioannes Cotouicus in suo Itinerario Hierosolymitano recenset. *In quo loco venientem ad se Christum ut baptisaretur, S. Ioannes illa verba promens ecce Agnus Dei, digito demonstrasse fertur. Vbi etiam Christus solitarius, quadraginta diebus & noctibus ieiunasse perhibetur.*

Ecclesia sancti Petri in Ioppe vrbe antiquissima, à Iaphet filio Noë, ante diluuium condita, sita ad mare in edito promontorio, littore saxoso, alto & arduo, adeò ut Hierosolyma conspici possit. *In hac D. Petrum, Tabitam à morte suscitasse, hic hospitatum apud Simonem Coriarium cuius domus erat sub rupe posita, iuxta mare, quo loci postea hæc celebris Ecclesia in honorem ipsius constituta fuisse dicitur: eo loci viros quoq; de Cesarea à Cornelio Centurione*

Angeli monitu missos eum excepisse constat. Hic etiā extra se raptum, vidisse vas instar linteī magni ē cælo in terram demissum, quadrupedibus, serpentibus, & volatilibus cæli refertum, audiuisseq; vocem de cælo dicentem sibi: Petre occide & manduca. Acta Apostolorum testantur. Hanc quondam Episcopali sede, quæ Patriarchæ Hierosolymitano suffraganea erat, Christianis Palestinam moderantibus, claruisse, & Canonorum sancti Sepulchri magna ex parte hæreditariam fuisse, præcipui illius aui scriptores memoriæ prodiderunt: postea expugnatam à Turcis ciuitatis faciem amisisse, & lapidum potius congeriem nunc, quam Ciuitatem appellandam censet Cotouicus.

Ecclesia sancti Sepulchri in Acon: quæ alio nomine Ptolomais vel Ptolomaida, à Ptolomæo quondam Rege sic dicta; ab Hierosolyma triginta sex milliari- bus distans, Episcopali sede quæ Tyrensi Archiepisco- po suberat quondam clara. In hac vrbe, vt Bulla do- cet, templum insigne S. Sepulchri, & magnis redditibus dotatum, Canonici Hierosolymitani habebant.

Ibidem non procul à Ptolomaida Ecclesiam sanctæ Mariæ ad Numas dictam, frequenti peregrinatione hominum illustrem possedisse noscuntur.

Ecclesia S. Mariæ in Ciuitate Tyro, omnium quas Phania habet maxima, & munitissima, ac vniuersa Phanices Metropoli, quæ propter negociationem, opulentiam, ac populi frequentiam, nedum in profa-

Ioan: Coto:
Itinerario
Hierosoly-
mit. lib: 2.
c. 1. f. 134.

Adricho: in
Theatro ter-
rae sanctae
fol: 9.

Adrichon:
Theatro ter-
rae sanctae f.
86.

Ioan: Coto-
nicus Itine-
rario Hiero-
solymit. l. 2.
c. 1. f. 137.

nis, verum & in sacris literis longè est celeberrima, quam etiam Archiepiscopali Cathedra (cuius post Patriarcham Hierosolymitanum proxima erat dignitas) nobilitatam fuisse constat. In hac vrbe præter Ecclesiam S. Mariæ, Templum Cathedralē titulo S. Sepulchri insignitum, Adrichomius commemorat. Vbi Friderici Barbarossæ corpus, dum fusos insequitur hostes, flumen traicere volens, ab equo lapsus, & armorum onere ab aquis obrutus, celeberrimis exequiis omniumque luctu, sepultum esse memoriæ proditur. vbi etiam illustre Origenis sepulchrum, insigni titulo in marmorea columna, auro gemmisque ornato tum visebatur.

Ecclesia S. Sepulchri in Monte Peregrino: Castrum hoc erat & oppidum, naturali situ & artificum industria egregie munitum. Quod Raymundus Comes Tholosanus, in monte quodam ante Urbem Tripolitānam, vix ab ea duobus miliaribus distante, condidisse, eique, quoniam peregrinorū opera construebatur, Peregrini nomen indidisse fertur; vbi vir magnificus Ecclesiam insignem, sub titulo sancti Sepulchri exædificasse, liberaliterque dotatam, eiusdem tituli Canonicis perpetuo regendam tradidisse comperitur.

Ecclesia S. Georgij in Montanis; Quintuplicia à Historiographis, qui de locis sanctis scripserunt, recensentur Montana, Ephraim, Ebron, Iudæa, Moab, & Saran. Fanum hoc diui Georgij, ad Canonicos S.

Sepulchri

Sepulchri pertinens, in Montanis Iudeæ conditum fuisse versus Liddam urbem antiquissimam, Diospolim antiquitus appellatam, D. Gregorij martyrio ac tumulo & inprimis Petri Apostoli prædicatione & miraculo celebrem, in martyris memoriam à Richardo Angliæ (vt aliqui putant) restauratum, supra fundamēta antiquioris delubri, à Cæsare Iustiniāno olim erecti, compertum ex Historicis scriptis habetur; Id hodie partim in Messitam Turcorum versum, partim etiam cum adiuncto Monasterio, in Caligerorū Græci ritus monachorum domicilium cessisse, narrant hi, qui nuper loca sancta adierunt.

In Regno quoque Neapolitano, hanc congregationem, multas Ecclesias & Conuentus possedisse narrat Syluester Marulus. Ac inter cætera Ecclesiam S. Sepulchri, quæ etiam in Bulla recensetur; Similiter Brundusij & Barleti, quæ olim Barulum communiter dicebatur. Item Venusiæ quæ Venosa & Venusium nominatur antiqua Apuliæ Peucetiæ vrbe, Horatij Flaci Poëtæ patria. Troiæ etiam & Beneuenti ante portam S. Theodori martyris, clarissimis regni Neapolitani urbibus, celebres olim fuisse Ecclesias Canoniorum S. Sepulchri idem Syluester Marulus recenset.

Per Siciliam quoque prædictam Congregationem dictus author sparsam fuisse tradit. Nam & Messanæ, vrbe Archiepiscopali, emporio celebri, Ecclesiam S. Crucis quæ non multum à muro ciuitatis distabat, pulchra & eleganti antiqua forma, cum precioso pa-

Syluester
Marulus in
suo Mari o-
ceano omni
um ordinū.

uimento, habentem amplum adiunctum Prioratum narrat dictus author. Quam Ecclesiam vna cum alijs viginti duabus fuisse destructam, & terræ adæquatam, ex ordinatione Ferrantis Gonzagæ pro illo tempore Viceregis Siciliae, accedente consensu Antonij Liguame Archiepiscopi Messinensis, in mense Iunio anni 1537. refert. Quo tempore loco placandæ iræ Diuinæ, etenim tota insula erat plurimum afflicta, partim à terræ motu, partim ab insolito incendio, de Mongibello, quod præter flammam & lapides, quos foras eijciebat, & edebat sonum ad instar tonitruui, euomebatque cineres ambutos, qui ad centum milliaria vndiquaque; terram cooperiebant, & fauillæ flammarum, ac petrae cum tanta violentia prosiliebant, vsque ad Ciuitatem Messanam, & Falernum, & ad Ciuitatem Costinam Calabriae, vt suo impetu obuias Ecclesias & Monasteria prosterneret. Tali ergo, inquam, luctoso tempore, loco placandi Diuini numinis, adæquarunt tot sacra templa. & altaria, authores tamen adeo impij sacrilegij non remanserunt impuniti: Si quidem, quemadmodum notat Franciscus Manrulicus lib: 6. historiae suæ Siciliensis, manifesto Dei iudicio, omnes intra annum perirerunt. Et vnus Canonicus appellatus Andreas Simonis, qui ex parte dicti Archiepiscopi, primum ictum dedit in demoliendis ijs Ecclesijs, mortuus est ex vno graui vulnere, Diuinitus in caput inflicto, ob eam causam, quod ausus fuerit primus sacras aedes demoliri. Sed redeundo ad nostrum pro-

positum

positum (pergit Marulus) Ecclesia dicta & Prioratus sanctæ Crucis, fuerunt ab alienata à prænominatis Canonicis Regularibus sancti Augustini, illo ipso anno, quo templum fuit demolitum, vnà cum edificiis ipsius Prioratus. Ius autem præsentandi remansit penes Regiam Maiestatem, atq; eius mādato is Prioratus translatus fuit in Ecclesiam S. Pelagiæ, cuius ad præsens est Prior Commēdatarius Dominus Don Andreas Roza, vir reuera optimorum morum & probitate vitæ. Alter Prioratus qui adhuc restat, & habet amplas possessiones & feuda, est sancti Augustini extra muros Ciuitatis Piacensis, fundatus à Simone Comite de Butera, quemadmodum clarè apparet, ex concessione & Priuilegio dicti Simonis Comitis, & suæ vxoris D. Thomæ Comitiſſæ, vigore cuius Priuilegij dant illi & concedunt Ecclesiam gloriosi Apostoli S. Andreae extra muros Ciuitatis Piacensis, cum quatuor mollis & alijs possessionibus, ad dictam Ecclesiam spectantibus, Cappellam S. Agathæ in territorio eiusdem Ciuitatis Piacensis, prædium de Gallimica cum quinque colonis: Ecclesiam sancti Georgij iuxta Buterum cum suis pertinentijs. Ecclesiam antiquam S. Mariæ Piacensis cum omni planicie, aruis & vineis illius, & libero vsu lignorum, sub data pridie Calendar. Octobr. Anni 1106. Indictione 12. Cuius Prioratus prouisio in præfenti spectat ad Regiam Maiestatem. Et Priores Ecclesiæ dictæ, vsque ad hoc tempus deferunt in sinistra parte pallij crucem rubei coloris, cum inscriptione, *In*

*hoc signo vinctes; Et existimo hæc fuisse arma & insignia prænominatæ Religionis. Nunc autem illius Ecclesiæ Prior est Illustrissimus Dominus Iacobus de Bathumio Doctor S. Theol: & Capellanus suæ Maiestatis dignissimus. hæc Marulus. Cum autem nullam haberet, vir alioquin solertissimus, aliorum Conuentuum præfati Ordinis notitiam, maxime qui per Germaniam, Silesiam, Vngariam, & per nostram Poloniam frequentes consiliunt, deplorare videtur nobilissimi olim Ordinis, iniquam sortem dum ait: *Et quidem ex tota ista congregatione & ordine, nihil aliud restat, nisi duo ipsi Prioratus Piacensis & Messinensis. Res, inquit, certè digna cōpassione, quod una religio adeo antiqua, nobilis, & locuples, fructifera arbor in horto S. Ecclesiæ, per incursiones barbarorum, in illis locis sanctis fuerit funditus extirpata, sine aliqua sui memoria. Verum non te adeo dubitare oportet Docte Marule inuenies hanc plantam Sepulchri Domini in multis alijs orbis Christiani Prouincijs fæliciter propagatam, quemadmodum id libro tertio à nobis demonstrabitur: Manebitq; & dilatabitur sub sancto Dei Patrocinio hic antiquissimus Ordo in tempora longissima.**

Adhæc in eadem Bulla Cælestini, recensetur Ecclesia, quam ordo noster habet in Episcopatu Constan-

tinensi,

tinensi, in villa quę vocatur Detrendorf. De hac etiã meminit Aubertus Miræus Protonotarius Apostolicus, in libello de origine & progressu Canoniorum Regularium. Et in alio loco alterius mentionem facit, dum ait; In Regno Aragoniæ in oppido Calataum, est illustris Abbatia sancti Sepulchri, cuius loci Religiosi crucis signum in veste exteriori gestant. Fallitur proinde in sua opinione Raphaël Volateranus, qui lib: 21 Comment. Vrbanoꝝ, Ordinem sancti Sepulchri cum rubea & gemina cruce pene interiisse dicit.

Aubert' Mi-
raus de orig.
Canon. fol.
150.

CAPVT SEPTIMVM.

Canoniorum sancti Sepulchri, quę fuerunt antiquę obseruationes, quę Ordinis prerogatiua, testimonium Iacobi de Vitriaco.

QValem verò vitæ normam, posteriores illi ordinis nostri Hierosolymitani Patres seruauerint & ad quæ tenenda obligati fuerint, Iacobus Vitriacus Cardinalis & Episcopus Aconensis, qui vitam conuersationemque illorum tanquam proprius illorum Patriarcha satis exploratam apud se habuit, tali scripto ad posteros transmisit: *Illi, inquit, qui Canonici dicuntur, Beati Augustini Regulam pro fundamento Religionis habentes, media & regia via incendentes, secundum primas regularium insti-*

Aubert' Mi-
raus de pro
gressu Cano-
nicorum Re-
gular. c. 5.
fol. 23.

tutionum obseruantias, camisiis & femoralibus, superpelliciis & pellibus, culcitris & linteaminibus utuntur, camisas & femoralia de nocte non deponunt. Post matutinas ad cubiculum reuertentes, causa recreationis dormiunt. Nouem lectionum numerum in nocturno officio non excedunt. Tribus diebus in hebdomada carnes edunt, pisces, oua, & caseum in Refectorio diebus aliis manducant. Ipsis autem prandentibus, unus eorum diuinarum scripturarum recitat lectiones; Sub unius Prepositi vel Prioris obedientia continenter viuunt. Proprium autem eis habere non licet. Animarum curas licitum est eis suscipere, & Ecclesias parochiales regere. Alias preterea habent Canonicas institutiones, & decreta, quae si diligenter, & cum timore Diuino obseruare, & adimplere studuerint, manna absconditum, & thesauros indeficientes, & praemium sempiternum, in splendoribus Sanctorum gloria & honore coronati possidebunt. Vnde igitur illis, qui murmurantes, queruli, loquaces, & garruli, mendaces & detractores, inter fratres discordiam seminantes, ignari, ociosi, & desides, secundum desideria sua ambulantes, inflati & inanes, inuidi, contentiosi &

impatien-

impatientes, auari & ambitiosi, incompofiti & imprudentes, gula & renibus frena laxantes, maioribus suis inobedientes, & primum votum irritum facientes, tam sanctum Ordinem, quasi contemptibilem reddiderunt, multos scandalizantes, & tanto laicis impiores, quanto in operibus sanctitatis, prout altitudo, gradus, & ordo professionis exigit, debuerunt esse priores. De quibus scriptum est meretrices & publicani praeceperunt vos in regnum caelorum, ipsi enim tanquam sepulchra dealbata, intus autem pleni immunditiis, & ossibus mortuorum, & putredine cadaverum, adeo fetentes, in naribus bonorum virorum secum cohabitantiū effecti sunt, quod multi, cum iam sustinere non possent, ab eis discesserunt, ad aliam religionem, mutato habitu, fugientes. Quidam autem in eodem habitu, & sub eadem Regula permanentes, praedictis velut foliis defluentibus, fortiter perstiterunt, ad observantiam Regulae sanctae, & reformationem Regularium institutionum, tam in se, quam in aliis tota virtute laborantes, & totis desideriis anhelantes. Ita Iacobus Vitriacus de Canonicis S. Sepulchri; Qui etiam de praerogatiua dicti ordinis haec diligenti observatione digna recenset. Habet, inquit, Hierosolymitanus Patri-

Iacob. Vitriacus in Hierosol: Historia abbreviata cap. 58. fol: 1078:

archa, Abbates & Priores sibi subiectos, Insignia, pontificalia, baculos scilicet & mitras, annulos & sandalia, ex priuilegio dignitatis habentes, Domino Patriarche in ministerio reuerenter assistentes. Patriarchalis si quidem Ecclesia, quæ est Dominici Sepulchri, sub Monte Caluarie, Canonicos habet Regulares, secundum habitum & Regulam Beati Augustini viuentes. Habent autem Priorem, ad quem cum predictis Canonicis pertinet eligere Patriarcham, qui est eis loco Abbatis, hæc ille. Proinde omnino cæcutire ille facile conuincitur, qui Canonicalem titulum ac dignitatem ab ordine Clericorum sancti Sepulchri abstrahere nitatur, cum illi iidem sint, qui ab ipsis nascentis Ecclesiæ primordijs, cum Iacobo Apostolo Fratre Domini Hierosolymis morabantur.

Dixerit fortasse aliquis, amissa Custodia Sepulchri Dominici, illiusque Canonicis in remotas & diuersas Orbis Prouincias translatis, nihil sibi amplius superesse ad id nominis retinendum? Erraret profecto qui ita sentiret, nec enim paternæ stirpi ac cognationi, hæreditatis amissio cognomen paternum atq; adeo ipsam genealogiam in successoribus euacuat; Et quemadmodum Nilus fluuius in varios riuulos & brachia deriuatus nomen suum non amittit, omne namque deriuatum naturam sui primitiui consecrari solet: ita Ordo & Congregatio Canonikorū sancti Sepulchri

vbiq̃ue

vbique nunc extitit, quæ olim diuque Hierosolymis
steterat maximè eo loci, vbi sacrum illud institutum
sub omni fide & religione illibatum conseruatur, si-
cut in Conuentu Miechouiensi videre licet, meritoq;
illius religiosos Clericos tali honore & nomine cen-
seri debere. Summa enim Dei prouidentia factum com-
perimus, quod nunquam sacrum illud Canoniorum
Collegium Sepulchri Dominici penitus extinctum
fuerit, sed successio illorum, varijs licet attrita casu-
bus, (vt nulla cunctis sub sole longi temporis fælicitas)
perpetua mansit, iugiterque etiam nunc, quemadmo-
dum inferius clare monstrabitur, permanet.

CAPVT OCTAVVM.

*Patriarcharum Hierosolymitanorum continuatio,
Militarium Ordinum institutio, Balduini tertij
Regis Hierosolymitani Religiosa in Ordine Ca-
nonico professio, Elaxe Equitis Poloni in terram
sanctam profectio.*

ARnulpho in ordine tertio Patriarcha Hieroso-
lymitano, de quo superius egimus, rebus huma-
nis exempto. In eius locum Guarimundum na-
tione Francum, Diæcesis Ambianensis, virtutibus
& integritate vitæ pollentem, successisse narrat Ty-
rius. Anno Dñi 1118. Sub quo Hierosolymis Ordo
Templariorum initium sumpsit, qui vrbi custodiendæ,

Lib: 2. c. 4.
Obitus Ar-
nulphi Pa-
triarchæ.
4 Patriarcha
Hierosoly-
mitan^o Gua-
rimundus.
Annus Chri-
sti, 1118.

P

adducen-

Vilhel: Ty-
rius l. 12 c. 7
Gene: Chrō.
L. 4. 605.

adducendisq̃ue tuto & reducendis ijs, qui nauibus ap-
pulsi peregre ad urbem remearent destinati erant: Hi
quoniam iuxta Templum Domini in Palatio Regio
mansionē habebant, Fratres militiae Templi; vel Tem-
plarij vocabantur; quibus postmodum de mandato
Honorij Papæ Secundi, Ordinatione Stephani Patri-
archæ Hierosolymitani, albus vestitus cum cruce
de panno rubeo, non verò de serico, ad differentiam
Canonicorum, assignatus fuit. Nouem autem annis
(ait Tyrius) post eorum institutionem, in habitu fue-
runt sæculari; talibus vtentes vestimentis, qualia
pro remedio animarum suarum populus largiebatur.
ijs Diuus Bernardus certam formam obseruationis in
Concilio Trecen. constituit, qui etiam ad eosdem per-
utilem libellum scripsit, qui tum laudes eorum, tum
exaltationem continet. Cuius est titulus; Ad Milites
Templi. Eorum quoque præconia texuit Petrus Clu-
niacensis in Epistola ad Euerardum Templariorum
Magistrum. Qui breui tempore in præcipua orbis
Christiani dispersi regna, & pia largaque beneficentia
hominum, immensis locupletati opibus, cum se se in
aulas Principum insinuassent, neglecta humilitate, que
omnium virtutum custos esse dignoscitur, ita dege-
nerarunt à sua maiorumque virtute, & pristino in-
stituto, vt de tollendis illis Principes consultaerint,
extinctique perinde sunt sub Clemēte quinto & Hen-
rico Rege Galliarum 7. Anno 1307. Eorumque bona
partim Rhodijs militibus, partim nouis familiis attri-

buta

buta. De quorum Instituto & excidio, si quis plenius edoceri cupit, legat Acta Concilij Trecentis Gallica sub Honorio Secundo, & Concilij Generalis Vienneſis ſub Clemente 5. Albertum Crantium in Vandalia lib: 7. cap: 47. Annales Eccleſiaſticos Baronij Tom: 12. Anno 1118. cap: 21. It. Anno 1127. cap: 8. Item Tom: 14. Anno 1307. cap: 4. & ſequentibus; Cromerum de rebus geſtis Polonorum lib: 6. Item: lib: 8. & paſſim apud alios. Mortuo poſthæc Guarimundo Stephanus in ordine quintus, antea Abbas S. Ioannis Carnotenſium, poſtea profeſſione Canonicus S. Sepulchri, affinis Balduini Regis, ſicut nobilitate, ita & moribus præſtans, in demortui locū ſucceſſiſſe narratur, ſed non diu Eccleſiæ Hieroſolymitanæ præfuit, exacto ſi quidem in Cathedra Iacobi tantum biennio, fatiſ conceſſiſſe legitur anno 1130. In cuius locum, electione venerandi Capituli Domini Sepulchri, Vilhelmus Belga, Prior eiufdem Conuentus vir (quemadmodum ſcribit Tyrius) forma decorus, & valde deuotus, in ordine Patriarcharum ſextus anno eodem ſucceſſit: Cuius temporibus alter ordo militiæ ſacræ, Hieroſolymis inſtitutus eſſe comperitur; qui etiā excubias ageret, pro Chriſtiano orbe perpetuas, & Regi aſſet in reprimendis & extirpandis hoſtibus, nouo Regno infeſtis, finibusque tutandis; & præſtaret accedere terram ſanctam volentibus, tuta itinera, terra marique latronibus depulſis: Hic Ordo Hoſpitalis a profeſſione S. Ioannis Baptiſtæ no-

Concilia
generalia &
prouincialia
Tom: 3. fol.
471. It: Fo-
lio 763.
Albert. Crāt
lib. 2. Vand.
Cap: 4d.
Hiſto: Ecc:
Michael:
Buchingeri
Fol: 259.
Obitus Gua-
rimundi. Pa-
triarchæ Hie-
roſolymit.
Patriarcha
Hieroſolym
Stephanus.

Annus Chri-
ſti, 1130.

6 Patriarcha
Hieroſoly.
Vilhelm⁹.

Annal: Ec-
clesi: Barón.
Tom 17. An
no, 1198.
cap: 12.

men adeptus initio, posteriori demum tempore, Dominorum Rhodiorum titulo celebratior, notiorque euasit, cuius ordinis professi, in peculiari habitu, albam crucem deferebant, qui cum plurimas maris Mediteranei insulas, bello domitas, perpetuo contra Saracenos & Turcas præsidio muniuisset, magnò Europæ vniuersæ cum commodo, diu enim represserant hostes magno successu, adiuti vicinorum Regum & Imperatorum auxiliis. Nunc deserti ab omnibus, & Imperij Turcici circumfusa potentia fracti, Rhodiam pridem amissa, ægre se se intra Melitæ Insulæ angustias tuentur & sustinent; appellanturq; nunc cōmuni vocabulo Melitenses, seu Maltenses milites, de quibus abundè Iacobus Bosius lucidissimus scriptor, in eorum Historia; nobis attigisse satis. Posteriori demum tempore Anno videlicet 1198. post amissam Hierosolymam, tertius ordo Religiosæ militiæ, apud urbem Ptolomaidam, vbi multi Christianorum ab Hierosolymis diuerterant, sub titulo Hospitalis B. Virginis Teuthonicorum (nam in ordinem non nisi Germani, iidemq; nobiles admittebantur) cæptus esse inuenitur, qui ex vtroque priorum mixtus fuit, nam & ipsi recipiebant peregrinos; & necessitate exigente, etiam armis pro religione pugnabant. Hos Celestinus Papa huius nominis tertius, rogatu Henrici Imperatoris, veste alba & cruce nigra donauit, subiecitque sub Regulam S. Augustini. Quos Conradus Mazouiae Dux, feritate ac varijs Prussorum afflictionibus attri-

tus,

tus, Anno 1230. ex Almania in Poloniam euocasse, ipsosque in primario eorum aduentu, in Castro Dobrzyn locasse, à Scriptoribus Polonicis memoriæ proditur. Hi postea aucti sunt Liunionensibus, qui illis se adiunxere: Horum perfidiam Poloni multoties experti, cum eos nulla ratione ad officium reuocare & in fide constabilire potuissent, ferro tandem illos sustulerunt, & ius suum antiquum in Prussia, abolito illorum Ordine, recuperauerunt. De quorum initijs & progressibus, plura legere licet apud Crantium lib: 6. Vandal: cap: 28. Item apud eundem in Saxonia lib. 8 cap. 3. Item in Metropoli eiusdem pluribus in locis, passim quoque apud scriptores Polonicos. Scitè admodum Andreas Critius Episcopus Præmyslien: ad Ioannem Antonium Puleonem Nuncium Apostolicum in Vngaria, de Duce Creato in Prussia scribens, triplicem Ordinem cum cruce in ditione Polonica constitutum tali Epigrammate notauit.

Annal. Ec-
cl: Tom: 12.
Anno 1198.
cap: 2.

Tres constant cruces, trino tinctæq; colore.

Has vesti impressas, trinus & ordo gerit.

Est rubea, hæc rectè Domini censetur Iesu,

Sanguine quæ illius facta cruenta fuit.

Est alba, & rectè hæc Latroni congrua dextro,

Mundarunt cuius paucula verba nefas.

Nigra est postremo leui Latronis & ista,

Quam rectè illius, non minus ordo probat.

Historia Ec-
cl: Buchin-
geri f. 279.

Christ: Lō-
gie præf. ad
Lect. Anno
1617. edita.

Basil: Seren.
assertione
pro Regul. S.
Aug: f. 50.
& sequenti.

Floruisse autem iisdem penè temporibus in Hispania sacros similiter ordines militares, videlicet S. Iacobi, & Calatrauæ docet Baronijs. Iacobus etiam Rex Aragonum, duos Sacræ militiæ ordines, circiter annum salutis 1212. instituisse fertur; quorum alterum D. Mariæ de redemptione captiuorum siue de mercede appellauit, vt pote quibus de captiuis redimendis cura esset. Hi amictum album, cum nigra cruce induunt; alterum Montesiæ milites, cruce rubenti insignes nuncupauit, vtramq; autem militiã Gregorius 9. sua auctoritate probauit; vide Aubertũ Mirẽum de origine Equestris Ordinum. Idcirco autem Institutiones militarium ordinũ, hic obiter recensere operæ pretium duximus, quod nuper scriptum quoddam apparuerit, vbi parum æquus æstimator, & vt prouerbio dici solet, Foris linx domi talpa, antiquum ordinem Canonicorum Sepulchri Domini, quasi sibi de illo non constaret, vel nullibi vnquam constiterit, suppresso titulo, & alieno spolio seipsum ornans, sub Militari eum, non determinata etiam Militaris ordinis specie, ponere atque adeò confundere non est veritus; proinde vt pronum sit ventosum scriptum refellere, facilè quisque animaduertet, habita ordinum Militarium institutionis ratione, quam vanum sit istius hominis commentum. Sciat autem non a phorrire Canonicos S. Sepulchri à sacris militaribus ordinibus, quorum vetustissima primordia (teste Basilio Serenio) non à quopiam alio, præterquam ab ipsis Religiosis Hierosolymita-

nis

nis Clericis, profecta memorentur, diuq; sub commu-
nicatione cum Regulæ, tum ordinis Canonici, degis-
se probentur. Sed prosequendo nostrum institutum
tempore Vilhelmi Patriarchæ, Balduinus tertius Rex
Hierosolymorum cognomento de Burgo, consan-
guineus B. Godefridi, anno regiminis sui decimo ter-
tio, Christi vero 1131 prout scribit Tyrius, accitis filia
primogenita Milisenda & marito eius Fulcone
Andegauensium Comite, pueroque illorum nepote
suo Balduino iam bimulo, coram Patriarcha & Baro-
nibus, se Regali exuens dignitate, genero Fulconi fi-
liæque, sceptrum Regni concessit, ipse verò relicto
propter Deum Imperio, Ordinem Canonicorum S. Se-
pulchri, cuius profitendi à multo tempore summo desi-
derio flagrabat, ingressus est. Quorum religiosam vi-
tam professus, & illorum habitu indutus, tumultuario
Regali officio, illum præponebat, tandem ad metam
properando, Beatorum consortio est sociatus in cæ-
lis: de quo multa apud Tyrium inuenies. Postmodum
etiam Vuilhelmus Patriarcha, exactis in sede Hiero-
solymitana annis quindecim, graui morbo correptus è
vita migravit 5 Calendas Octobr. Anno Dñi 1145.
cui persolutis iustis, Fulcherium Tyri Archiepisco-
pum ex ordine Canonicorum S. Sepulchri professum
natione Aquitanicum, in ordine Patriarcharum se-
ptimum concordivocè Fratres elegerunt. In Tyren:
vero Cathedram, Petrum Hispanum Dominici Se-
pulchri Priorem suffectum fuisse narrat Tyrius. Per id

Balduinus
3 Rex Hiero-
solymit. fit
Canonic. S.
Sepulchri.
Annus Chri-
sti, 1131.

Vuilhelm.
Tyrius l. 13.

Annus Chri-
sti, 1145.

7 Patriarcha
Hierosoly.
Fulcherius.

temporis

Vithel: Ty-
rius lib: 8.
cap: 19. &
sequentib.

Obitus Ful-
cherij Patri-
archæ Hie-
rosolyimi-
tani.

Annus Chri-
sti, 1155.

8 Patriarcha
Hierosoly-
mitanus Al-
mericus.

Expeditio
laxe equitis
Poloni in
terram san-
ctam.

temporis circa Epiphaniarum diem, Ecclesia Do-
minici Sepulchri cum Delubro montis Syon, horren-
do ictu perculsa a Scriptoribus illius ævi perhibetur.
Cometem præterea multis diebus arsisse, aliaque inu-
sitata signa futuri mali prænuntia, in nubibus appa-
ruisse dicuntur. Interim Fulcherius Patriarcha sedis
sue Anno 11. sanctissimis Sacramentis ritè expiatus,
cum optima aternæ salutis spe, cessit è vita 12 Calend:
Decembr. Anno 1155. Postquem, munus Patriarchale
Almerico, Ecclesiæ Dominici Sepulchri Priori, gene-
re Gallo ex oppido Neella Episcopatus Nouionen-
sis, vnanimi consensu Fratrum demandatum est anno
eodem; Quem virum commodè literatum, & vitæ in-
tegerrimæ scribit Tyrius, fuitque is in ordine Patriar-
charum à recuperatis Hierosolymis octauus. Cuius
temporibus laxa nobilis Polonus, de domo & Familia
Griphium, vir & antiquissimæ familiæ splendore
(quemadmodum Dlugosus scribit) & bonorum tem-
poralium affluentia longè clarissimus, qui multis & il-
lustribus ex gente Polonorum itineris sui acceptis comi-
tibus voto pie suscepto, ad Gloriam Dei & Catholice
fidei propagationem, in Palestinam profectus est, ibi-
demque aliquot annis in bello Asiatico egregiam
operam nauasse, à Scriptoribus Polonicis memoratur.
Qui inde rediens vnum de Canonicis Almi Collegij
Sepulchri Domini secum in Poloniam deduxit; & in
paterno solo collocatum, bonorum suorum ad per-
petuam memoriam Sepulchri Domini, eiusque sa-

cri collegij, hæredem fecit. De cuius propagine, fau-
stisq̃ue per regnum Sarmatiæ incrementis, Deo adiu-
uante, tertio libro tractare proposuimus.

CAPVT NONVM.

*Ecclesie SS. Sepulchri Domini Hierosolymitani suc-
cincta descriptio, eiusq̃ Encomia.*

EXplicatis hoc secundo libro, Canonicoꝝ Hie-
rosolymitanorū ad Ecclesiam sancti Sepul-
chri nouæ institutionis rationibus, nō absre me
facturum existimo, si coronidis vice libri huius, sacra-
tissimæ Ecclesiæ, à magnis & vitæ sanctitate clarissi-
mis viris, iam pridem de ea celebrata encomia, quasi
in fasciculum collecta, piorum lectorum oculis subie-
cero. Ac verò imprimis Doctoris melisflui D. Bernar-
di, venerandam authoritatem hac de re in medium
proferri lubet. Is namq̃ue præclarum de hac ipsa Ec-
clesia ad Milites Templi sermonem instituens, tali ad
eos potissimum vtitur *Αὐτῶς ποφν*. *Inter sancta ac desi-*
derabilia loca, Sepulchrum Christi tenet quodam-
modo principatum, & deuotionis plus nescio quid
sentitur ubi mortuus requieuit, quàm ubi viuens
conuersatus est, atque amplius mouet ad pietatem,
mortis quàm vitæ recordatio, puto quod illa auste-
rior, hæc dulcior videatur: magis quippe infirmi-

D. Bernar.
serm: ad Mi-
lites templi.
c. 11. f. 836.

tuti blanditur humane quies dormitionis quam labor conuersationis, mortis securitas quam vitæ re-
 ctitudo. Vita Christi viuendi mihi regula extitit, mors à morte redemptio, illa vitam instruxit, mortem ista destruxit: vita quidem laboriosa, sed mors pretiosa, utraque verò admodum necessaria, &c. Et inferius: siue itaq; hæc, siue alia quæcunq; in hunc modum, (prout in talibus in suo quisq; abūdat sensu) ex occasione sepulchri Christianis sensibus suggerantur, puto quod non mediocris dulcedo deuotionis infundatur cominus intuenti, nec parum proficitur, cernendo etiam corporalibus oculis corporalem locū Dominicæ quietis: Et si quippe iam vacuum sacris membris, plenum tamen nostris Et iucundis admodum sacramentis. Et paulò inferius: Quam dulce est peregrinis post multam itineris fatigationem, post plurima terre marisq; pericula ibi tandem quiescere, ubi Et cognoscitur suum Dominum quieuisse; puto iam præ gaudio non sentiunt vitæ laborē, nec grauiamen reputant expensarum: sed tanquā laboris præmiū, cursusq; brauiū affecuti, iuxta scripturæ sententiā, gaudent vehementer cum inuenerint sepulchrū. Hæc S. Bernardus. Haud dissimilibus verbis D. Iacobus de Viatriaco S. R. E. Cardinalis idipsum recen-

Iacobus de
 Vitriaco Hi-
 stor. Hiero-
 solymitana
 abbrevi: c.
 61. f. 1079.

set, cum ait: Dominica resurrectionis Ecclesia gloriosa, inter sancta & venerabilia loca non immerito obtinet principatū; nam in hac corpus Domini pretiosum, cum aromatibus honorifice sepultum usque in diem tertium requieuit, die autem tertia resurrexit. In quo loco S. Angeli mulieribus apparuerunt, milites autem Sepulchrum custodientes, veluti mortui effecti sunt. In quo etiam loco in nocte Dominica resurrectionis ignis sacer descendit de supernis. Cum autem per uniuersum mundum à fidelibus dicatur, Surrexit Dominus de sepulchro, qui pro nobis pepedit in ligno, soli Canonici Ecclesie resurrectionis Dominica, speciali gaudent prerogatiua, dicentes, & ad oculum demonstrationem facientes; Surrexit Dominus de hoc sepulchro. Is autem, pergit idem autor, qui dicitur Caluarie locus, Hebraicè autē Golgota, Ecclesie Dominici sepulchri vicinus, (nam eadem Ecclesia sub vno & eodem tecto Resurrectionis & Crucifixionis locum in se comprehendit) inter loca sancta magnam obtinet dignitatem, & maximam ob memoriam Dominice passionis, habet compunctionis virtutem. In quo Dominus passus est pro salute nostra, vestimentis exutus, in Cruce leuatus, clauis affixus, felle & aceto potatus, à Iudæis irrisus, inter

iniquos deputatus, morte ignominiosa cōdemnatus, pro transgressoribus orauit, Matrem suam discipulo cōmendauit, latroni salutem promisit, cum clamore & lachrymis spiritum emisit, ex latere perforato sanguinem & aquam quibus mundum ablueret produxit. In quo loco vestimenta eius diuiserunt, & super tunicam eius sortem miserunt, terra mota est, & petre scisse sunt, sanguis eius in terram cecidit, sol obscuratus radios suos subtraxit. His omnibus dum locus sacer à deuotis peregrinis frequentatur, cor contritum & humiliatum compungitur, & quasi torculari passionis, lachrymæ compassionis exprimuntur. Ita Vitriacus. Qui paucissimis quidē verbis, rem certè satis perse magnam expressit, quantopere Sacrosancta hæc loca, Christi præsertim sanguine, & passione, ac Resurrectione illustrata, homini pio & Christiano, interiores animi sensus moueant, qua mentis cōpunctione afficiant, quem deniq; mundanarū rerum contemptū, vitiorum detestationem, & odium pariant atq; ad diuinum amorē rapiant, vires sibi non suppetere ad explicandū fatentur, si qui illa adire dono cælestis gratiæ concessum sibi agnoscunt. Porro hoc vno ore fatentur omnes, neminem esse tam ferum ac ferreum, neminem tot tantisq; flagitijs ac sceleribus coopertum, qui non in ipso Sacrosancti delubri ingressu, præsentis numinis cælestis religione perfusus, molliori

suum sentiant pectus. Sensit hoc Paula nobilissima Romana matrona, D. Hieronymo attestante, quæ loca illa sacra, tanto ardore ac studio circumeundo venerata fertur, vt nisi ad reliqua festinaret, à primis abduci non posset, prostrataque ante crucē, quasi pendentem Dominum cerneret adorabat. Senferunt idem & adhuc sentiunt, plurimi veræ deuotioni vocantes peregrini, qui inter cætera nostræ salutis monumenta, rupem Domini sepultura clarificatam, eiusque pretioso sanguine purpuratam accedentes, & in contemplatione Redemptionis humanæ defixi, atque in admirationem vestigij tam insignis Dominicæ mortis rapti, diuinum aliquid sæpius patiuntur. Nec mirum, cum etenim eo in loco se esse quis consideret, quo omnium Dominus, Deus & Homo, totius mundi saluator, ac animarum Redemptor, proprium effundere sanguinem; tot pati opprobria, tot affligi pænis, à planta pedis ad verticem vsque capitis flagris cedi non dignatus est, quinimo Crucis subire tormentum ac mortem oppetere turpissimam sponte voluit, vt nos à peccato in suo sanguine lauaret, è faucibus diaboli eriperet, patri reconciliaret, vitamque æternam omnibus promereretur. Qui fieri (inquam) possit, adeo ingratum aliquem esse ac saxeum cor habere, vt præsertim cum se harum omniū pænarum causam esse meditetur, dolore non diffuat, & ex pauescat totus? Quis à planctu, à suspiriis abstineat vel quis commisereri saltim ac compati passioni Christi lubens nolit?

Hieronim:
in Epiph:
Paulæ ad
Eust: Epist.
2 Tom: 2.

Diuina sanè vis, humanos animos, ad hoc ipsum vi-
 detur compellere. Ipse etiam aspersæ Christi sangui-
 ne columnæ marmoreæ, Crucis fouea, eius quoque
 pretioso sanguine purpurata, locus Crucifixionis, vn-
 ctionis petra, ac ipsum denique sanctissimum Sepul-
 chrum, quasi recentia Crucis & Passionis Domini ve-
 stigia, occulta quadam vi compellunt & exigunt, vt
 quisquis accedat, etiamsi ferreus, & adamantinus sit,
 irrigetur lachrymis, atque imò pectore profunda tra-
 hat suspiria, adeoque se totum Christo deuouens ab-
 neget semetipsum, & abiectis vitiis & mundi sordi-
 bus, nudus sequi Christum malit, proq; eius nomine
 grauissima pati, quā mundi deliciis diffuere. Ita sæpe
 peregrini, illam Sacratissimam Ecclesiam accedentes
 & mente cælestia conscendentes, pro lapideis cordi-
 bus, quæ profunda peccatorum cogitatio mouere
 non poterat, in hoc loco carnea statim consequuntur,
 & amore sui Redemptoris ita emolliuntur ac lique-
 scunt, vt admirabili Christi morientis & resurgentis
 spectaculo præsentis adesse videantur. Recenset hu-
 ius rei admirabile exemplum Thomas Cantipraten-
 sis; Quendā ex his assumpta pia peregrinatione ad lo-
 ca sancta Hierosolymis consistentia, cum omnia fere
 loca vestigijs Redemptoris orbis calcata, multa cum
 deuotione & lachrymis lustrasset, tandem ad mon-
 tem Caluariæ veniens, & locum, in quo Saluator no-
 ster crucis supplicium & mortem passus, diligentius
 contemplatus fuisset, in lachrymas solutus. Quid tri-

Thomas Cantipratensis
 tiprat: l. 1.
 cap: 25.
 Annal: Ec-
 cles: To: 13.
 Anno 1216.
 fol: 253.
 Exemplum
 amoris in
 Christū ad-
 mirabile ex
 contempla-
 tione SS.

bi, ait,

bi, ait, benignissime Domine, quid tibi Christe retribuam pro omnibus, quæ pius amator amabilis mihi misero mirabiliter retribuisti, vidi prius loca, in quibus natus & inter homines conuersatus, doctrinam Evangelicam prædicasti & diuinitatis tuæ indicia, per miracula demonstraſti. Hæc quidem propter amorē & reuerentiam tui ſyncero corde complexus ſum, hunc vere paſſionis & mortis locum, æquo animo videre non poſſum, vbi cruci ſuffigi, lancea terebrari, & animam pro nobis tradere voluiſti. Hæc vt Beatus ille perorauit, tanto ſpiritus feruore correptum fuiſſe, vt humi, proſtratus, inter oſcula, ſingultus, & lachrymas vberri- mē perfuſas, exclamans, ruptis vitalibus cordis venis, expirauit. Felix planē & Beatus, cui tantum beneficium diuinitus obtigit, vt morientis & ſepulti Chriſti memoriam ſæliciſſimo vitæ perennis introitu ſubſequi meruerit. Hanc verò Baſilicam B. Helena Auguſta, Pii Cōſtantini pia mater, diuina admonitione conquirendæ Dominicæ Crucis, & ſanctiſſimi Monu- menti ſtudio, iam ferme octogenaria, Hieroſolymam proſecta, & voti ſui compos facta, Anno poſt Chriſtū natū 326. pium deſiderium ſuum Cōſtantino Ma- gno filio ſuo in omnibus promouente, extruxiſſe per- hibetur, totius orbis Eccleſias amplitudine, atque pulchritudine longē ſuperantem. Nam auratis corruſca laquearibus, & aureis diues altaribus, marmoreis ſeptuaginta tribus columnis ſuffulta, ab Adrichomio traditur. Præterea in hac omnes ex Chriſtianis Hie-

Adrichom:
theatr: ter-
re S. in de-
ſcript Hie-
ruſalē f. 176.

roſoly-

Isaia 11.

rosolymorum Reges, dignam corporibus suis sepul-
 turam elegerunt, in qua non minori cultu, quam B.
 Helena Magni Constantini mater, suæ ibidem ma-
 gnificentiae signa reliquerunt. Siue ergo inuentionis
 Dominici Sepulchri primordia spectes, quando sub
 Augusta Helena Augusto templo est inclusum, siue
 posteriora eius tempora, cum Christianorum Regum
 sumptibus ditissime est dotatum, eorumque monu-
 mentis nobilitatum, semper illud Isaia vaticinium lo-
 cum habuisse scias. In ill adie radix Iesse, qui stat in
 signum populorum, ipsum gentes deprecabuntur.
Et erit Sepulchrum eius gloriosum. Quod neque nunc
 quidem veritate caret, cum inter barbaras illas gentes
 diuersissimarum nationum Christiani nominis Mo-
 nachi & Presbyteri, qui suorum ibi eleemosynis alun-
 tur ac viuunt, Diuina sacrificia, suis quisque ritibus,
 ceremoniis, & linguis, in distinctis sacellis & locis pe-
 ragunt, precibus incumbunt, vnoque ore omnes, vnū
 Christum omnium Saluatorem venerantur, atq; ado-
 rant, quotidie etiā sanctissimum Christi Sepulchrum,
 & Caluariæ montis, seu crucis foueam thure adolent,
 ac lampadum suarum singulatim curam habent. Illud
 autem mirandum in hoc templo, tot diuersorum ho-
 minum ex vniuerso penè orbe confluentium, audire
 dissonas voces, melodias, ceremonias, habitus, mo-
 resque, qui licet in multis differant, varijsque inter se
 ritibus sint diuisi, in hoc tamen vno concordant, quod
 Christum Deum laudant, credunt, ac confitentur. Nec

minori

minori admiratione dignum, omnes hasce nationes, inter medios Christiani nominis hostes, ac Saluatoris Christi eiusque Crucis sanctissimæ inimicos acerri- mos, Iudæos dico ac Machometæos, Christum ipsum magnificare, diuinam eius virtutem prædicare, quo- tidianum ipsi sacrificium publicè offerre, ac Deum ve- rum confiteri, (quibus omnibus ipsi vel maximè ad- uersantur) neminē tamen inueniri, qui contradicere, quiue vetare aut tollere, atque abolere ea vllō modo audeat. Et quod magis mireris, licet Turcæ Maurique Christum nequaquam mortuum, sed in cælos assump- tum prædicent, ac certo certius credant, quippe quem immortalem fuisse affirmare non dubitent: Nihilominus tamen sepulchrum eius, mortis & mor- talitatis indubitatum testimonium, in vrbe hac, quam omnes Machometæi religionis ergo frequentant, à tot iam sæculis intactum reliquerunt, atq; etiam nunc relinquunt, neque enim hactenus quisquam repertus legitur, qui illius euersionem vnquā tentauerit, quod diuini sane numinis nutu fieri censendum est. Atque hæc in laudem & gloriam Dominici Sepulchri & Ec- clesiæ eius, quæ apud alios fusissimè tractata inuenies, à nobis breui compendio absoluta, grato animo acci- pe, hincque illud documentum imò pectore repo- situm tene. Si viri Christiani, ex sola visitatione sacra- tissimi Saluatoris nostri monumenti, tantam vt audi- sti accipiunt ac reportant animi sui dulcedinem, & sa- lutem; Quid de Maioribus nostris Canonicis Hiero-


solymitanis censes? quanta illi mentis lætitia, in Ecclesia S. Sepulchri Ordini nostro perpetuo hæreditaria, cui hoc futuræ immortalitatis nostræ pignus, gloriose videlicet Resurrectionis suæ Sepulchrum Dominus reliquerat, Diuinis officiis iugiter insistebant, Passionem Dominicam, & victoriosissimæ Crucis trophæum (prout Bulla Cælestini Papæ II. superius à nobis recensita, clare eloquitur) assiduè oculata fide recolentes, & in loco vbi steterunt pedes Domini adorantes, ac ibidem, vbi Redemptor mundi, pro salute nostra vincula, flagella, crucis ignominiam, vulnera, mortemque sustinuit, regulariter militantes. Quid, inquam, cum prædecessores nostri in Palestina, vbi verus Deus & homo Christus Iesus salutem nostram operatus est, pijs Christianis ductores existentes, loca sacra, viuæ voce, & manu demonstrantes. Hic, (inquit,) æterni Patris Verbum Christus Dominus de Virgine carnem assumens natus est, hic in præsepio reclinatus, hic à Magis adoratus, hic baptisatus, hic miracula patrauit, hic docuit, hic captus, hic illusus, hic flagellatus, hic crucifixus, hic sepultus, hic tertia die deuicta morte surrexit, hinc in cælum ascendit: quanta putas, hæc apud te expendens, interna delectationis suauitate replebantur, quos gemitus? quæ suspiria? quas lachrymas, acceptæ salutis ac tantorum beneficiorum memores Saluatori suo non reddebant? Et hæc quidem maiorum nostrorum laus, quam nos illorum genuina soboles, pene intermor-


tuam;

tuam, in nobis & ex nobis ad gloriam imprimis Dei
Christiani populi profectum, excitare non desinamus.
Vtinam aliquando, ex immensa Dei prouidentia, Re-
ligiosi cuiusdam annuente voto, illa ab omnibus opta-
ta adfulgeat dies, quando Christiani pulsus procul bar-
baris, terræ sanctæ imperium obtineant, videantq;
iterum Canonicos Ecclesiæ Resurrectionis Domi-
nicæ, speciali prærogatiua canentes & de-
monstrantes, *Surrexit Dominus*
de hoc Sepulchro.

Philippus
Boscherus
Franciscus
Philip: ada
fol. 37.

ANNVE MAGNE DEVS.





DE SACRA
ANTIQUITATE
ET STATV
ORDINIS CANONICI CVSTO-
dum Sacrosancti Sepulchri Domini Hie-
rosolymitani.

LIBER TERTIVS.

CAPVT I.

*Ordinis Canoniorum Sacrosancti Sepulchri Hie-
rosolymitani in Regno Poloniae prima initia, ex
Ioanne Dlugosso, aliisque fide dignis scriptoribus
Polonicis recensentur.*



Narratis veteribus, partim per Ori-
entem, partim per alias Christiani
orbis Prouincias, almi Canonicoꝝ
Sepulchri Domini Ordinis initiis
atque progressibus, ad recentiores
in Regno Poloniae vicinisque Pro-
uincijs, dicti Ordinis constitutas colonias, stylum con-
uertim⁹, potissimum verò de Miechouien: Monasterijs;
sicut in Regno Poloniae antiquioris, ita & principalio-
ris origine ac fundatione, Ioannis Dlugossi irrefraga-
bilis authoritas, quem rerum Polonicarū scriptorem

syncerissimum, veritatis amantiissimum, & cæteris
sicut antiquitate ita & veritate præstantem, grauif-
simus Ecclesiasticæ historiæ compiler: Baronius S. E.
R. Cardinalis appellat, in medium producenda occur-
rit: cuius hæc verba habentur.

*Anno Domini, 1162. Magno in Deum &
meritum passionis Iesu Christi, miles nobilis Iaxa de
Miechow armiger Diœcesis Cracouien: actus ar-
dore, vir pro ea tempestate magnarum possessio-
num, atq; opum abundantia insignis, in subsidium
terræ sanctæ, personaliter cum familiaribus atque
armigeris suis profectus, aliquanto tempore illic
moram gessit, & enixius quo poterat pro terræ san-
ctæ defensione cum suis militauit. In Poloniam ve-
rò reuersurus, inter alia deuotionis suæ insignia, apud
Patriarcham sacri Sepulchri Hierosolymitani, &
eius conuentum, sub S. Augustini regula Deo mi-
litantem, bifurcatam crucem rubeam deferentem
obtinueit, ut secum unus ex Canonicis suis, in Polo-
niam Ordinem prædictum plantaturus mitteretur.
Tres itaq; Villas &rimonij, sui videlicet Miechow,
Zagorzyce, & Komorow, in dotem ordini præfato
conferens, in Villa principali Miechow, quam nunc
in Ciuitatem frequentia populorum & reddituum*

Ioannes Dñu
gofus histo:
Pol: lib: 5:
fol: 450:
Annus Chri:
sti, 1162.

creuisse videmus, Ecclesiam & primum Canobium de speciali consensu & voluntate Matthæi Cracoviensis Episcopi constituit. His quoque non contentus, aliud Monasterium in Villa sua Zwierzyniec prope Cracoviam sita, pro Virginibus Premonstraten; Ordinis religionem profiteri volentibus, aliquot Villis etiam illud dotans, erexit. Et ne temporis processu dotatio sua, duobus locis predictis facta, à suis propinquis & cognatis posset labefactari aut infringi, suppliciter illam petijt à Boleslao Crispo Polonorum Duce & Monarcha confirmari. Cuius prestantissimis precibus Dux Boleslaus permotus, & operi sancto confirmationem prestitit, & bona utriusq; Monasterij per Iaxam collata, à Ducalibus servitiis, oneribus, & tributis liberauit. Statuit si quidem ut homines villarum huiusmodi ad expeditionem contra hostes non eant, castra non edificent, Porádlné & Strozne non solvant, Monetario non obediant, Powoz & Poduodas dare non stringantur. Ea quidem duo Monasteria tunc per virum insigne Iaxam in aliquibus villis fundata, post verò Ducum, Episcoporum, nobiliumq; redditibus amplificata, atque impinguata sunt. Hæc Długosus de prima Canoniarum Sepulchri Domini & Monialium Ordinis Præ-

monstraten: in Regno Poloniae fundatione, satis clare demonstravit. Cuius auctoritatem in omnibus sequi videtur Martinus Cromerus rerum Polonicarum scriptor celebris, omnibus non ignotus. Qui cum Henrico Sendomirien: Duce, fratre Boleslai Crispi Ducis Cracouien: germano, ad Hierosolymitanam militiam narrat profectum fuisse laxam nobilem ac locupletem equitem, de familia Gryphium, qui cum in Asia aliquandiu militasset, reuertens, unum de Canonicis Sepulchri Christi Dñi nostri D. Augustini instituto viuentibus, & geminam crucem rubram in toga insigne Professionis suae gestantibus, secum deduxisse, eamque sodalitatem in Polonia propagauisse recenset, condito templo ac domicilio in pago suo Miechovv, quod nunc oppidum est, quinto à Cracouia miliario, eoque & duobus item pagis sodalitati attributo: Cui etiam (inquit) Gedeon Episcopus Cracouienfis decimas quasdam posterius adiunxit. Condidit idem Iaxa dotauitque etiam Monasterium Virginibus professionis Præmonstratensis ut vocant, in suburbano suo Cracouië: quod Zuerinecium, quasi tu dicas viuarium, dicitur. Impe- trauit autem utriusque loco subiectis hominibus à Boleslao Crispo Principe, omnium onerum, munerum, atque pensionum, quae ad Principem ac Rempublicam pertinerent, sempiternam immunitatem. Ita Cromerus.

Quibus Matthias de Miechovv. Canonicus Cracou: & Medicinæ Doctor, non dissimilia scribit. Sic enim ait:

Cromerus
de rebus ge-
stis polono-
rum lib: 6.

Matth: Mie:
in histo. Pol.
lib: 3. c. 21.

Anno

Anno Domini, 1162. Iaxa de domo Gryphonum, fundauit Conuentum in villa sua Miechow, Canonorum Regularium Ordinis sacri Sepulchri Dominici Hierosolymitani, sub Regula S. Augustini militantium, geminam crucem rubram è regione cordis supra vestem gestantium, &c. Syntagmata quoque in membranis manu antiqua exaratis, quæ in Conuentu Miechouiensi extant, idipsum asserere videntur. Narrant enim Iaxam Hierosolymam venisse Anno Domini 1162. biennio verò post, virtutis sue non vulgaribus argumentis editis, strenue aduersus Saracenos decertando, in Poloniam rediisse, & vnum de Collegio Canonorum sancti Sepulchri, Martinum nomine (quod etiam Dlugossus in libro de Monasterijs per Diæcesim Cracouien: constitutis à se elaborato indicat) veluti sempiternum pignus suæ erga Dominicum Sepulchrum deuotionis, adduxisse affirmant Anno Domini 1165. Cui à Principibus regni, satrapis, clero, & populo Polonico, plurimus honos exhibitus esse perhibetur. Vnde ex annorum supputatione colligitur, Hierosolymis tum Patriarchali sedi præfuisse Almericum nomine, non verò Monachum in cuius allegatione Scriptores Polonici alias deuiasse noscuntur, idque intuitu cuiusdam Diplomatis, posteriori iam tempore à dicto Monacho Patriarcha Hierosolymitano pro Conuentu Miechouiensi confecti, quod inferius à nobis producet. Videre autem li-

cet in

cet in isto laudatissimo herodē, cum multas magno in Repub: viro dignas dotes, quas pro salute ac libertate patriæ, vt testantur annales Polonorum, multoties exhibuit, tum præcipuè ardentem in Christum Dominum, eiusque gloriosum Sepulchrum amorem, vnde etiamnum meritorum eius, veneratione digna vestigia elucent, cum per tot Myriadas annorum, suæ liberalitatis in personas Deo deuotas ac dicatas, multosque egenos, vberrimi fontes scaturiant: vt quilibet non obscure iudicare possit, eum talem Christianæ profectiōis scopum attigisse, qui pias peregrinationes obeuntibus propositus esse solet. Nam ad propria fæliciter reuersus, duo in hoc regno celeberrima Monasteria, Miechouiense cum Zuerzynecensi, ab ipso excitata, rebusque omnibus ad necessitatem & conuenientem splendorem instructa, cum deuota ac dulci ipsius Fundatoris recordatione spectare licet. Sic ille in schola Christi pie à maioribus instructus, momentanea hæc & caduca, in via mundanæ huius peregrinationis, spargere & seminare didicit, vt suo tempore cælestia & æterna metere valeat.

Constat verò ea tempestate, qua laxa eximius nationis Polonicæ eques, militiæ Asiaticæ nomen dederat, non modicè tum fuisse arctatum Regnum Hierosolymitanum: Noradinus si quidem Sultanus Ægypti (teste Tyrio) contra Christianos numerosa instructa classe, illos de terra sancta penitus exterminare apud se proposuerat. Proinde Patriarcha cum venera-

Vuillhelmus
Tyrius l. 20.
cap: 13.

bili Collegio suorum Canonorum, in magna trepidatione tum constitutus, se illosque saluare volens, in diuersa Christianorum regna, prouidendo eis loca in quibus tuto Ordo conseruaretur, submittere legitur. Quod vel ex infra positis literis, in historia regni Hierosolymitani inter Regum & Principum Epistolas nuper a me repertis, facile quisque agnoscet, quas veluti antiquitatis singulare monumentum in probationem rei assertæ, hoc loco inserere operæpretium existimauimus.

CAPVT SECVNDVM.

Almericus Patriarcha Hierosolymitanus, Canonicum S. Sepulchri Galliarum Regi commendatū idem breui post moritur, huic Heraclius succedit, cuius temporibus Christiani iterum Hierosolymam amittunt & nonnulla illius cui gesta breuiter perstringuntur.

Gesta Dei
per Francos
de Regum
& principū
Epistolis.
Epistola 19.
fol. 118A.

INVICTISSIMO DEI GRATIA LVDOVICO Francorum pijsimo Regi, Almericus eadem gratia sanctæ Dominicæ Resurrectionis Ecclesiæ Patriarcha, vna cum Priore & vniuerso Canonorum inibi Deo famulantium Conuentu, salutem & debitas orationes in Christo.

Piæ Celsitudinis Vestræ bonitas & mansuetudo, fama loquente, ut experti sumus, nobis veraciter

innotuit, quod in causa servorum Dei, studiosè concurrat, & Religiosis viris, sinceritatis suæ solatia subministret. Imprimis igitur liberalitati vestræ immensas gratiarum actiones persolvimus, quia sicut multorum relatione suscepimus, res Dominici Sepulchri, cuius servi sumus, licet indigni, amoris respectu Divini, ubiq; quantum potestis augere non desistitis. In his ergo quæ ad Deum sunt, ante sacrosancta loca Passionis & Resurrectionis Dominicæ, iugiter pro vobis existentes, Fraternitatis nostræ ac beneficiorum nostrorum vos consortem statuentes, dilectum Fratrem ac Canonicum nostrum, S. latorem presentium, benignitati Vestræ propensius commendamus; humiliter rogando, quatenus ei ob reuerentiam gloriosissimi Sepulchri, in quibus indiguerit, auxilium vestrum largiri dignemini, & tam eum, quam res sibi commissas, suo vestra sublimitas favore manu tenere dignetur. Insuper, vestra probitatis excellentiam, obnixè deprecamur, quatenus predicto S. Canonico hospitale quoddam, vel alium quemlibet locum, sub protectione alarum vestrarum, ubi ad honorem Dominicæ resurrectionis refugium habere possimus, pro salute ani-

me vestre, omniumq; nobilium parentum vestrorum, concedere dignemini. Valeat tantus Rex fortissimus.

Quo loco singularem Dei prouidentiam mirari conuenit, quæ cuncta suauiter disponit, vt quoties sacræ Religiosorum familiæ, exigentibus id peccatis hominum, in aliquibus locis deficere cæperint, eas plerunque in alia transferri & conseruare consuevit. Nonuit nempè Diuina maiestas, quæ in sua manu omnium conclusit tempora & momenta, tempus & modum sui honoris vbiq; gentium propagandi, quod cum in alijs plerisque, tum in hoc nobilissimo Ordine spectare licet: nam cum in oriente deficere, tum demum in occiduo orbe proficere, & incrementa sumere capit. Posthæc Almericus alias Almaricus Patriarcha Hierosolymitanus, vir, vt de illo refert Tyrius, piissimus & immortalis gloriæ, exactis in Cathedra Hierosolymitana annis 35. onere carnis deposito cælo intulit animam pridie nonas Octobris. Cui Heraclius Cæsariensis Episcopus, sacri Collegij Sepulchri Dominici professus, intra dies decem subrogatus à Tyrio traditur, Anno Dñi, 1180. fuitque is in ordine Patriarcharum Hierosolymitanorum nonus. Cuius temporibus, terra sancta extrema clade affecta esse compertitur, nam ob ciuilia dissidia Principū Christianorum, Salahadinus Sultanus Aegypti, multis iam antea ereptis & in seruitutem redactis in oriente Christianorū

Obitus Al.
meric. Patr.
Hieroso-
lymitani.
Tyrius l. 22.
c. 4. f. 1019.
9 Patriarcha
Hierosoly-
mit. Hera-
clius.

Annus Chri-
sti, 1180.

ditionibus, ipsas denique Hierosolymas suæ potestati subiecit, Anno Domini 1187. videlicet Octuagesimo octauo anno, ex quo Regnum Hierosolymitanum cæperat esse penes Latinos. Patriarcha Heraclius ex pacto, cum clero incolumis abire permissus, Alexandriam diuertisse fertur: alij alia sibi prout quisque potuit, in tanta præsertim rei & temporis angustia, quæsiuere hospitia & receptacula. Nā Prior Sepulchri Dominici cū nonnullis Canonicis (quæadmodum aperte docent literę Iacobi de Māsueris, Episcopi Narniē: & pro eo tempore Prioris Generalis Ordinis nostri) in Regnum Neapolitanum nauigio deuenisse, & primo Ciuitati Baruli, in qua Ordinis nostri celebris iam tum extabat Ecclesia, applicuisse, ibidemque omnia priuilegia & indulta sacri Ordinis adicto Priore & Canonicis S. Sepulchri, deposita fuisse perhibentur. Porro occupata à Saracenis Vrbe sancta, inter alia plurima sacris locis illata mala, protinus campanas deponere, illasque malleis perfringi & in prophanos vsus diffundi, atque in Deo dicatis Ecclesijs, iumenta collocari iussisse Saladinum Nauclerus recenset. At Ecclesiam S. Sepulchri, ne gentilium sordibus contaminaretur, Surianos cum Armenis & Græcis, multo auro redemisse, & ex eo tempore circa dictam Ecclesiam continuo mansisse, atque tributo persoluto vitā suam ægre admodum tutasse, narrat idem author. Posteriori demum sæculo Anno videl. 1336. fratribus Franciscanis qui ibi octo tantum eatenus de consensu Sum-

Hierosoly.
amissæ An-
no Christi,
1187.

Extant au-
tentice in
Cartophila-
cio Conuen-
tû Miechouiē.
de data Nar-
niæ 20 Maii.
Anno, 1437.

Ioā: Naucl.
Chron: vo-
lumi, 2do
generat: 40.
fol: 865.

In orat: ter-
ra S. Philip.
1. fol: 24. &
sequen.

Nauch: loco
sup:
fol: 84f.

Obitus He-
raclij Patri-
archæ Hie-
rosolymita-
ni.

Tyrius l. 22.
cap: 10. fol:
1021.
Monachus
Patriarcha

mi Pontificis commorantur, peculiaris cura & custo-
dia Sepulchri Christi à Sultano Ægyptio, prout notat
Genebrardus & alii, demandata fuit. Ita sanctum vi-
uificumque Christi Sepulchrum, vt differte innuit
Boskhierus, pulsus procul strenuis custodibus, positum
est in pomorum custodiam, id est ad rusticanas & vi-
les casas reuocatum. Licet verò Salahadinus ex pa-
cto Vrbe sancta recepta, sponddisset saluos & inde-
mnes conseruare Christianos, dedissetque potestatem
abeuntibus, quod sibi efferre liceret, quantum quisq;
humeris portare, valeret: non tamen ea vsque fide
fuit, vt parceret afflictis, plurimos enim Clericos, &
ex ordine militari Hospitalarios aut Templarios ca-
ptos, & sibi præsentatos, absque vilo humanitatis re-
spectu, vario mortis genere excruciarì, & occidere
iussisse eum narrat Nauchlerus. Hic est ille Salahadi-
nus, qui moriturus iusserat interiorẽ tunicam lineam
suspendi de hasta & deferri ante funus, præconemque
clamare: *En Salahadinus Asie domitor, ex tanto*
Regno, tantisq; opibus, nihil aliud secum fert. Inte-
rim Heraclius Patriarcha, ingenti mærore ex tam fu-
nesta ac miserabili clade confectus, cernens se omni
auxilio destitutum, depositis clauibus vrbs & sacri
Sepulchri apud Philippum Galliarum Regem, animi
dolore contabuisse & in humanis desisse legitur. Quo
vita functo, superstites Canonici sancti Sepulchri, fa-
cto mutuo conuentu & tractatu, Cæsariensem Archie-
piscopum Monachum nomine, virum, vt notat Tyrius,

eruditione & virtute præstantem, in Patriarchâ Hierosolymitanum elegerant, quamvis Græci, erepta Latinis Hierosolyma, sollicitè apud Salahadinum procurasse dicantur, idque illos facilè ab eo obtinuisse Nicetas scribit, vt penes eos ius sit, & facultas constituendi Patriarchas: nihilominus Latini non desierunt suos quoque isthic instituere & continua serie sufficere Patriarchas, sicut in Monacho post Heraclium suscepto, & alijs successiuè canonicè electis clare perspicitur; à quibus Præpositi Miechouienses, suas institutiones longo temporis decursu obtinere solebant: quarum plurima hucusq; in archiuo dicti Conuentus, extant authentica documenta. Inter quæ non postremi momenti, antiquissimum diploma, huius, de quo in præsentī res est, Monachi Patriarchæ, per omnia integrum habetur, quo donationes omnes primitus à pijs fundatoribus pro Monasterio Miechouiensi factas, authoritatē Patriarchali confirmat atque approbat, singulorum etiam benefactorum nomina exprimendo. Quod nos veluti præclarissimum antiquitatis monumentum, sequenti capite oculis legentium subicere non prætermitemus. Interea Matthæus Episcopus Cracouiē: cuius temporibus sicut superius ex Długosso retulimus, Ordo Canoniorum S. Sepulchri, in Poloniam primum inductus fuit, ex hac vita migrasse comperitur. Anno videlicet 1166. cui post diuinam & humanam vocationem, vt Długossi verbis vtar, Gedeon alias Getko nobilis de domo & familia

Annus Christi
1166.

Gryphonum, ac perinde ipsius laxæ fundatoris con-
sanguineus, in Episcopatum Crac: successit: qui maio-
rum suorum exempla secutus, summis quoque bene-
ficijs Ordinem nouiter in Polonia constitutum ex-
ornauit; Nam foundationi laxæ decimas manipulares
de speciali consensu Capituli sui, in quatuor villis Mie-
covv videlicet, Zagorzyce, Komorovv & Koczcha,
iam tum Conuentus Miech: hæreditarijs adiecit, plu-
rimasque alias, in diuersis pagis & locis, eidem Mo-
nasterio liberaliter attribuit. Dos ergo prima debe-
tur laxæ, altera Gedeoni Episcopo, reliqua nobilium &
priuatorum benignitas addidit, quorum beati spiri-
tus, pro tam sanctis ac pijs operibus, sælici iam ac sem-
piterno æuo fruuntur.

CAPVT TERTIVM.

*Monachi Patriarchæ Hierosolymitani, fundatio-
nis primeuæ pro Monasterio Miechouienſi fa-
ctæ, confirmatio.*

In Nomine sanctæ & indiuiduæ Trinitatis, Patris, &
Filij, & Spiritus sancti, Amen.

*Monachus Dei gratia, sanctæ Resurrectionis
Ecclesiæ Patriarcha, & totum eiusdem Ecclesiæ
Capitulum. Vniuersis Archiepiscopis, Episcopis,
Abbatibus, Prepositis, & cæteris Ecclesiarum præ-*

latis

latis: Ducibus, Comitibus, Baronibus, Militibus, & cæteris sanctæ matris Ecclesiæ filiis, per Ducatum Poloniæ constitutis, & in posterum constituendis, ad quorum notiam scripta hæc peruenerint, salutem & Patriarchalem benedictionem.

Cum labilis sit memoria hominum, cui non suffragatur perpetuitas literarum; vniuersitati vestre presentibus literis innotescat. Quod cum Dominus Iaxa, vir bonæ memoriæ, Dominicum adiret Sepulchrum, & in loco ubi steterunt pedes Domini adoraret, inter alia deuotionis sue insignia, rogauit, ut Ecclesia S. Sepulchri, vnum de Canonicis suis, secum in Poloniam mitteret: quatenus ad soluendum votum, quod fecerat, eum quibusdam hereditatibus inuestiret. Quia cum esset vir Christianissimus, & præcipuè circa Dominicum Sepulchrum deuotus, Ecclesiam nostram suis volebat dotare patrimoniiis, & apud remotas illius Prouinciæ gentes, Christi patrimonium ampliare, ut dum eius Patrimonium amplificaret in terris, æternæ Ciuitatis hæres à Christo conscriberetur in celis. Cum ergo quendam Canonicum, secum in Poloniam perduxisset, egregij Ducis Boleslai consensu, ac voluntate omni-

moda, tres villas videlicet Miechow, Zagorzyce, & Komorowo, in perpetuam eleemosinam Canonico, & suis successoribus assignauit. Et ne aliquis successorum suorum donationes eius posset in irritum ducere, seu villas prenominate a Hierosolymitana Ecclesia dominio reuocare, futurorum paci providens & quieti, predictum Ducem, Boleslaum Dominum suum, familiariter adiit, & eius confirmationem familiari precum instantia requisivit. Dux vero prestantissimus eius preces deuotas exaudiens, villis ab eo donatis suam confirmationem adhibuit. Et talem in super Ecclesia nostra libertatem, & perpetue immunitatis prerogatiuam concessit, ut omnes hereditates, quas Hierosolymitana Ecclesia ibi posset acquirere, propter Dominici Sepulchri reuerentiam, ab omnibus publicis exactionibus & seruitiis, que in Ducatu Polonie fuerint, essent penitus absolute. Statuit si quidem, quod homines in villis nostris habitantes, ad expeditionem non eant, castrum non edificent, Poradlne & Strozam non dent, Monetario non obediant, Ponor & Podwode non tribuant. Propter quod Ecclesia nostra, tam eum, quam successores suos, orationum & beneficio-

rum,

rum, quæ apud nos fiunt, participes esse concessit. Cui cum frater eius Mescó successisset, in honore regiminis factus est particeps pietatis, dum libertatem, quam prior contulit, sequens nihilominus confirmavit. Post eum frater eius Dux Casimirus, priorum exempla secutus, donum libertatis à fratribus editum, ratum habuit, & illud suo privilegio roboravit. Vnde factum est ut processu temporis, multi viri nobiles, eleemosynas suas Ecclesiæ nostræ conferrent, & hereditates ac villas, Dei intuitu largirentur, quorum nomina duximus annectenda. Impri-
mis Dominus Getko venerabilis Cracoviensis Episcopus, pro anima sua & successorum suorum, dedit Ecclesiæ S. Sepulchri in eleemosynam decimas istarum quatuor villarū, scilicet Miechow, Zagorzyce, Komorowo & Coczcha. Dominus Suentoslaus dedit Coczcham inferiorem. Dñus Comes Stephanus dedit Coczcham superiorem. Comes Nicolaus Palatinus dedit duas villas, Iacicz & Replich. Frater Crecoba dedit villam, quæ est iuxta Mescow. Huggoldus Clericus, dedit sortem unam, quæ erat super Cocham. Vxor Gnieuomiri cum filio suo dedit Lantkowicz, Dominus Lassota dedit Lubna, Dominus

Suentoslaus
gente quoq;
Griphius vir
potens &
magnarum
possessionū
insignis.
Crom: lib. 6
in Boleſlao
Crispo.
Eccle: Mie-
choniē: hæ-
reditates
Miechovv.
Zagorzyce.
Komorovv.
CHotlia in-
ferior.
CHotlia su-
perior.

Iaxice.
Rzepin.
Lentkowiec
Lubna
Bialobrze-
zie.
Karncov.

Oludza.

Goluchov.
Biezanov.

Karce.
Chelm.

Nieskovice
1. Sal de Bo-
chnia.
2. Sal Prze-
niechan
3. Sal Szy-
dunia.
Studzienica
Bavvol.

Skarzelzov
Ecclesia
Skarzelzo.
antiqua.

Tres Marca
puri argen-
ti redditus
annuus pro
domo Mic-
chouien.

Leonardus dedit villam iuxta Cocham inferiorem. Frater eius Wlodimirus dedit Belobreze. Ioannes dedit villam que decambita fuit à fratre eius Mathæo pro Gostyrádze, Dominus Gierloch & Vxor eius cum filiis suis dederunt duas villas, scilicet Charncow & Otudzam: Vxor Wseborgy pro eius anima & sua, & filiorum suorum, dedit villam que dicitur Golchowo, cum suis pertinentiis. Dominus Cagnimirus dedit Benganowo, Comes Iacobus Sandomiriensis dedit villam Károche, D. Michora dedit nobis super Rabbam villam, que dicitur Quelme cum Ecclesia, & decimis, forum & tabernam, & aliam villam Neskowice. Item addidit sal de Bohegna, aliud salin Preuechna, tertium sal Sidingnam, & aliam tabernam Studencam. Andreas frater Matthæi dedit Bamvotin Sundemirien. Provincia. Comes Radoslaus, pro anima sua dedit nobis Scarisow, & Ecclesiam, forum & tabernam. Predictus verò Dux Casimirus, talē huic foro contulit libertatem, ut ad ipsum venientes, morantes, & exeuntes, mercimonia liberè contrahere possent. Insuper consilio usus, & prece monetariorum rogatus, tres marcas manualis argenti de domo dicti mo-

netarii

netarii dari decreuit. Domino verò terre, de quolibet plauastro salis quinquaginta Capita, domui verò duodecim capita salis, accipere constituit; de aleciis verò totidem alecia. Hanc ergo supra dictam libertatem Domino Patriarche, & ceteris fratribus per literas suas demandauit; eandem etiam libertatem, coram Zdislao Archiepiscopo in Pascha Domini in Spierzow, multis ibidem nobilibus astantibus, Domino Casimiro iubente, Dominus Lupus Episcopus in communi predicauit, tum etiam scripto & sigillo suo confirmauit. Decimas verò ipsius Ecclesie predictas Episcopus Gedeco addidit, scilicet decimam de commemorato Skárißow, & aliarum quatuor villarum Modrelancz & Wirbice, Sdinechowic, & Crampa. Item predictus Comes Radoslaus dedit Repinã, & homines morantes in ea. D. Zira & uxor eius cum filio suo Ottone, dederunt duas villas, Samogost que est supra Vislam & prope Kiie, aliam Christopherus dedit Zytanam, quam decabiuuit prefatus Cagnimir pro Borowna & Comeow. D. Otto de Werbic dedit Dirskow. Woislaus fr Dni Gedeonis Episcopi in Wroclawien: prouincia, dedit duas villas, que decambite fuerunt, ab Episcopo Wroclawien.

Vestigal salis.

Casimir. libertates Conuentui Michotini. concessas, Patriarche Hier. per literas denunciat.

Zdislaus fuit Archiepiscopus Gnesne. Petri defuncti successor tempore Casimiri Ducis Polon. circa annum Domini 1183 mortuus. 1199 Crom: li. 6. in Casimiro Lupus Episcopus Ploeen: gente Gozēbius anno 1173. Vernero successit.

Zira Comes curator Lesci à Casimiro datus, Masouiam atque Culaiam omnem & Lesci consilia gubernabat. Crom. lib. 6. in Casimiro.

Groskounice
Slavvno.
Gorzeslaui.
cc.
Grodzisko.

pro villa que dñ Groskonicz, & pro Sclauono & earum decimis. D. Budzinyoy dedit Gorzeslawnice. In Gwenezne fr̃ Praslaus dedit Ecclesiam cū duabus villis. Ducissa de Gwenezne dedit Grodzisz cū taberna. Tuto Theutonicus dedit villā que est ante Rudam. Igitur quoniā à filiis non debetur reuocari in irritū, quod à Patribus ob animarū suarū salutē, tam solēniter est concessum : & quia donationes istę, confirmatę à Ducibus perpetuā debent stabilitatē habere. Vniuersos qui Domino & S. Sepulchro, suas dederūt eleemosynas Ecclesię nostrę à Patribus cōcessas, omni tempore ratas habeant, & quod ab eis statutum est, nullatenus violare pręsumant, scientes quod si Filij Patrum donationes ratas habuerint, & illesas, omnium orationum & beneficiorum quę in nostra sunt Ecclesia erunt participes, bonum à Christo pręmium recepturi. Si vero libertates infringere, vel possessiones auferre illicita temeritate pręsumpserint, nouerint se ante tribunal Iesu Christi districtum subituros iudicium, & ab ipso quem in crucis suspensum patibulo adoramus, cuius patrimonium inuaserunt, in extremo examine fortiter puniendos. Factū est hoc A. D. Incarnationis, MCXCVIII.

CAPVT QVARTVM.

Declaratio superioris rescripti ex libro Monasteriorum per Diœces: Cracouien: consistentium, desumpta.

QVo melius primæua dotatio, quæ in hoc diplomate Patriarchæ Hierosolymitani summarie perstringitur, Cœnobij Miechouien: eiusque non mediocris iactura, Fratribus perspecta habeatur, operæ precium duximus, si hanc ex codice vetustissimo Ecclesiæ Cathedralis Cracouien. qui liber Monasteriorum Ecclesiæ ac Diœcesis Cracouien. vulgo appellari consuevit, à doctissimo illo viro, Ioanne Dlugoslo maiore, Canonico Cracouien. Anno Domini 1448. sanctè ac religiosè composito, atq; optima & indubitata fide accuratissimè conscripto, paulo lucidiorē reddamus. Quam ille in hunc modū recenset.

ORDO & Religio Fratrum Resurrectionis S. Sepulchri Dominici Hierosolymitani Canoniorum Regularium, rubeam geminatam crucem in mantellis deferentium, & sub Regula B. Augustini viuentium; tria habet loca in Diœcesi Cracouien: consistentia, quorum primarium in oppido Miechow, quinq; miliaribus à Cracouia distans, consistit. habēs in se Ecclesiam Cœnobialem, eandemq; Parochialem

muratam, cuius omnis proprietas ad Monasterium Miechouien: pertinet. confinat cum Zagorzyce, Siedliska, Wola Kalinska, Zagorow, Pstrożyce, Komorow, Iáxyce, donata Monasterio per Iaxam militem.

- o *Komorow villa sub Parochia de Miechow sita, cuius proprietas ad Monasterium Miechouiense, pertinet: confinat cum Biskupice, Miechow, Lgota, donata Monasterio per Iaxam militem.*

- o *Cothlia inferior, villa sub Parochia de superiori Kothlia sita, cuius proprietas ad Monasteriū Miechouien: pertinet, sita in Diœcesi Gneźnen: donata per Suentoslaum militem, alienata à Monasterio.*

Cothlia superior, villa habens Parochialem Ecclesiam S. Mariae dicatam in se, cuius proprietas ad Monasterium Miechouien: pertinet, sita in Diœcesi Gneźnensi, donata Monasterio per Stephanū Comitem. alienata à Monasterio,

Iaxyce, villa sub Parochia de Miechow sita, cuius proprietas ad Monasterium Miechouiense pertinet, confinat cum Rzerzuszno, Krampa, & minori Czápłe. Donata Monasterio per Nicolaum Comitem Palatinum.

Rzeplice vila sub Parochia de -----sita, cuius proprietas ad Monasterium Miechouien: pertinet. Donata Monasterio per Nicolaum Comitem Palatinum. Alienata à Monasterio.

Lantkowice villa habens in se Parochialem Ecclesiam ligneam, cuius proprietas in foundationis primordio, ad Monasterium Miechou: pertinebat, sed dudum ab eo abstracta est & alienata, quando frater germanus Prepositi Miechouien: Albertus, existens Aduocatus Cracouien: fraudem fecit in Wladislao Rege Poloniae Loktek, tradendo ciuitatem Cracouien: Boleslao Duci Oppoliensi, quam ille seruare non valens Wladislao Loktek restituit. Anno 1312. ablata, & ab illo tempore nunquam Monasterio restituta, in qua triginta agri Cmetonales, & viginti tabernæ habentes agros, antiquitus numerabantur. Donata Monasterio per uxorem Gneuomiri & filium eius. Meminerunt huius alienationis, etiam posteriores Scriptores Polonici, maxime Cromerus dum ait. Insimulatus est etiam Ioannes Muscata Episcopus Cracouien: conscius fuisse illius defectionis, quod eo facilius creditum est, quod esset Silesius &c. Quin ad Miechouien: quoq;

Prepositum omnis culpe expertem, serpsit pax contagio. Nam Lentkowitz Pagum luculentum & vberem ei Wladislaus ademit, propterea quod eius usum fructum Albertus Aduocatus, Prepositi frater haberet: hæc ille.

- Biało-brzezie villa, sub Parochia de Mstyczon sita, cuius proprietates ad Monasterium Miechouien: pertinet. Donata Monasterio per Wladimirum fratrem Leonardi. Alienata à Monasterio.

- Lubna villa sub Parochia de-----sita, cuius proprietates ad Monasterium Miechouien: pertinet. Donata Monasterio per Lassotam militem. Alienata à Monasterio.

- Kościaradźice villa, sub Parochia de-----sita, cuius proprietates ad Monasterium Miechouien: pertinet. Donata Monasterio per Wladimirum fratrem Lasotke. Alienata à Monasterio.

- Czarnkow villa sub Parochia de-----sita, cuius proprietates ad Monasterium Miechouien: pertinet. Donata Monasterio per Ioannem militem Gerlath & eius consortem, & duos filios. Alienata à Monasterio.

Wolicza villa sub Parochia de Obichow sita, cu-

ius proprietatis ad Monasterium Miechou : pertinet.

Oludza villa sub Parochia de Kydow sita, cuius proprietatis ad Monasterium Miechouien: pertinet, confinat cum Solczà. Donata Monasterio per Gerlath militem, & uxorem, & duos filios.

Gołczowo villa sub Parochia de ----- sita, cuius proprietatis ad Monasterium Miechouien: pertinet. Donata Monasterio per Wscheborem militem. Alienata à Monasterio.

Bieżánowo villa sub Parochia de ----- sita, cuius proprietatis ad Monasterium Miechouien: pertinet. Donata Monasterio per Kanimirium militem. Alienata à Monasterio.

Karcze villa sub Parochia de ----- sita cuius proprietatis ad Monasterium Miechouien: pertinet. Donata Monasterio per Iacobum Comitem Sandomirien: Alienata à Monasterio.

Chełm villa in colle eminentiori supra fluvium Raba sita, habens in se Ecclesiam Parochialem ligneam. Villa prefata cum sua proprietate pertinet ad Monasterium Miechouie: Item ius patronatus prefate Ecclesie, integrè pertinet ad Prepositum & Monasterium Miechouien: Confinat cum Stanislawice,

Eccel: Chelmenfis antiqua in Regno Polon.

Mosczenicá, Targowisko. Donata Monasterio per Michoram militem.

* Alias Gier-
czyce.

Mosczenicá villa sub parochia de Chelm sita, cuius proprietas ad Monasterium Miechowien: pertinet. Confinat cum Stanisławice, Łapšyce, * Gedzice, Siedlecz, Chelm.

Targowisko villa sub Parochia de Chelm sita, cuius proprietas ad Monasterium Miechowien: pertinet. Confinat cum Łaskowice, Grotkowice, Łyskanie, Szarow, Klay, Stanisławice, & Chelm, & utraq Viazdy. Donata Monasterio per Michoram militem. Taberna & Theloneum supra Rabam sub Parochia de Chelm sita, cuius proprietas ad Monasterium Miechowien: pertinet, iuxta quam fluvius Raba, habens circa oppidum Vście ostia in Vistam decurrentia, cuius alueus quoniā frequentius inflatur aquis, ex Alpibus Panonicis & Polonicis cōfluentibus, sepe inuadosus & periculosus est transeuntibus, quapropter Monasterium fabricavit supra illum pontem, & ratione illius habet theloneum pontale. Donata Monasterio per Michoram militem.

Turek taberna sub Parochia de Chelm sita, cuius proprietas ad Monasterium Miechowien: pertinet.

Klay villa regia sub Parochia de Niepolomice sita, in qua sunt due hortulanie habentes agros, quorū proprietas ad Monasterium Miechou: pertinet.

Mszczaćin villa sub Parochia de Pobiednik sita, cuius proprietas ad Monasterium Miechouien: se pertinet.

Nieszkowa villa sub Parochia de Pod: grodzie, prope oppidum noue Sandecz sita, cuius proprietas ad Monasterium Miechouien: pertinet. Donata Monasterio per Michoram militem.

Sal in Bochnia primum. Habuit in principio fundationis sue Monasterium Miechou: specialem fundum, seu puteum, ad proprietatem suam pertinentem, de quo habebat uberes introitus, sed alienatus est à Monasterio Miechouien: nec illum amplius habet Monasterium Miechouien. Donatum Monasterio per Michoram militem.

Sal secundum in Przeniechan. Habuit & alium fundum, seu puteum salis Monasterium Miechou: in villa siue loco Przeniechan, in quo tunc vena salis secunditer proueniebat, sed vena salis dispareunte, ille etiam reditus salis periit.

Tertium Sal in Szydzina. Habuit & tertium

puteum salis Monasterium Miechouien: in villa Szydzina prope Wieliczka, sed ille quoque puteus siccatus & exterminatus est, & à Monasterio Miechouien: alienatus. Donatum Monasterio per Michoram militem.

- Studzianká taberna donata Monasterio per Michoram militem. Alienata à Monasterio est.
- Bąwoł villa sub Parochia de S. Iacobo in Casimiria sita, cuius proprietates ad Monasterium Miechouien: pertinet, donata Monasterio per Andream militem fratrem Matthaei. Ad huius ville proprietatem Capitulum Cracouien: commutatione incertum est, vel pretio peruenerat, quam cum annis pluribus tenuisset, Casimirus secundus Polonus Rex, villa ipsa à Capitulo emptā vel cambita, oppidum ex suo nomine Caźimirz in ea fundauit, Cracouiē: Vrbi confrontatum. Alienata à Monasterio.

Skárczeszow oppidum in terra Sandomiriensi, propè Ciuitatē Radom situm; de quo originem duxit vir insignis, magister Iacobus Decretorum Doctor famosus, Decanus Vratislauien: & Canonicus Cracouien: qui B. Stanislai Martyris & Pontificis Cracouien: maximo studio & labore canoniza-

tionem

tionem procurauit, habens in se Ecclesiam Parochialem ligneam. Confinat cum Kobelány, Bogusławice, Mákow, Chomethow, Modrzenice, Gamborzon. Donatū Monasterio per Radoslaum Comitē.

Twarogowa Wola villa sub Parochia de Skárzysow sita, cuius proprietates ad Monasterium Miechouien: pertinet. Confinat cum Oddanchow, * Krzyżanowice, Kobylány, Modrzenice, Skárzysow. Locata in cruda radice, in syluis & mericis ad Skárzysow pertinentibus.

Sławno villa sub Parochia de Noua cerkiew, sita, cuius proprietates ad Monasterium Miechouien: pertinet. Confinat cum Noua cerkiew utraq; Kiejskow, Garno.

Census monetæ: Contulit autem dotem & circa foundationem eius, prefato Monasterio Miechou: Casimirus Sandomirien: Dux, de thesauro fisci sui Ducalis, & de officina monetali sui Ducatus, tres marcas nummismati argenti, quem censum annis multis Monasterium Miechouien: percipiebat, sed is census dudum abolutus & extinctus est.

Census de Plaustris Salis: Idem Casimirus Sandomirien: Dux, dotando Monasterium Miechou:

Ecclesia
Skarzewo-
uien: anti-
qua.

* Alias Odc-
chov.

prefa-

presatum, de quolibet plauastro Salis, quinquaginta capita salis habente in oppido Skarzyssow, ducto vel ducendo, donauit Monasterio Miechowienfi duodecim capita salis, quæ ipse accipere iure suo Ducali consueuerat: Census tamen omnis disperiit.

- o Censu de Aleciis. Idem presatus Casimirus Dux Sandomirien: filius Boleslai Krzynousty Ducis & Monarchæ Poloniæ, dotem monasterii aucturus, de quolibet vase alecum, in oppido Skarzesow Monasterii Miechowien: certam pensionem, iure suo Ducali percipere inscripsit, & donauit. Sed is census quoque periit.

- o Rzepina villa sub Parochia de ----- sita cuius proprietas ad Monasterium Miechowienfe pertinet. Donata Monasterio per Radoslaum Comitem. Alienata à Monasterio.

- o Samogocz villa sub Parochia de ----- sita, cuius proprietas ad Monasterium Miechowien: pertinet. Donata Monasterio per Ziram militem, & uxorem eius & filium eius Otthonem. Alienata à Monasterio.

- o Zytina villa sub Parochia de ----- sita, cuius proprietas ad Monasterium Miechow: pertinet,

Donata

Donata Monasterio per Zyram. & uxorem eius,
& filium eius Ottham.

Dzierzkow villa sub Parochia, de Skárzysow
sita, cuius proprietas ad Monasterium Miechowiẽ:
pertinet. Confinat cum Krzyżánowice, Skárzesow,
Modrzewice. Donata Monasterio per Ottham
de Wierzbica militem.

Groszkowice villa sub Parochia de-----
sita, cuius proprietas ad Monasterium Miechowiẽ:
pertinet. Alienata à Monasterio.

Zdanow villa sub Parochia de-----cuius
proprietas ad Monasterium Miechowiẽ: pertinet.
Alienata à Monasterio.

Krzesławice villa sub Parochia de Pleßow, su-
pra fluvium Dłubnia prope Mogilam sita, cuius
proprietas ad Monasterium Miechowiẽ: pertinet.
Confinat cum Biendzice, Mogila, Lubcza. Donata
Monasterio per Bogiuoium militem.

Grodzisko villa habens Parochialem Ecclesiam
in eadem villa sita, cuius proprietas ad Monasteriũ
Miechowiẽ: pertinet. Donata Monasterio per
Ducissam Gnesnensem in maiori Polonia post
Kalissiam propè oppidum Pleßow, & habet Prepo-

O
Grodziscẽ:
Eccl: anti-
qua:

Eccle: Wro-
cierzyen: an-
tiqua in Re-
gno Polon:

fitum proprium. Alienata à Monasterio.

Wroćiriz villa habens Ecclesiam Parochialem in se. Hac villa ex antiquo ad Ecclesiam & Episcopatum Lubucen: pertinebat, sed Anno Dni. 1394. Stanislaus Decretorum Doctor Prepositus Miechouien: quinta Nouembris de consensu speciali Vladislai secundi Polonie Regis, emit predictam villam, à Ioanne Episcopo & Capitulo Lubucē: pro sexingentis marcis latorum grossorum Pragensium, una cū lacu qui vocatur Dobrowodá. Confinat cum Iedlca, Páwłowice, utraq; Zágaiow, Sándziwoiowice, Thur.

Micháłowice villa sub Parochia de Wiecláwice sita, cuius proprietas ad Monasterium Miechouien: pertinet. Confinat cum Mastomiaca.

Villa ante Rydam, donata Monasterio per Tutorem Teutonicum. Alienata à Monasterio.

Eccle: Vnie-
rouien: an-
tiqua in Re-
gno Polon.

Vniciow villa habens in se Ecclesiam Parochialem sancto Vito dicatam, lapide albo fabricatam, cuius proprietas ad Monasterium Miechouien: pertinet. Confinat cum Martinowice, Pogwizdow, Charsnica & Swoiczány.

Eccle: Cho-
douien: an-
tiqua.

Chodow villa habens in se Parochialem Ecclesiam ligneam, sancto Ioanni Baptista dicatam, cu-

us pro-

ius proprietates ad Monasterium Miechouien: pertinet. Hec villa emptā est per Michaelem tunc Praepositum Miechouien: pro Monasterio Miechouienſi, à nobili Boleslao de Grzybow, de domo Roze milite. Conſinat cum Charsnica, W ithowice, Fahnion, Pstroſyce.

Stawiany villa sub Parochia de Kie ſita, cuius proprietates & dominium ad Monasterium Miechouien: pertinet. Conſinat cum Kie, Sandziwoiowice.

Sadowie villa sub Parochia de Kie ſita, cuius proprietates pertinet ad Monasterium Miechouien: Conſinat cum Kie Sandziwoiowice. Alienata à Monasterio.

Gotartowice sub Parochia de Kie ſita, cuius proprietates ad Monasterium Miechouien: pertinet. Conſinat cum Kie, Sandziwoiowice.

Iadowniki villa sub Parochia de Swiatomarza propè Bodzacin ſita, cuius proprietates ad Monasterium Miechouien: pertinet. Conſinat cum Brzezie, &c.

Iedlca villa sub Parochia Ecclesie de Wrocie-ryż, cuius proprietates & dominium ad Monasterium

Miechowien: pertinet. Confinat cum Wroćiryz altera Iedlca militari, Zagajon.

Orłow villa sub Parochia de Prandocin sita, cuius proprietas ad Monasterium Miechowien: pertinet. Donata Monasterio, per Niemierzam de Krzelow, Custodem S. Floriani, & Canonicum Cracouien: Anno 1427. de domo Vulpium. Confinat cum Szczepanowice, Smrokow.

Podleśna Wola villa sub Parochia de Miechow sita, cuius proprietas ad Monasterium Miechowien: pertinet. Confinat cum Pstrożyce & Siedliská.

Brzuchania villa sub Parochia de Miechow sita, cuius proprietas ad Monasterium Miechowien: pertinet. Confinat cum Kalina, Bukowska Wola, Strzezow, Thocholow.

Przecláwice villa sub Parochia de Miechow sita, cuius proprietas ad Monasterium Miechowien: pertinet. Confinat cum Iaxice, Smrokow, & minori Czápke.

Kámienczyce villa sub Parochia de Miechow sita, cuius proprietas ad Monasterium Miechowien: pertinet. Confinat cū Iaxice, Przecláwice, & Miechow.

Rospirchow villa sub Parochia de Miechow sita, cuius proprietas ad Monasterium Miechouien: pertinet. Alienata à Conuentu.

Strzeżow villa sub Parochia de Miechow sita, cuius proprietas ad Monasterium Miechouiense pertinet.

*Smrokow villa sub Parochia Ecclesie de Ma-
iori Czáplesita, cuius proprietas & Dominium ad
Monasterium Miechouien: pertinet. Confinat
cum minori Czáples.*

*Przedmieyska Wola villa sub Parochia Ec-
clesie de Miechow sita, cuius proprietas ad Mona-
sterium Miechouien: pertinet. Confinat cum op-
pido Miechow Falniow, Siedliska.*

*Bukowska Wola villa sub Parochia de Mie-
chow sita, cuius proprietas & dominium ad Mo-
nasterium Miechouiense pertinet.*

*Cháliná villa sub parochia Ecclesie de oppido
Miechow sita, cuius proprietas ad Monasterium
Miechouiense pertinet. Confinat cum Kalina
militari, Zarogow, Wola Podlesna, Miechow,
Siedliská.*

Szczepanowice villa sub Parochia Ecclesie de

Miechow sita, cuius proprietas & Dominium ad Monasterium Miechou: pertinet. Confinat cum Parkosowice, Orlow, Prándoćin.

Parkosowice villa sub Parochia de Stawice sita, cuius proprietas & dominiũ ad Monasterium Miechouien: pertinet.

Falniow villa sub Parochia de Miechow sita, cuius proprietas ad Monasterium Miechouiense pertinet.

Pstroszyce villa sub Parochia de Miechow sita, cuius proprietas ad Monasterium Miechouiense pertinet. Confinat cum Chodow.

Siedliská villa sub Parochia de Miechow sita, cuius proprietas ad Monasterium Miechou: pertinet. Confinat cum Miechow, Zagorzyce, Pstrošyce.

Wola Kálinska villa sub Parochia de Miechow sita, cuius proprietas ad Monasterium Miechouien: pertinet. Confinat cum Kálina, Zarogow, oppido Miechow. &c.

- o *Grochutow villa sub Parochia de Grodzisko sita, cuius proprietas ad Monasterium Miechouien: pertinet, in maiori Polonia post Kališ, prope oppidum Plešow. Alienata à Monasterio.*

Iankow villa sub Parochia de Grodzisko sita, cuius proprietas ad Monasterium Miechouien: pertinet in maiori Polonia prope Plesow. Alienata à Monasterio.

Sirchow villa in maiori Polonia prope Plesow, sub Parochia de Grodzisko sita, cuius proprietas ad Monasterium Miechouien: pertinet. Alienata à Monasterio.

Bránischowice villa in Diœcesi Gnesnensi, habens Parochialem Ecclesiam ligneam S. Maria dicatam in se, cuius proprietas ad Monasterium Miechouien: vel potius S. Ioannis in Gnesna pertinebat, & pro eius hospitali, nunc autem est sub ditione seculari. Alienata à Monasterio.

Huius tam ampli Patrimonii ne mediam quidem partem superesse facile is deprehendet, qui iacturam & alienationem Prædiorum, à viro sicut antiquitate ita & veritate præstante recensitam, ad calculum reuocauerit. Causa autem tanti damni, per se patet, vel quod maiores nostri minus apti essent ad tuendas, & manutenendas possessiones, potentibus viris eas inuadentibus, vel quod liberaliores quam par est fuerint in distrahendis, vel quibusvis personis facile alienandis bonis Ecclesiæ. Errata quidem maiorum nostrorum hanc in parte potius reprehendi, quam corrigi

possunt.

possunt. Cæterum in posterum prospiciendum maximè est, ne inconsiderata & sacrorum Canonum legibus seuerissimis interpositis pænis vetita alienatione, bona Monasterij distrahantur, cum qui id faciant & qui facientibus assensum præbent, perniciem salutis suæ accelerant.

CAPVT QVINTVM.

Hierosolymis amissis Ordinis caput ac Præfectura, penes Conuentum Miechouiensem mansisse comprobatur.

COrruente iam & propemodum extincta in Oriente Canonorum SS. Sepulchri præclarissima stirpe, immani rabie barbarica, non illorum solum, sed cunctorum qui Christi nomine censentur religiosorum funditus demolitis templis ac monasterijs, summam & verticem Ordinis præfati, diuina id ordinante clementia, penes Conuentum Miechouien: constitisse, narrat Dlugossus. Quod quidem Canobium (refert dictus author) propter sui excellentiam ac vetustatem, non solum omnium Canobiorum sue generationis & ordinis, quæ in Regno Poloniæ exstant, sed etiam omnium, quæ in Galliis, Hispaniis, Anglia, Dacia, Napulia, Germania, Boemia, & Hungaria consistunt, potest iuste & rectè vocitari & censerì vertex, cardo, & caput, cum om-

nia ab

nia ab hoc vno originem acceperint & generationē
in quod summi Pontifices singularibus gratiis, & fauoribus vti, plurimas loco illi, & vniuerso Ordini præfato, per vniuersa climata mundi diffuso, contulerunt indulgentias, libertates, exemptiones, & immunitates, quæ non alibi, quàm in loco præfato, originaliter sub Bullis Apostolicis continentur, Ordinis & loci excellentiam & prærogatiuam attestantes. Cui etiam omnia Monasteria Ordinis præfati, in Polonia, Hungaria, Bohemia, Silesia, Russia Regnis consistentia subsunt, parent & obediunt, à Præposito Miechouiensi prouisiones, & institutiones, destinationesq; locorum, & charismata suscipiunt. Hæc Dlugossus. Cuius authoritati inhærentes, nos demū ommissa vltiori Ecclesiæ Hierosolymitanæ tractatione, & Patriarcharū, qui post captam Urbem, quocunq; loco illi sederint, dignitatemq; Patriarchalē retinuerint, enumeratione: Nobilissimi deinceps Cœnobij, res gestas, eiusq; clarissimorum Præsidium continuam successionem, aliquot Summorum Pontificum, ad declarandam antiquitatem, & loci prærogatiuam, Bullis prius recensitis, Deo adiuuante prosequi conabimur. Ac verò inprimis quantum attinet Martinū primum, vt dictum est, Præpositum Miechouiensem quem ex Hierosolymitano Collegio in Poloniam per Iaxam adductum, & à Gedeone Episcopo Cracouiensi.

institutum, Dlugoffus meminit. Hic Coenobij & Ecclesiae Miechouien: atq; adeo ipsius sacri Ordinis fundamenta, primus in Polonia iecit: Vnde postea in vicinas huius Regni Provincias coloniae deductae nascuntur. Quamprimum enim ille sacrum hoc Apostolicum Institutum, in hoc occiduo orbe promulgasset, confestim ex omnibus terrae partibus, ad eum viri nobiles pij ac docti certatim accurrere, qui abdicato rerum propriarum usu, inter alumnos Christi conscribi ardentem postulabant, votoq; potiti, mox virtutum splendore, ac mirae Sanctitatis odore, non Poloniam tantum, sed vicina quoq; Ungariae, Silesiae, & Bohemiae Regna adimplebant. Hinc expetiti à multis, & curae animarum in plerisque Diocesibus admoti, adeo Ordinem propagasse deprehenduntur, ut Conuentus Miechouien: apud omnes occiduas nationes, notissimus celeberrimusq; haberetur. Et exinde per varias orbis provincias, lati ubiq; Sacri Ordinis caeperunt asurgere palmites, & florentissima à deuotis huius Augustae SS. Sepulchri familiae extrui monasteria, quae hactenus magno cum Ordinis splendore & ornamento, extare cernuntur, licet plurima ex eiste Volaterrano ab Innocentio Octauo Pontifice Max: Ordini S. Ioannis agglutinata sint. Aubertus Myraeus Bruxellensis, Proto-notarius Apostolicus, in libro, quem nuper de Originibus variorum ordinum edidit, facit celebrem mentionem Ordinis Crucigerorum, quorum etiam Monasteria compendiose collecta, his ver-

bis recenset. Ordo Crucigerorum in Belgio, Germania, & Gallia fuit inchoatus circa Annum Christi 1216. eiusdem Congregationis Monasteria hodieq; florent. Hui ad Molam fluvium in Diacesi Laodicensi, vbi pulcherrimum dicit etiam nunc extare Monasterium, idq; Congregationis caput esse censet, ex eo, quod a Petro Eremita, qui ingentem Christianorum exercitum contra Turcas collegerat, iunctisq; copijs cum B. Godefrido, ei omnium itinerum & belli fidus comes extiterat, constructum & fundatum sit. Sed aliter ex Privilegijs & rescriptis tam Summorum Pontificum, quam ipsorum Patriarcharum Hierosolymitanorū patet, qui hoc munus ac prærogatiuam soli Conuentui Miechouien: detulerunt: quemadmodum inferius a nobis declarabitur. Proclamari autem, ait Myræus, eo in loco annue Beati viri memoriam, sequentibus verbis. Octauo Idus Iulij Anno 115. Obijt Dñus Petrus Venerabilis Sacerdos & Eremita, qui primus prædicator S. Crucis a Dño meruit declarari. Hic post acquisitionem Terræ sanctæ, cum reuersus fuit ad natale solum, ad petitionem quorundam viro- rum nobilium, & ignobilium, fundauit Ecclesiam istam, in honorem S. Sepulchri & Sancti Ioannis Baptistæ, in qua idoneam elegit sibi sepulturam: Ita Myræus ex Molano de natalibus Sanctorum Belgij. Enumeratq; perinde & alias dicti Ordinis, in diuersis locis & prouincijs Ecclesias, vt pote Leodijs, Tornaci, Aquisgrani, Coloniae, Embricæ, Dusseldorpij, Venlonæ, Rurmun-

dæ, Vuicardij, Altinemoris, Trapontis, Traiecti ad
 Mosam, Maseicæ, Dionanti, Brugis in Flandria, Syluæ
 ducis in Brabantia, Parisijs, Tolossæ, & olim Londini
 in Anglia, Hornæ, Schidami, Culenburgi, Franique-
 ræ, & alibi in Batavia, Frissia, vicinisq; dititionibus. Per
 Bohemiam quoque, Morauiam, Silesiam, ac Poloniam
 longè patere Ordinem Crucigerorum, cum insignijs
 rubeæ Crucis, Stellæ, & Naui culæ idem author memi-
 nit. Qui quantumlibet regionum, congregationum,
 atq; insignium differentijs sint secreti (nisi militari
 Ordini fuerint adscripti) vniuseiusdemq; Ordinis cen-
 seri debent, quotquot Canonorum Regularium vo-
 cabulo comprehenduntur, professionem Canonicam
 emittentes & retinentes. Addo, in Regno quoq; Vn-
 gariæ, antiquam Canonorum S. Sepulchri a Con-
 uentu Miechouien: profectam extrare coloniam, quæ
 cum antea prout acta vetusta eiusdem Conuentus ha-
 bent, in Districtu Sarisz constitisset, postea ob crebras
 Turcarum incursiones, in Comitatum Sczepusiensem,
 vti Regno Poloniæ conterminum, & ab hoste remo-
 tiorem locum translata est, vbi ad hoc vsq; tempus
 perseverat. Sunt autem ibi tres Ecclesiæ Parochiales,
 Landecensis, Hanusoffensis, & Lapsensis, quæ olim
 opulentes, solius hactenus Conuentus Miechouien:
 iurisdictionem agnoscunt, sed earum redditus nimium
 sunt accisi, ob alienationem possessionum, ad easdem
 Ecclesias spectantium, non ita pridem de consensu
 Andreæ S. R. E. Cardinalis Bathoræi, Præpositi Ge-

Eccl: ad Cō-
 uentum Mie-
 chouien:
 spectantes.
 Landecensis
 Hanusoffen-
 sis, Lapsen-
 sis.

neralis

neralis Miechouieñ: sub Anno 1599. fratribus id per-
mittentibus factam. Sed redeundo ad Martinum pri-
mum, vt dictum est, Præpositum Miechouieñ: Hic
cum annos triginta tres, in præfectura Coenobij Mie-
chouieñ: à se optimè constituti & ordinati, sancte &
laudabiliter transsegisset, tandem bonis operibus ple-
nus, senio & laboribus confectus, animam cælo intulit,
Anno Dñi, 1198. habita ratione illius in Poloniam
aduentus, nam Anno Dñi, 1165. in has oras primum
venisse comperitur.

Obitus Mar-
tini primi
Præpositi
Miechouie.

Anno Chri-
sti, 1198.

Sacra suosque pius crudeli ex hoste penates

Extulit Aeneas in Latiumq̃ tulit

*Que pietas Martine tua, hanc S. Ordo Sepulchri
Sarmatiae in Regno, stirps tua prima docet.*

Porro nos Cathalogum Præpositorum Miechouie:
ad peculiarem tractatum reiicientes, nunc ad antiqui-
tatem prærogatiuamq̃e almi Conuentus Miechou:
confirmandam, iusq̃e illius tuendum, aliquot vetu-
stiores Summorum Pontificum Bullas, Patriarcha-
rumq̃e Hierosolymitanorum rescripta, in medium
proferre constituimus. Præmisso prius insigni ac ve-
tustissimo ad Ecclesiastica beneficia Alexandri Tertij
Summi Pontificis ad Patriarcham Hierosolymitanũ
Diplomate, ne has sine consilio Fratrum suorum
Canonicorum sancti Sepulchri in posterum facere
præsumat. Quod sic habet: *Novit plenius, sicut cre-
dimus, tuæ discretionis prudentia, qualiter tu es*

fratres

fratres tui unum corpus sitis, ita quidem quod tu caput & fratres tui membra esse probentur; unde non decet te omisis membris, aliorum consilio in Ecclesie tue negotiis uti, cum id non dubium & honestati tue, & sanctorum patrum institutionibus contraire, innotuit siquidem auribus nostris, quod tu sine consilio fratrum tuorum Abbates & Abbatistas, & alias Ecclesiastas personas instituis & destituis, non considerans nec attendens, quomodo te non sit dubium statuta sacrorum canonum transgredi, cum in huiusmodi causis clericorum & laicorum circa te commorantium, qui de corpore ipsius Ecclesie non sunt, potius quam fratrum tuorum consilio uti dicaris. Inde est quod discretioni tue auctoritate Apostolica prohibemus, ne Abbates Abbatistas vel alias Ecclesiastas personas sine consilio & assensu Prioris & fratrum tuorum Canonorum sancti Sepulchri, instituere vel destituere aliqua ratione de cetero presumas, quod si forte, quod non credimus, contra prohibitionem nostram attentare presumpseris, nos tales institutiones & destitutiones, si quas amodo feceris, auctoritate Apostolica cassamus, & omni robore & stabilitate carere decernimus. Ita Alexander de electionib.

CAPVT SEXTVM.

Innocentij Papæ III. hinc Bullæ, pro domo Miechouienſi, & Cadlubconis Episcopi Cracouienſis, certæ decimæ pro eadem domo vetuſta fundatio.

AD ſtabiliendam horum omnium, quæ de antiquitate & prærogatiua Canonicoꝝ S. Sepulchri ſuperius attulimus, veritatem, ne cui amplius de hoc celebri Ordine, eiusq; ſacro ſurculo Conuentui videlicet Miechouienſi ambigendi relinquatur locus. Iuuat ad præmiſſas alioꝝ quoq; Summorum Pontificum, quæ in Archiuo Conuentus Miechouienſis authenticæ extant, addere atque recensere Bullas. Ex his verò Innocentij Papæ Tertiij, vti reliquis vetuſtiores merito primum locum ſibi vendicant, quibus Dominum Miechouienſem recenter in Polonia fundatam, cum omnibus perſonis & poſſeſſionibus ad eam ſpectantibus ſub protectionem Sedis Apoſtolice recipit, & donationes atque immunitates Principum pro ea Domo factas, authoritate Apoſtolica confirmat, in hunc qui ſequitur modum :

INNOCENTIUS EPISCOPVS SERVVS ſervorum Dei, dilectis filiis fratribus Domini- ci Sepulchri in Polonia conſtitutis, ſalutem & Apoſtolicam benedictionem.

Sacroſancta Romana Eccleſia, deuotos & humiles filios, aſſuetæ pietatis officio propenſius di-

Innocen. 3.
Anagninus
in Pontifi-
catum ele-
ctus Anno
1197. ſedit
annis 18.
menſ. 7. dies
16. obiit An-
no 1215. fuit
doctiſſimus
Theologus
& Iuriſcon-
ſultus, mul-
tasque Epi-
ſtolas de ore-
tales de re-
bus arduis
ſcripſit, vt
in li. 5. De-
cretor. plu-
ra ipſius ſcri-
pta reperian-
tur quam o-
mnium alio-
rum ſimul
Pontificum.
Hic Ponti-
ſex decretū
illud edidit,
vt ſaltem an-
nis ſingulis
in feriis Pa-
ſchalibus o-
mnes tam
mares, quā
ſemine ſa-
cræ Eucha-
riſtiam per-
cipere tene-

rentur. Cap.
 Omnis de
 pœnit. & re
 miss: Belar:
 de arte bene
 moriendi.
 lib: 1. c. 28.
 De eius lau.
 dibus vide
 Michaclem
 Bucchinge-
 rum in Hist.
 Ecclesiasti-
 ca noua fol:
 241.

* Alias Mic-
 chovv.

* Alias Iaxa.

* Alias Me-
 conc.

ligere consuevit, & ne prauorum hominum molestiis
 agitentur, eos tanquam pia mater sue protectionis
 munimine consouere. Eapropter dilecti in Domino
 filii, vestris iustis postulationibus, grato concurren-
 tes assensu, personas vestras, & Domum Domini
 Sepulchri, cum omnibus bonis que in presentiarum
 rationabiliter possidetis, aut in posterum iustis mo-
 dis, prestante Domino, poteritis adipisci, sub B. Pe-
 tri & nostra protectione suscipimus. Specialiter au-
 tem villam de * Meschow cum appeditis suis, quam
 bone memorie * Iasco, antecessoribus vestris prou-
 da contulit pietate. Nec non etiam libertates, im-
 munitates, & consuetudines rationabiliter Domui
 & hominibus vestris, a * Mescone quondam Polo-
 nie Duce, concessas, sicut ea omnia iuste & pacifice
 possidetis, & ipsius Ducis scripto authentico conti-
 netur, vobis ac per vos Domui vestre, autoritate
 Apostolica confirmamus, & presentis scripti patro-
 cinio communimus. Nulli ergo omnino hominum
 liceat hanc paginam nostre protectionis, & confir-
 mationis infringere, vel ei ausu temerario contraire.
 Si quis autem hac attentare presumpserit, indigna-
 tionem omnipotentis Dei & B. Petri & Pauli A-

postolo-

*postolorum eius se nouerit incursum. Datum Fe-
rentii II. Idus Octobr: Pontificatus nostri Anno
Vndecimo.*

Alterius Bullæ eiusdem summi Pontificis exemplar.

*Innocentius Seruus seruorum Dei, dilectis filiis
fratribus Dominici Sepulchri in Polonia constitutis,
salutem & Apostolicam benedictionem. Sacrosancta
Romana Ecclesia, deuotos & humiles filios, ex asue-
to pietatis officio, propensius diligere consuevit, &
ne prauorum hominum molestiis agitentur, eos tan-
quam pia mater, sue protectionis munimine conso-
uere. Eapropter dilecti in Domino filii, vestris ius-
tis postulationibus grato concurrentes assensu, per-
sonas vestras, & Domum Dominici Sepulchri cum
omnibus bonis, quæ in presentiarum rationabiliter
possidetis, aut in futurum iustis modis prestante
Domino poteritis adipisci, sub B. Petri & nostra
protectione suscipimus. Specialiter autem libertates
Domui & hominibus vestris à bonæ memoriæ Casi-
miro Poloniæ Duce concessas, sicut eas iuste ac paci-
fice possidetis, & in ipsius Ducis scripto authentico
continetur, vobis & per vos, Domui vestræ autori-
tate Apostolica cōfirmamus, & presentis scripti Pa-*

trocinio communimus. Nulli ergo omnino hominum liceat, hanc paginam nostre protectionis & confirmationis infringere, vel ei ausu temerario contraire. Si quis autem hoc attemptare presumpserit, indignationem Omnipotentis Dei & B. Petri & Pauli Apostolorum, eius se noverit incursum. Datum Ferentini II. Idus Octobr. Pontificatus nostri Anno Vndecimo.

Præsidebat tum Ecclesiæ Cracouiensi cum munere Episcopali, vir pius & doctus, Magister Vincentius Cadzūbcus, nobilis, prout notat Długosius, de domo & familia Roze, qui peculiarem gerendo erga ordinem nostrum affectum, decimam manipularum in villa Svviniarowva, accedente vniuersalis Capituli sui consensu, liberaliter Conuentui Miechouiensi impertiiuit, speciali que rescripto confirmauit. Quod nos veluti antiquitatis singulare monimentum, hoc loco apponere censuimus; cuius tenor hic est.

In Nomine sanctæ & Indiuiduæ Trinitatis, Patris, & Filij, & Spiritus sancti, Amen.

Quia mundus caducus est & diuersis quotidie casibus variatur, necesse est actiones legitimas, que memoria indigent, per scripti continentiam transmitti in notitiam posterorum. Ea propter ego Vincentius miseratione Dei Cracouiensis Episcopus,

Mona-

Monasterio de Miechouia, pietatis intuitu, decimā in villa Budiuogii quæ vocatur Swiniarowo, consensu Capituli Ecclesiæ nostræ dedi in eleemosynam, ad loci indigentie succurrendum iure perpetuo possidendam. Actum est in Cracouia Anno ab Incarnatione Dñi, M. CC. XIII. Kalend: Septemb. in ipso die Assumptionis Gloriosæ Virginis Mariæ Testes huius rei sunt, Decanus Cracouiē: Viseslaus, Præpositus Bochuualus, Archidiaconus Andreas, Magister Benedictus, Cantor Laurentius, Custos Henricus, Blasius, Woico, Radulphus, Petrus Blasentius, Ioannes de Crußow, Pancrelaus, Ioannes filius Gostrzlaui, Stephanus Slawoß, Martinus, Nicolaus, Goruinus, Pancratius, Szcrlaus, Boguslaus, Troianus, Zawisza, Dobegneus Præpositus Wislicen: Nicolaus Kielcensis Decanus, Ioannes Præpositus, Adalbertus Archidiaconus Sandomiriensis, Ioannes Archidiaconus Zawichost: Stephanus & alii plures.

Tantæ autem humilitatis ac pietatis, hunc Episcopum fuisse Polonici scriptores referunt, ut cum multa Cracouiē; Basilicæ ac religiosis locis contulisset, ultro Episcopatu Cracouiē: se abdicauit, nec quicquam aduersante Principe Lescone Albo, & dissua-

dente Collegio Sacerdotum, in Andreouienſi Monaſterio Religionem Ciftercien: profeſſus, reliquos vitæ annos deuote exegit. Extant in Archiuio Conuentus Miechouien: plura antiquitatis præclariffima monumenta, quæ maximum Ordini ſancto & loco addunt ſplendorem ac dignam venerationem, ſed ſingula proſequi longum eſſet: ſufficit ea tantum comminſci quæ ad illuſtrandum inſtitutum noſtrum pertinere dignoſcuntur. Proinde ſequentium ſumorum Pontificum ad eam rem ſpectantia diplomata, hic aſſatim producere geſtit animus.

CAPVT SEPTIMUM.

Honorius 3.
in Pontifica
tu electus
Anno 1215.
ſedit annos
10. menſ: 7.
dies 13. obi-
it An: 1226.
confirmauit
ordines Præ-
dicatorum
& Minorũ
biennio an-
te mortem.
D. Frãciſci.

Honorius Papa III. Ordinem vniuerſum ſancti Sepulchri eiusq; Eccleſias & Domos, ſub patrocinium ſedis Apoſtolice recipit.

Honorius Episcopus Seruus ſeruorum Dei, dilectis filiis Priori & Fratribus Dominici Sepulchri, ſalutem & Apoſtolicam benedictionem. Effectum iuſta poſtulantibus indulgere, & vigor æquitatis & ordo exigit rationis, præſertim quando petentium voluntatem & pietas adiuvat, & veritas non relinquit. Quapropter dilecti in Domino filii, veſtris iuſtis poſtulationibus gratum impertientes

aſſenſum

assensum, Ecclesiam gloriosi Dominici Sepulchri, sub
B. Petri & nostra protectione suscipimus, & quas-
cunque possessiones, quecunque bona, eadem Eccle-
sia ubilibet locorum in presentiarum rationabiliter
possidet, aut in futurum iustis modis prestante Do-
mino poterit adipisci, ac specialiter Ecclesiam quā ha-
betis apud Accon, & Ecclesiam quam habetis apud
Tyrū, Ecclesiam quam habetis Antiochia, Ecclesiam
quam habetis apud Constantinopolim, Ecclesiam
quam habetis apud Theßalonicā, & Ecclesiam quam
habetis Baroli, Ecclesiam quam habetis Troie, Eccle-
siam quā habetis Brundisū, Ecclesias quas habetis in
Sicilia, Ecclesias quas habetis in Hispania, Ecclesias
quas habetis in Polonia, Ecclesias quas habetis in Bo-
hemia, Ecclesias quas habetis in Vngaria, Eccle: quas
habetis in Sclauonia, Eccle: quas habetis in Alema-
nia, Ecclesias quas habetis in Francia, & Ecclesias
quas habetis in Lombardia & in Tuscia, & Ecclesias
quas habetis in Anglia, cum omnibus tenimentis
& pertinentiis earundem, tenimentum quoq; quod
habetis apud Tripolim, & tenimentum quod habe-
tis apud Subeloth, Casale quod habetis apud Cyprū,
& tenimentum quod habetis in Moravia cum v-

niuersis illorum pertinentiis, sicut ea omnia iuste ac
 pacifice possidetis. Omnes insuper libertates, immu-
 nitates & iura, quæ vos seu Ecclesiæ vestræ obtinui-
 stis per quandraginta annos ante Concilium gene-
 rale, vobis & Ecclesiis ipsis, non obstantibus contro-
 uersis motis post ipsum Concilium, auctoritate A-
 postolica confirmamus, & presentis scripti patroci-
 nio communimus. Porro clerici Ecclesiarum vestra-
 rum, Crisma, Oleum sanctum, Ordinationes cleri-
 corum, Consecrationes altarium ab Episcopis Dîe-
 cesanis accipiant, si tamen Catholici fuerint, & gra-
 tiam atq; communionem Apostolicæ sedis habuerint,
 eaque ipsis gratis & sine gravitate voluerint exhi-
 bere, alioquin liceat eis quos maluerint adire Ca-
 tholicos Antistites, qui nostra fulti auctoritate, quod
 postulatur indulgeant. Nulli præterea fratrum ve-
 strorum liceat post factam in Ecclesiâ vestra profes-
 sionem, sine Patriarchæ, aut Prioris sui licentia, ab
 ipsa discedere, discedentem vero, sine communium
 cautione literarum, nullus audeat retinere. Ad
 hæc ad exemplar felicitis memoriæ Adriani Papæ
 prædecessoris nostri statuimus, ut Ecclesiæ vestræ in
 quibus fuerit Congregatio fratrum, pro comuni

*parochie Interdicto non vacent, sed liceat semper
fratribus vestris in eisdem Ecclesiis comorantibus, non
tactis tintinabulis, Interdictis & Excommunicatis eie-
ctis, clausis ianuis & submissa voce, diuina officia
celebrare. Nulli ergo omnino hominum liceat hanc
paginam nostre protectionis, confirmationis, & con-
stitutionis infringere, vel ei ausu temerario contrai-
re, si quis autem hoc attemptare presumpserit, In-
dignatione Omnipotentis Dei & B. Petri & Pau-
li Apostolorum eius se noverit incursurum. Da-
tum apud Urbem Veterem, XIV. Calend: Sept
Pontificatus nostri Anno quinto:*

Annus Chri-
sti, 1220.

Fecerunt id consequenter & alii quam plures summi
Pontifices, magnisq; gratiis Apostolicis Ordine hunc
per antiquum ornauerunt, quorum rescripta singula non
est presentis negotii recensere, cum ea separatim vo-
lumen requirant, quæ nos prope diem in lucem pro-
ditura speramus, nec enim conuenit tantum thesau-
rum à summis Pontificibus profectum, diutius in ab-
sccondito teneri. Illud hic omnino ingrato silentio
præterire non licet, quod inter præstantissima Ordinis
nostri monumenta annumerari debet, Urbani nem-
pe Papæ IV. effusa erga religionem nostram liberali-
tas, & penè paternus in eam affectus. Hic enim ex
corpore Canonorum S. Sepulchri, primum in Patri-
archam Hierosolymitanum lectus, postea in culmen

sedis

sedis Apostolicæ à Deo vocatus, non immemor quod olim è Syria discessurus suis Clericis dixerat, si oblitus fuero tui Hierusalem obliuioni detur dextera mea, adhæreatq; lingua mea faucibus meis, si non ineminero tui; Studium omne ad id conuertit, quo ordinem hunc honorificentissimum apud omnes redderet, proinde multis eum ac magnis gratiis Apostolicis donisque comulasse comperitur, è quorum numero vnum atq; alterum exemplar in medium proferre sufficiet.

Urbanus 4.
Trecensis in
Pontificatū
electus An-
no 1260. se-
dit annos 3.
mens: 1. dies
4. obiit. An.
no, 1264.

U R B A N U S IV. EXIMIT ORDINEM sancti Sepulchri ab exhibitione procuratorum, & cuiuslibet subsidii, Archiepiscopis, Episcopis & quibuslibet aliis Prælati, faciendi.

Urbanus Episcopus Seruus seruorum Dei, dilectis filiis & fratribus Dominici Sepulchri Hierosolymitani Ordinis sancti Augustini, salutem & Apostolicam benedictionem.

Pro re delectabili & iucunda ducimus, ut cum loca diuino dicata cultui, ex potestate nobis diuinitus attributa, multipliciter honorare possimus, sanctam Hierosolymitanam Ecclesiam, de cuius regimine licet immeriti nos fuimus ad Apostolicæ dignitatis fastigium euocati, cum locis sibi subditis, attolamus munere gratiæ specialis. Hinc est quod nos vestris supplicationibus annuentes, autoritate vobis pre-

sentium

sentium indulgemus, ut vos seu Priores, aut Rectores vel fratres, Prioratum, Ecclesiarum, Dommorum & membrorum vestrorum, ad exhibitionem procurationum, vel cuiuslibet subsidij faciendam, Archiepiscopis vel Episcopis, aut quibuscumq Ordinaris, vel Ecclesiarum Prelatis, seu etiam Legatis & Nuntiis Apostolicae sedis, exceptis sanctae Romanae Ecclesiae Cardinalibus, minime teneamini, nec ad id compelli possitis, sine speciali mandato sedis eiusdem, faciente plenam & expressam de Sepulchro Dominico, & indulgentia huiusmodi mentionem. Nos enim nihilominus Suspensionis, Interdicti, & Excommunicationis sententias, si quas in vos vel aliquem vestrum, seu vestras Ecclesias, per quemcumq contra indulgentiam ipsam promulgari contigerit, exnunc decernimus irritas & innanes. Nulli ergo omnino hominum liceat hanc paginam nostrae concessionis & constitutionis infringere, vel ei ausu temerario contraire. Si quis autem hoc attemptare presumpserit, Indignationem Omnipotentis Dei & Beatorum Petri & Pauli Apostolorum se noverit incursum. Datum apud Urbem veterem ii Non. Nouembr. Pontificatus nostri Anno secundo.

I D E M S V M M V S P O N T I F E X LIBERAS facit Ecclesias dicti Ordinis à solutione decimarum laborum suorum, & exactionibus insolitis, & quod liceat de suo grèmio ad Ecclesias fratres præsentare.

Urbanus Episcopus Servus Servorum Dei, dilectis filiis Priori & Fratribus Dominici Sepulchri Hierosolymitani, salutem & Apostolicam benedictionem.

Dei ac Domini & Redemptoris nostri Iesu Christi reuerentia nos inducit, ut Ecclesiam vestram, quam ipse Christus sua corporali presentia illustravit, & toti mundo reddidit venerandam, diligere ac fouere, speciali sollicitudine studeamus. Sane ex parte vestra fuit propositum conquerendo, quod cum quedam Ecclesie vobis subiecte, usque ad proxima tempora fuerint à prestatione decimarum laborum suorum liberae ac immunes, & instituendi ac destituendi personas, in quibusdam ex ipsis Ecclesiis liberam habueritis facultatem, quidam Archiepiscopi & Episcopi, alijsq; Prelati, occasione Concilij generalis, euacuare nituntur huiusmodi libertates, & nitentes à vobis de laboribus vestris decimas extorquere, vosq; compellere ad præsentandum in ipsis Ecclesiis

perpetuos

perpetuos vicarios clericos seculares, ac aggra-
uantes vos exactionibus in debitis & insolitis, ac in
Ecclesias ipsas & personas consistentes, in illis frequē-
ter Excommunicationis, & Interdicti sententias, sine
causa rationabili iaculantes, his & aliis modis se vo-
bis plus solito difficiles exhibent, & molestos, qui hoc
tēpore se vobis deberent magis fauorabiles & propi-
tios exhibere. Quare nobis humiliter supplicastis, ut
immunitates & libertates, quibus per quadraginta
annos, ante ipsum Concilium gauise sunt Ecclesie
memorate, non obstantibus controuersis motis à
tempore Concilii memorati, confirmantes easdem
nec permittentes violari temere, vel infringi, ad-
uersus alia grauamina prenotata, prouisionis Apo-
stolica remedium apponere dignaremur. Nos igitur
precibus vestris benignius impertientes assensum, ad
instar felicis recordationis Alexandri Papæ prede-
cessoris nostri, immunitates & libertates predictas,
vobis & prefatis Ecclesiis, sicut eas obtinuistis, paci-
ficè usque ad tempus Concilii supradicti, auctoritate
Apostolica confirmamus, & presentis scripti pa-
trocinio communimus, auctoritate presentium di-
strictius inhibentes, ne quis Ecclesias ipsas vel perso-

nas comorantes ibidem, tam super ipsis decimis, quā aliis exactionibus nouis & indebitis molestare, vel in eos Excommunicationis vel Interdicti sententias, si ne manifesta & rationabili causa, & canonica monitione premissa, promulgare presumat. Si quas vero sententias aliter proferri contigerit, eas decernimus irritandas, & illos qui easdem protulerint canonice puniendos. Nulli ergo omnino hominum liceat hanc paginam nostre confirmationis, inhibitionis, & constitutionis infringere, vel ei ausu temerario contraire: Si quis autem hoc attentare presumpserit, Indignationē Omnipotentis Dei & BB. Petri & Pauli Apostolorum eius se nouerit incursum. Datum apud Montem Fiascon: 3. Non: Octobr: Pontificatus nostri Anno secundo.

IDEM VRBANVS IV. PONT: MAX: Conuentum Miechouien: cum annexis membris, ab iurisdictione Archiepiscoporum & quorumlibet Locordinariorum eximit, quam exemptionem postea Gregorius PP. XI. confirmauit, in hunc qui sequitur modum:

Gregorius Episcopus Seruus seruorum Dei, dilectis filiis, Preposito & fratribus Domus Sepulchri Dominici Hierosolymitani de Miechonia Ordinis

S. Augu-

S. Augustini Cracouien: Diœcesis, salutem & Apostolicam benedictionem. Vera deuotionis sinceritas promeretur, vt vos & Domum vestram paterno prosequentes affectu, petitiones vestras quantũ cum Deo possumus, ad exauditionis gratiam admittamus. Tenorem igitur cuiusdam Priuilegij felicitis recordationis Urbani Papæ IV. predecessoris nostri, quod incipit vetustate consummi, & quod inspicere & examinari fecimus, diligenter de verbo ad verbum ad vestræ supplicationis instantiam presentibus adnotari fecimus, qui talis est: Urbanus Episcopus Seruus seruorum Dei, dilectis filiis Preposito & fratribus Ecclesiæ Dominici Sepulchri de Miechouia, ad Ecclesiā Hierosolymitanam pertinentis: Ordinis S. Augustini Cracouien: Diœcesis, salutem & Apostolicam benedictionem. Cum sanctam Hierosolymitanam Ecclesiā, de cuius regimine, benignitas conditoris omnium prout dignanter sibi placuit, nos licet immeritos ad Apostolicæ dignitatis fastigium euocauit, illa de causa potissime affectum gerimus specialem, quia eam Deus & Redemptor noster Dominus Iesus Christus sua corporali presentia insignem reddidit, & consecratam suo pretioso sanguine,

ne, venerandam vniuersitati fidelium stabiliiuit, ex
huiusmodi enim affectionis nostræ Synceritate pro-
cedit, quod non solum ipsius Ecclesiæ iura in suo robo-
re conseruari cupimus, sed etiam attollendis eius
honoribus & profectibus ampliandis insistere iu-
giter affectamus. Hinc est quod nos vestris sup-
plicationibus deuotis inclinati, Ecclesiā vestram
de Miechouia, & omnia ipsius membra existentia,
in Polonia, Bohemia, Sclauonia, Russia, Vngaria,
& Teutonia ab omni iurisdictione, potestate ac do-
mino Archiepiscoporum omnium, & aliorum quo-
rumlibet Prelatorum, seu Capitulorum, tam Ca-
thedralium quam aliarum Ecclesiarum, & omnium
Ecclesiasticarū personarum totaliter & perpetuo au-
thoritate Apostolica eximimus, Statuentes vt dicta
Ecclesia Miechouien: & membra prædicta in spiri-
tualibus & tēporalibus soli Ecclesiæ Hierosolymitanæ,
& nulli alij sint subiecta, ita quod nec dicti Archie-
piscopi & Episcopi, seu Prelati, Capitula, Ecclesiasti-
cæq; personæ, nisi tantū Patriarchæ Hierosolymitano
qui pro tempore fuerit, Ecclesiāq; vestram & mē-
bra ipsius vt pote ab illorum iurisdictione prorsus
exempta, vel vos aut personas vestras omnes Domi-

no seruientes in illic & in posterum seruituras, communiter vel diuissim interdicare, suspendere, vel excommunicare valeant; aut alias quocunque modo in vos & Ecclesias vestras, membraq; predicta & personas earum, potestatem vel iurisdictionem aliquam exercere, nos enim si secus presumptum fuerit decernimus irritum & inane. Nulli ergo omnino hominum liceat hanc paginam nostre exemptionis nostriq; statuti & decreti infringere, vel ei ausu temerario cōtraire, si quis autem hoc attemptare presumpserit, Indignationem Omnipotentis Dei & Beatorum Petri & Pauli Apostolorum eius se nouerit incursurum. Datum apud Vrbe[m] ueterem 11. Non: Nouebr. Pontif: nostri Anno secundo. Nos itaq; vestris in hac parte supplicationibus inclinati, huiusmodi Priuilegium authoritate Apostolica innouamus, & presentis scripti patrocinio communimus, per hoc autem nullum ius alicui de nouo acquiri volumus, sed antiquum tantummodo conseruari. Nulli ergo omnino hominum liceat hanc paginam nostre innouationis infringere, vel ei ausu temerario contra ire Si quis autem hoc attemptare presumpserit Indignationem Omnipotentis Dei & Beatorum

*Petri & Pauli Apostolorum eius se nouerit incur-
surum. Dat. Avinioni 11 Calend: Maij, Ponti-
ficatus nostri Anno secundo.*

Porro memoratus Urbanus IV. Pontifex Maximus, festiuitatem Corporis Christi feria 5. post octauas Pentecostes solenniter celebrandam instituisse legi-
tur. Occasionem dedit sacerdos quidam apud Vulsinios Diocesis Vrbeuetanæ. Is enim cum sacra Missarum solemniam celebraret, Sacramento Eucharistiæ iam perfecto, de panis & vini transubstantiatione, & Christi corporis sub speciebus panis & vini præsentia dubitauit, cum autem ambigeret dictu & visu mirum, statim ex sanctissima quam in manibus tenebat hostia, sanguis copiosissimus manauit, & totam eam mappam quam corporale vocant tinxit. Voluit Urbanus mappam sanguine imbutam videre, quam dum Episcopus Vrbeuetanus detulisset, & inquisitione facta veritatem rei Pontifici significasset, ille ex voto S. R. E. Cardinalium, eam anniuersariam instituit, corporale vero in Ecclesia Vrbeuetana recondidit. Sanctus Thomas Aquinas, tam insignis celebritatis Officium Ecclesiasticum composuisse fertur, cum hymno & prosa, quod misit ad Urbanum PP. à quo in præmium columnam argenteam retulisse eum narrat Naucleus. Tandem Urbanus ætate & morbis confectus, ab Vrbeueteri Perusium delatus, in Ecclesia S. Petri deuote susceptis Ecclesiæ Sacramentis, 6. Nonas Octo:

diem

diem clausisse extremum comperitur. Verus pastor
urbis & orbis, Canonorum vero S. Sepulchri fautor
maximus & propagator. Corpus illius Perusij in Ec-
clesia Cathedrali S. Laurentij sepultum esse dicitur.

CAPVT OCTAVVM.

*Præpositi Miechouien: titulum ac dignitatem Ge-
neralatus totius Ordinis Canonorum S. Sepul-
chri, ex speciali rescripto Patriarchæ Hierosoly-
mitani, & decreto sedis Apostolicæ retinent.*

DEducta per Dei gratiam Conuentus Miechou:
atque adeo vniuersi Canonorum Ordinis S.
Sepulchri, hoc quoq; tertio libro, ex sacris Apo-
stolicis rescriptis, antiquitate & præeminētia: restat vt
ostendamus, qualiter penes dictum Conuentum, vti
principale membrū, suprema potestas præfati Ordinis
remanferit, & quod non alium præterquā ipsum Præ-
positum Miechouien: ipsemet Patriarcha Hierosoly-
mitanus, in Vicarium Generalem deputauerit, atque
peculiari diplomate eam dignitatem solis Præpositis
Miechouien: ratam esse voluerit: cuius hic tenor est.

*Fernandus, miseratione diuina sanctæ se-
dis Hierosolymitanæ Patriarcha, Venerabili ac re-
ligioso viro, Fratri Stanislao Præposito Miechou:
Ordinis S. Augustini S. Sepulchri Domini Hiero-
solymitani Cracouiensis Diœcesis salutem, & in eo*

qui pro salute humani generis elegit Hierosolymis crucifigi, & die tertia resurgere de sepulchro, paternam benedictionem. Debitum pastoralis officij nos excitat & inducit, ut de salubri statu personarum, & locorum nostro & prefate Ecclesie regimini subiectorum cogitemus attentius, ac eis super hoc providere, authore Domino, solliciti studeamus, ac ubi personaliter adesse non possumus, huiusmodi nostre sollicitudinis onera illis impertiamur personis, quarum fidei sincera deuotio, honesta conuersatio, ac prouida circumspectio, nobis prestant fiduciam plenioram. Considerantes testimonia nuntiorum probitatis vestre, propter quam non immerito partem omnis predictae sollicitudinis vobis prouidimus imponendam: unde literarum tenore presentium, omnimodo, via, & forma quibus melius de iure & consuetudine possumus, vos facimus, constituimus, & ordinamus pro nobis, & prefata Hierosolymitana Ecclesia, nostrum procuratorem, oeconomum, correctorem, & reformatorem, ac Vicarium generalem in Polonia, & in tota prouincia Gnesnen: & Ungaria, Sclauonia, super omnes & singulas Domos & loca, ac personas Ordinis predicti dictae Ecclesie

Hierosolymitane subiecta, quoscunque alios nostros Vicarios, si in dictis terris fuerint, per nos vel alios positi, & constituti reuocantes. Dantes & concedentes vobis eorundem tenore presentium, plenam & liberam potestatem, & mandatum speciale, loca predicta, Monasteria, Ecclesias, Domos, Preposituras, Prioratus, Plebanias & Hospitalia, & quaecunque alia loca, cuiuscunque conditionis, Ordinis Sepulchri Domini Hierosolymitani predicti, nostra auctoritate visitandi, & reformandi, nec non loca ipsa & personas ipsorum, videlicet Prepositos, Priores, Priorissas, Magistros, Praeceptores, Plebanos, Rectores, & alios Administratores, Oeconomos & Officiales, Fratres, Confratres, Conuersos, Sorores, & alias personas cuiuscunque conditionis & sexus existant, & quocunque nomine censeantur corrigendi & etiam de criminibus excessibus, & culpis aliis, secundum predicti Ordinis nobis subiecti obseruantias inquirendi, tam in capite, quam in membris, puniendi quoque & reformandi, in eis quae reformationis officium noueritis indigere, & generaliter tam in Spiritualibus, quam in temporalibus, inobedientes & rebelles omni canonica correctione, ac per

censuram Ecclesiasticam compescendi, & inuocandi
 super hoc si opus fuerit auxilium quorumcunq; Ordina-
 riorum, ac etiam brachii secularis. Excommu-
 nicandi & absoluendi excommunicatos, etiam pro
 violenta manuum iniectione, & incasibus de iure
 nobis reseruatis: Confessiones in foro penitentiae au-
 diendi, & absoluendi in casibus in quibus nos possu-
 mus, satisfactionem & penitentiam salutarem eis
 iniungendi, causas, lites, & controuersias, ad forum
 seu cognitionem, iurisdictionemq; nostram specta-
 tes, audiendi & decidendi. Damus etiam vobis
 plenam & liberam potestatem, personas idoneas in
 Fratres, Conuersos, Oblatos, & Præbendarios præ-
 dicti Ordinis recipiendi, circa hæc quæ sunt munia,
 & prout ad nos noscuntur spectare officia præmissa
 faciendi, ubi & quando ac quoties vobis visum fue-
 rit expedire. Ac etiam personas dicti Ordinis ido-
 neas sufficientes & honestas in Canonicos creandi,
 secundum solemnitates debitas, & etiam requisita
 domus, & Fratres, Confratres, & Conuersos & alias
 quascunq; personas inferiorum graduum de loco ad locum
 mittendi & transmittendi, reuocandi, nec non Pre-
 positos, Priores, Priorissas, ac ceteros Magistros, Ple-

banos & Administratores Domorum, Monasteriorum, Ecclesiarum hospitalium & aliorum locorum dicti ordinis, si necessitas & honestas persuaferit, suis administrationibus suspendendi, deponendi, amouendi, & alios loco ipsorum instituendi, totiens, quotiens vobis visum fuerit expedire. Damus insuper vobis earundem tenore presentium, speciale cum plena potestate mandatum super bonis mobilibus & immobilibus Ordinis predicti, & locorum predictorum qualitercunque alienatis, distractis, & obligatis, plenarie ingerendi. Et ea que alienata reperieritis, repetendi, recuperandi, & recipiendi, & ad ius & proprietatem & utilitatem Ordinis, & locorum ipsorum & Ecclesie Hierosolymitane, ad quam proprie spectare dignoscuntur, integraliter reducendi, responsiones seu pecuniarum quantitates, & pensiones, nobis pro predictis locis, & a personis debitas, & alia quecunque debita seu etiam legata petendi, exigendi, & recipiendi, ac etiam debitores nostre iurisdictioni subiectos canonica cohibitione, & modo debito, ad soluendum & ad satisfaciendum per censuram Ecclesiasticam compellendi, & de receptis ac solutis finem & quietationem de ulterius non petendo faciendi, & pro predi-

Etis omnibus & singulis agendi & defendendi in
 iudicio & extra iudicium, coram quibuscunque
 Iudicibus Ecclesiasticis vel Secularibus cōpetentibus,
 iurandi de calumnia & veritate dicenda, & quod-
 libet alterius generis iuramentum prestandi & reci-
 piendi, & omnia alia, quæ in causis, litibus, ques-
 tionibus, secundum iuris ordinem & consuetudinem
 exercenda sunt, & prout utiliter fieri poterit facien-
 di, nec non & in causis componendi, paciscendi, tran-
 sigendi & compromittendi, arbitros eligendi, & eorū
 arbitria valandi, approbandi, & protestandi, & de-
 mum omnia alia & singula, tam per vos quam per
 alium seu alios, qui per vos substituti ad hoc fuerint,
 super quo vobis plenam concedimus facultatem fa-
 ciendi, in prædictis & circa prædicta cum dependen-
 tiis & iis quæ fuerint necessaria, & utilia, etiamsi
 mandatum exigant speciale, & quæ nosmet facere-
 mus si presentes essemus. Nos enim super omnibus
 & singulis cum plena potestate, tenore præsentium cō-
 mittimus vices nostras, donec eas ad nos duxerimus
 reuocandas; promittentes nos ratum, gratum, & fir-
 mum perpetuo habituros, quæcunque per vos vel a-
 lium vestrum substitutum in præmissis & quolibet

præmissis-

premissorum actum fuerit siue gestum, ac iudicio si-
sti & iudicatum solui, cum clausulis opportunis,
sub hyppoteca & obligatione omnium bonorum pre-
dictorum tantummodo. Et in fidem ac testimonium
omnium premissorum, presentes literas siue presens
publicum instrumentum, subscribi & publicari mā-
dauimus, per nostrum publicum subscriptum, &
una cum signo & subscriptione ipsius consuetis
nostrig^q Patriarchatus magni sigilli fecimus appen-
sione communiri. Volumus etiam quod nostro sigillo
stante & amoto istud presens publicum instrumen-
tum habeat robur & firmitatem. Datum & actum
Romæ in Monasterio S. Iacobi de Sutigmano de
Vrbe, sub Anno à Natiuitate Domini, Millesimo
Trecentesimo Octuagesimo tertio, Indictione sexta,
die vero tertia mensis Februarii, Pontificatus san-
ctissimi in Christo Patris & Domini nostri, Domi-
ni Urbani diuina prouidentia Pape sexti, Anno
quinto. Presentibus ibidem honorabilibus & discretis
viris, Domino Gasparo de Caldermis de Bononia.
Decretorum Doctore, & Aduocato pauperum in
Romana Curia, & Francisco Fernandi Canonico
Ecclesie Palentinensis, & literarum Aposto-

Anni: Chri.
sti, 1383.

licarum

licarum Domini nostri Papæ predicti scriptore, & quam pluribus aliis fide dignis testibus ad præmissa vocatis specialiter & rogatis.

Et ego Ioannes quondam Petri de Monasterio Magna vallis Clericus Ireueren: Diæcesis, Publicus Apostolica authoritate Notarius, præmissis omnibus & singulis, dum sic ut præmittitur agerentur & fierent, una cum prænominatis testibus præsens fui, eaque omnia & singula sic fieri vidi, & audiui, aliis occupatus negotiis, per alium fideliter scribi feci, & in hanc publicam formam redegi, una cum appensione sigilli præfati Domini Patriarchæ, & de eiusdem mandato hic me subscripsi, signoq; meo solito & consueto signaui, rogatus & requisitus in fidem & testimonium omnium & singulorum præmissorum.

Cum vero Prior Perusinus soli muneris id sibi debere contendisset, exactionesq; indebitas à Conuentu Miechouien: repetere vellet, atq; eo nomine Præpositū Miechouiensem ad Curiam Romanam euocasset, cuius rei extat in carthophilacio Conuentus Miechouien: totius causæ processus, in formam publici instrumenti redactus: Sedes Apostolica visis ac perspectis iuribus & immunitatibus Præpositi Miechouien: per auditorem causarum suæ Cameræ Apostolicæ, huiusmodi pro parte Præpositi Miechouienensis tulit decretum:

Christi nomine inuocato, pro tribunali sedentes & solum Deum præ oculis habentes, de Dominorum coadiutorum nostrorū consilio & assensu, super hanc nostram definitiuam sententiam, quam ferimus in

his scri-

his scriptis pronuntiamus, decernimus, & declaramus, oppositiones, molestationes, perturbationes, vexationes, inquietationes, & impedimenta predictas & predicta fuisse & esse temerarias, illicitas, & iniustas, temeraria, illicita & iniusta, ac defacto presumptas ac presumpta, ipsiq; domino Nicolao de Balionibus Priori Generali Ordinis predicti, de & super oppositionibus, molestationibus, perturbationibus, vexationibus, inquietationibus, & impedimentis, ac prætensa annua pensione centum florenorum predictorum, perpetuum silentium imponendū fore & imponimus, dictumq; Præpositum Miechouien: qui pro tempore fuerit & est, ac ipsam Ecclesiā Miechouien: cum omnibus eius membris, fuisse & esse ab omni iurisdictione, potestate, & dominio predicti D. Nicolai Prioris Generalis Ordinis S. Sepulchri Dominici, totaliter & perpetuo exemptos, soliꝝ Ecclesiæ Hierosolymitanæ & nulli alij subiectos, ipsūq; D. Præpositum ab impetitione dicti D. Nicolai Prioris absoluendum fore & absoluimus, condemnatione expensarum ex causa omittentes. Lecta, lata, & in scriptis promulgata fuit hæc præsens nostra definitiua sententia, per nos Ioannem de Tho-

mariis auditorem prefatum, Bononia in Ecclesia S. Petronii pro audientia causarum Apostolicarum, specialiter deputata, nobis inibi mane hora causarum adiura reddenda in loco nostro solito pro tribunali sedentibus, sub Anno à Natiuitate D. 1414 Indictione septima, die lune Vigesima prima Mensis Maij, Pontificatus Domini Nostri D. Ioannis Papæ XXIII. predicti Anno quarto.

Præsentibus ibidem discretis viris Magnificis Ioanne de Breydbach, & Theodorico de Lync Notario publico scribæq; nostris clericis Colonien: Ciuitatis & Traiecten: Diæcesis, testibus ad præmissa vocatis specialiter & rogatis: quæ quidem nostra definitiua sententia postmodum nulla appellatione suspensa in rem transiit iudicatam: Nos igitur præsentis literas seu præsens publicum instrumentum, huiusmodi nostram definitiuam sententiam in se continentes seu continens exinde ferri, & per Petrum Notar: publicum, nostrumq; & huiusmodi causa coram nobis scribam infra scriptum subscribi & publicari mandauimus, nostriq; sigillo fecimus appensione communiri, in fidem & testimonium omnium & singulorum præmissorum.

CAPVT NONVM.

Conuentus Miechouien: ex sedis Apostolicæ Privilegio, Parochiales Ecclesias licite tenet, illiusque Præpositus Pontificalibus insigniis utitur.

Concludendo breui compendio, hoc nostrum de Ordine Canonico S. Sepulchri Domini Hierosolymitani susceptum negotium, ad declarandam peculiarem Conuentus Miechouien: prærogati-
uam,

uam, visum est coronidis vice, duo adhuc diplomata Bonifacij nempe Noni, & Ioannis Vigesimali tertij Summorum Pontificum superioribus Bullis adnectere. Quorum alter confirmando Bullam Urbani IV. indulget Clericis Miechouien: in Ecclesiis Iurisdictioni suæ subiectis, curam & regimen animarum (non obstante quod hæ aliquando per seculares clericos gubernarentur) licite posse obire. Alter mitra, peditoque Præpositos Miechouienſes donat & exornat. Quod nos singulari erga Conuentum sedis Apostolicæ fauori, sub cuius patrocínio tutelaque Ordo, noster perpetuo conquiescit, acceptum ferentes, easdem hic apponere censuimus.

Bonifacius Episcopus Seruus seruorum Dei ad perpetuam memoriam. Sacra Religionis sub qua dilecti filii Præpositus & fratres Domus S. Sepulchri de Miechouia ad Ecclesiam Hierosolymitanam spectantis, Ordinis S. Augustini Eracouien: Diœcesis, deuotum ac sedulum exhibent Domino famulatum, promeretur honestas ut votis eorum, in his præsertim, quæ ipsorum & dictæ Domus utilitatem concernunt, quantum cum Deo possumus fauorabiliter annuamus. Ipsorum igitur Præpositi & fratrum supplicationibus inclinati, literas felicitis recordationis Urbani Papæ IV. prædecessoris nostri eis olim concessas, quas in Cancellaria nostra diligenter inspicimus & presentibus de verbo ad verbum, cum incipiant vetustate consumi inseri curauimus, auctoritate Apostolica tenore presentium innouamus, & presentis scripti patrocínio cõmunimus: per hoc autem nulli in eisdem Præposito & fratribus de nouo acquiri volumus, sed antiquum tantummodo conseruamus. Tenor vero dictarum literarum talis est

Urbanus Episcopus Seruus seruorum Dei, dilectis filiis, Præposito & fratribus Ecclesie S. Sepulchri de

Bonifacius
Neopoli-
canus, in Põ-
tificatum e-
git, anno
1399 sedit
an: 14. mē.
1. obiit an-
no 1404.
Hic circiter
50 annorum
cum Pontifi-
catu iniis-
set, fertur cõ-
irmaile Fe-
tum visitra-
tionis Virgi-
nis Mariæ.

Miechouia ad Hierosolymitanā Ecclesiam spectantis, Ordinis S. Augustini Cracouien: Diœcesis, salutem & Apostolicam benedictionem. Ecclesiæ vestræ indemnitati paterna volentes in posterum sollicitudine præcauere, ut in Ecclesiis per Poloniam constitutis, in quibus Ius patronatus habetis, possitis per fratres vestros in sacerdotii vel alius ordinibus, prout Ecclesiarum vestrarum onus exigit, constitutos facere deseruiri, etiamsi earum alicui cura sit animarum annexa, non obstante quod Ecclesiæ ipsæ consueuerunt aliquando per seculares clericos gubernari, auctoritate vobis presentium indulgemus. Nulli ergo omnino hominum liceat hanc paginam nostræ concessionis infringere, vel ei ausu temerario contraire. Si quis autem hoc attemptare præsumpserit, indignationem omnipotentis Dei & B. Petri & Pauli Apostolorum eius se noverit incursurum. Datum apud Montem Phiascon: VI Calend: Octobr: Pontificatus nostri Anno secundo. Nulli ergo omnino hominum liceat hanc paginam nostræ innouationis, communicationis, & voluntatis infringere, vel ei ausu temerario contraire. Si quis autem hoc attemptare præsumpserit, indignationem omnipotentis Dei & SS.

Petri

Petri & Pauli Apostolorum eius se nouerit incur-
surum. Datum Romæ apud S. Petrum XII Calend:
Iunii, Pontificatus nostri Anno nono.

Bulla Ioannis Papæ XXIII. vsum Pontificalium
Præpositis Miechouien: concedens.

Joannes Episcopus Seruus seruorum Dei, dilectis
filiis Præposito & fratribus Domus Dominici Sepul-
chri Hierosolymitani Miechouien: per Præpositum
soliti gubernari Craconien: Diæcesis, salutem & A-
postolicam benedictionem.

Exigit vestre deuotionis synceritas & religionis pro-
meretur honestas, ut tam vos quos speciali dilectione
prosequimur, quam Domum vestram dignis honori-
bus attollamus. Hinc est quod nos vestris in hac parte
supplicationibus inclinati, ut tu fili Præposite & suc-
cessores tui dicte Domus qui pro tempore fuerint, mi-
tra, annulo, baculo, & dalmatica, ac aliis Pontifi-
calibus insigniis libere possitis uti, nec non quod in
præfata Domo & Domibus eidem Domui vestre subie-
ctis, ac Parochialibus & aliis Ecclesiis ad vos comu-
niter vel diuissim pertinentibus, quamuis vobis pleno
iure non subsint, benedictionem solemnem, post Mis-
sarum: Vesperarum, ac Matutinarum solemniam, dum
modo in benedictione huiusmodi aliquis Antistes,

Ioannes PP.
13 Neapoli-
tanus in Pō-
tificatum e-
lectus Anno
1410. sedit
an: 5. dies 15.
obiit anno
1417. Adole-
lescens Bo-
noniæ Ciuitatis
pontificioq;
iuti operam
dedit. vbi as-
sumpto Do-
ctoratus gra-
du, Romam
non sine spe
Pōtificatus
assequendi
se contulit,
interrogat⁹
enim ab a-
micis, quo
proficiscere-
tur, ad Pon-
tificatum re-
spondit.

vel sedis Apostolica Legatus praesens non fuerit, elargiri possitis, felicitis recordationis Alexandri IV. predecessoris nostri, quae incipit Abbates, & aliis quibus cunq; constitutionibus Apostolicis in contrarium editis, nequaquam obstantibus, vobis & eisdem successoribus auctoritate Apostolica de speciali gratia tenore praesentium indulgemus. Nulli ergo omnino hominum, liceat hanc paginam nostrae concessionis infringere, vel ei ausu temerario contraire. Si quis autem hoc attemptare praesumpserit, indignationem omnipotentis Dei & SS. Petri & Pauli Apostolorum eius se noverit incursum. Datum Romae apud S. Petrum 4 Calen: Octob: Pontificatus nostri Anno secundo.

His ita de statu & antiquitate Ordinis Canonico-
rum S. Sepulchri Hierosolymitani breuiter expositis,
reliquum est vt Praepositorum Miechouiensium penes
quos suprema potestas vniuersi ordinis relictæ esse di-
gnoscitur, nomina & continuam ad praesens vsque
tempus successionem, in conspectum fratrum produ-
camus. Nec nos quidem gesta singulorum prosequi ex-
acte intendimus, quæ merito librû peculiarem sibi ven-
dicare possent, sed solummodo nominibus ac tempo-
ribus, quo illorum aliquis electus sit, quoque clausit
diem extremû, compendiosè designatis. Commemoratis
etiam breuissimè ex authenticis rescriptis, in diuersis
Regni prouinciis, Ecclesiarum Ordinis nostri fundati-

onibus

onibus & incrementis, miram, in conseruatione perue-
 tuisti Ordinis, Dei clementiam testatam mundo facie-
 mus, simulq; animos iuniorum ad imitationem præde-
 cessorum, qui veluti rutilantia sydera Ordinem san-
 ctum, professione & religiosis moribus ornauerunt
 prouocabimus. Quanto autem cum desiderio ille præ-
 clarissimus orbis & vrbis Senator, Andreas S. R. E. Car-
 dinalis Bathoræus Ordinis nostri quondã Præpositus
 Generalis amplissimus, id quod nos modo publici iu-
 ris facere decreuimus conspiciere optauerit, ex literis
 ab vrbe in Conuen: Miechouien: missis, quarũ copiam
 Reueren: Dñus Tiburtius Iaskovvski Ecclesiæ nostræ
 S. Ioannis ad Gnesam Præpositus, multis nominibus
 de Religione sancta, ac de meipso optime meritis,
 suppeditauit, quisq; facile intelliget, mecũq; Deo grati-
 asaget; quod etiam nunc tam tristi & ærumnoso tẽpo-
 re, prouideat Ordini nostro tales Antistites, qui omnia
 ad prisca instituti normam reuocant, & conceptæ de
 sua virtute opinioni præclare respondent; quorum
 vitam & gubernationem piis Deo precibus nòs quoti-
 die comendare oportet. Interim Illustr: Cardinalis E-
 pistolam in hunc modum conscriptam à nobis accipe.

ANDREAS CARDINALIS BATHO-
 ræus, Custodi Miechouien: Salutem.

*Scripseramus ante vnum vel alterum mensem F.
 V. ut seriem Præpositorum Miechou: descriptam
 ad nos in urbem mitteret. Ideo consilio à nobis factũ*

fuit,

fuit, ut certi aliquid scire possimus de prima Monasterii erectione, à quibus, & quo fine institutū fuit. Iussimus in sancta Vrbe diligenter perquiri, si quid esset quod ad Monasterii Miechou: rationes pertineret, sed nihil reperitur hactenus. Quo maiore studio à F. V. postulamus, ut omnes angulos Monasterii peruestiget, si forte alicubi reperiatur aliquid, quod ad rem presentem faciat, videtur enim Max: Pont: animum adiecisse ad locum hunc fidei nostræ creditū, ad Instituti sui primæ initia reuocandum. Cum verisimile sit, primos fundatores illius, id præ oculis maxime habuisse, ut cultus Dei incrementa magis ac magis sumeret, & recte viuendi, bonorumq; operum exempla in Monasterio vigerent. Det operam queso, ut nobis hac in parte primo quoque tēpore satisfiat, nosq; de rebus Monasterii per literas certiores reddat.

Romæ 17 Martij, Anno Domini, 1585.



